




Early European Books, Copyright © 2011 ProQuest LLC.  
Images reproduced by courtesy of the Biblioteca Nazionale Centrale di  
Firenze.  
Ald.2.4.48/a







Early European Books, Copyright © 2011 ProQuest LLC.  
Images reproduced by courtesy of the Biblioteca Nazionale Centrale di  
Firenze.  
Ald.2.4.48/a





Early European Books, Copyright © 2011 ProQuest LLC.  
Images reproduced by courtesy of the Biblioteca Nazionale Centrale di  
Firenze.  
Ald.2.4.48/a



Early European Books, Copyright © 2011 ProQuest LLC.  
Images reproduced by courtesy of the Biblioteca Nazionale Centrale di  
Firenze.  
Ald.2.4.48/a



SCHOLIA

IN

CICERONIS. EPISTOLAS

FAMILIARES. DICTAS

PAVLI. MANVTII


MAXIMILIANI. II

EX. PRIVILEGIO



IMP. CAES. AVG.

VENETIIS. ∞ DLXXIV





SCHEOLA

IN


CICERONIS. EPISTOLAS

FAMILIARES. DIGITAS

PAVL. MANVTII

MAXIMILIANI. II.

IMP. CAES. VAC.



EX. BIBLIOTHECA

VENETIIS. M. D. LXIV

26



# IN. LIBRVM. I<sup>32</sup>

## EPISTOLA. I

P A G . I

**A**DMONITIONIBVS 3 Placet  
in hoc uerbo dubitantibus, &  
mendosum suspicantibus, quod ta-  
men in omnibus legitur antiquis  
libris, aptamq. & percommo-  
dam sententiam habet, scrupulū  
eximere. Dixerat Cicero, Et monere : debuit  
igitur, ut nomen cum uerbo congrueret, inferre,  
Monitionibus, non, Admonitionibus : cum, Mo-  
nere, & Admonere, significatione differant inter  
se. obiurgat enim is, qui monet ; qui uero admo-  
net, non obiurgat, sed, quid faciendum sit, do-  
cet : ut exempla declarant. In hoc igitur pruden-  
tia Ciceronis agnoscitur : qui cum de principe ciui-  
tatis, & praecipuo sui ab exsilio reditus auctore  
Pompeio loqueretur, asperiore uerbo iterum uti no-  
luit, sed mitigandam leniore uerbo sententiam pu-  
tauit : ut ostendat ita Pompeium erga Lentulum  
animatum esse, non modo ut eum a restituēdi regis  
consilio uerbis asperioribus abduci necesse non sit,  
sed nec admoneri quidem, ac doceri, quo pacto &  
suspicionem uitet cupiditatis, & illam reducendi  
a 2 regis



regis curam cupienti Lentulo obsequatur.

eadem. pag. 2

Q V O D cominodo rem facere possis: & Cō-  
modo pro Commode, antike dictum. in quo du-  
bitatum a nonnullis miror; quasi, Commodo, ad-  
uerbiū esse non possit, quod nisi diligens antiquita-  
tis obseruator Carisius admonuisset, Caesaris ta-  
men ad Ciceronē epistola doceret. Cum Furnium,  
inquit, nostrum tantū uidissem, neque alloqui, neq.  
audire me cōmodo potuisset. Mibi tamen olim pla-  
cuit, neque nunc, quamquam repugnantibus anti-  
quis libris, displicere potest, pro, Rem, legi, Reip.  
atque hanc ex antiqua Latini sermonis consuetu-  
dine coniecturā duxi. quo in studij genere, nec in-  
fior a prima adolescentia satis accurate me esse  
uersatum, nec omnino paenitet. Erat autē in man-  
danda publica re exceptio quaedam, ut id, quod  
mandaretur, ita fieret, si commodo reip. fieri pos-  
set. quo significabatur, eam rem non potestati ma-  
gis, quā prudentiae, commiti. Recitabo ueterum  
exempla, quibus & eadem sententia, & iisdem  
enunciata uerbis, agnoscetur. ac tum denique, u-  
trū scriptis libris, idest dubiae librariorū fidei, an  
certissimis antiquorū test moniis credi oporteat,  
cum praesertim nec a scriptis libris admodū disce-  
dat opinio nostra, doctorum uirorum arbitrio per-  
mittam. Caesar lib. 1. bel. ci. Quoniam M. Mes-  
salla, M. Pisone cos senatus censuisset, uti, qui-  
cumque Galliam provinciam obtineret, quod com-  
modo



modo reip. facere posset, Aeduos, ceterosq. amicos populi Romani defenderet, se Aeduorum iniurias non neglecturum. Idem lib. v. scribit Labieno, si reip. commodo facere posset, cum legione ad fines Neruiorum ueniat. Lib. v. 1. Labienum, Treboniumq. si reip. commodo facere possint, ad eam diem reuertantur. Cicero ad M. Brutum: Decrevi hoc amplius, ut tu, si arbitrarere utile fore, & e rep. esse, persequerere Dolabellam bello; si minus id commodo reip. facere posses, in iisdem locis exercitum contineres. Omitto illa similia, quae Ciceronem legentibus occurrunt: Quod tuo comodo fieri possit: Quod sine molestia tua facere possis: Quod tuo comodo fiat: Quod sine peccato meo fiat. Hic opponitur a quibusdam: hoc loquendi genus huic Ciceronis loco nullo modo convenire: putant enim; senatus haec uerba fuisse, cum S. C. faceret, aut eorum, qui provincijs cum imperio praessent, cum aliquid legatis mandarent: non igitur ea cadere in sententiam Ciceronis, Hostensij, & Luculli, qui privati senatores erant. Haec ratio quid momenti habeat, examinando cognoscemus. Primum quaero: si senatus, cum decernit, utitur his uerbis, ut reip. caueat; cur non iisdem senator, qui & ipse sua sententia decernit, uti possit? decet enim, ut senatum in publico de reo, ita senatores singulos in dicenda sententia reip. consulere. quid est autem S. C. nisi multorum senatorum idem probantium consensus? quod si, S. C. in alicuius sen-



entiam senatoris esse factum, saepe legimus: nil aliud existimare licet, quam grauiore eius sententiae partes in S.C. esse translatas. grauius autem nihil, quam ut id, quod mandaretur, incommodo reip. ne fieret. itaque non est, opinor, mandantis dumtaxat, hic loquendi modus, ut senatus, aut proconsulis, sed eius etiam, qui suadet. Negabit hoc aliquis: at credat exemplo. Cicero in epistola ad Brutum: Decreui hoc amplius, ut tu, si arbitrare utile fore, & e rep. esse, persequerere Dolabellam bello; si minus id commodo reip. facere posses, in iisdem locis exercitum contineres. Haec neque senatus consulti uerba sunt, neque proconsulis, sed priuati Ciceronis in senatu sententiam dicentis; cur igitur in hac etiam ad Lentulum epistola locum habere non possint? At libri ueteres aduersantur omnes. Dissimulamus in re nota. quam multa enim contra ueterum librorum auctoritatem, adiuuante historia, sententia, ipsa etiam Latini sermonis regula, non modo sine reprehensione, uerum etiam cum laude summa docti homines immutarunt. mihi sane uidetur, ut in omni re, sic in hoc industriae genere modus quidam esse: ut libris quidem antiquis in corrigendo utamur, id quod ego diligenter seruo, mutare tamen ex ingenio doctrinae aliquid aliquando liceat, sed ita parce, & uerecunde, ne corrigendi libertas ad temeritatem progressa uideatur. quam ob causam ueterem hic scripturam immutare noluimus: tantum fecimus, ut ostendere-

mus



mus opinionem nostram: quam nec ijs improbari, qui non temere, praeter sua, quidquam probant, ex eo possumus conijcere, quod, si qua laus coniecturae nostrae debetur, eam alio transferre conantur. Nimirum ad istas artes confugere, & alienis laboribus honorem ereptum uelle, pusilli animi est: non enim addam, Et ipsa malevolentia ieiuni: quod Cicero addit in re non dissimili. neque nunc de meo iure litigabo. malim caussa cadere, quam ijs de rebus in iudicium, contentionemq. uenire, quarum studio si hoc assequor, ut bonis litteris opem feram, cetera non ualde requiro: si dantur, accipio: si minus, uberrimum tamen, & suauissimum ex ipsa conscientia fructum capio.

eadem.

pag. 3.

P R A E S E N T I S Q V E cognoscent. 3 sunt, qui legant, Praesentes tui: recte fortasse: mihi tamen sententia non arridet. quae enim haec amoris, & fidei minime necessaria distinctio? cur non & amor simul cum fide ab omnibus, & fides item simul cum amore a praesentibus cognoscatur? Quanto planius & commodius, Nostram fidem omnes, amorem tui absentis, praesentisq. cognoscent. quod est in duobus antiquis libris: in ceteris autem omnibus, quos quidem ego uiderim, diuerse, non tamen ut sententia mutetur: Tui absentis, praesentisq. tui. potest enim ferri pronomen iteratum: potest etiam, quod malim credere, iteratum uideri scriptoris incuria. nullo quidem in uetere libro, Praesentes tui, legi-

a 4

mus.



mus. quod ideo testatum esse uoluimus, ne quem coniectura minime necessaria delectaret, cum ex antiquis libris comodam elici sententiam uideret.

EPISTOLA. II pag. 3

LENTVLI consulis, & Marcellini. sic appellatur & ep. 2. lib. v. ad Att. In quibusdam libris, Lucij, non omino absurde: potest enim intelligi de altero consule L. Philippo, qui sentiebat idem, quod collega. Ac, ne quem offendat unicuique praenomen, exempla occurrunt similia non pauca; ut cum, Cnaeus, pro Pompeio Magno accipitur; Publius, pro Clodio, Ciceronis inimico; Sextus, pro Peducaeo, Attici familiarissimo. Praeterea, cum consul nominatur, non ne satis, quis Lucius sit, ostenditur, & a ceteris Lucijs distinguitur?

eadem. pag. 4

QUATENVS de religione dicebat, & cum Bibulus sententia sua duas res complexus esset, de religione, & de tribus legatis: postulatum est, ut eius sententia diuideretur, id est, ut singulis de rebus separatim referretur. ac de religione quatenus dixit, ut scilicet contra Sibyllinos libros ne decerneretur, qui regem Aegyptium cum exercitu reduci uetabant: assensum, inquit, est: caput illud, de tribus legatis, qui regem reducerent, improbatum. Dixit autem, Frequentes ierunt in alia omnia,



omnia, pro Frequentes dissenserunt. neque solum  
 Ire in alia omnia, sed & Discedere, & Transire,  
 eodem sensu ueteres dicebant. Libro x. ad Plan-  
 cum. Eñ, inquit, senatus reliquit, et in alia omnia  
 discessit. Hirtius autem prope finem libri i ix. de  
 bello Gallico, Discessionem, ait, faciente Marcel-  
 lo, senatus frequens in alia omnia transijt. Festus:  
 Qui hoc censetis, illuc transite; qui alia omnia, in  
 hanc partem. his uerbis praeit; ominis uidelicet  
 caussa; ne dicat, Qui non censetis. inde factum,  
 ut, Ire in alia omnia, idem significet, quod, Non  
 cēfere, idest, contra id, de quo discessio fit, sentire.

eadem. pag. 4

Cv i q. rei iam obsisti non poterat, &  
 Satis implicata sententia uidetur, sed, ut arbi-  
 tror, explicabitur hoc modo: Quatenus de reli-  
 gione loquebatur, & in quo iam obsisti non pote-  
 rat, Ribulo assensum est. ep. i. Hortensij, & mea,  
 & Luculli sententia cedit religioni de exercitu, te-  
 neri enim res aliter non potest. Obsisti autē ideo  
 nō poterat, quia factum erat iam S. C. Regem  
 cum multitudine reduci periculosum Reip. uideri.  
 Antiqui libri omnes, qui apud me sunt, Clam, ha-  
 bent, pro, Lam: quod mendosum esse constat.

eadem. pag. 4

Cv m Lupus; Sine Cum, sine Tum, sine Cui  
 legatur, in quo scripti libri dissentiant, parui re-  
 fert. Nihil enim aut additur ad sententiam,  
 aut detrahatur.

eadem.



eadem . pagina 4.

INTENDERE? Sic antiqui libri, quos uiderim, omnes, non Contendere. Pro Quinctio: Qui sibi eum nuper edidit socium, quem, quo modo nunc intendit, ne in uiuorum quidem numero tum demonstrat fuisse. Hoc autem intendebat Lupus, cum ipse de Pompcio, sine controuersia principe ciuitatis, retulisset, ante se oportere discessionem facere, quam consules: quod uereretur, ne, si de Hortensij sententia, quae Lentulum decernebat, discessio fieret, maior Senatorum numerus eam probaret.

eadem . pag. 4

MULTIS partibus plures? qui sic explanant, uidisse consules, in Hortensij sententiam plures ituros a multis partibus, id est hinc & illinc; parum omnino agnoscunt purissimam, & ornatissimam locutionem, qua eloquentissimi eius aetatis uiri suis in scriptis eleganter usi sunt. M. Coelius libro haru epistolarum 11 x. Turpe tibi erit, Patiscum decem Curioni pantheras misisse, te non multis partibus plures. Item Caesar lib. 111. de bello ci. Numero multis partibus inferior. Multis partibus plures, & multis partibus inferior, dixerunt, pro eo, quod est, Multo plures, & Multo inferior. Cicero ite lib. 111. de Finibus; Multis partibus malit; pro, multo malit. Idem in Acad. Quibus efficitur, solem multis partibus maiorem esse, quam terram. Suetonius quoque, non omnino malus



lus Latinitatis auctor, in Iulij uita eodem loquendi modo usus est.

EPISTOLA. III pag. 6

T. AMPIVS § qui ante Lentulum Ciliciae praesuerat, praetorius, non consularis. T. Ampium tribunum pl. nominat Velleius lib. 2. qui cū T. Labieno collega legem tulit, Cicerone, consule, ut Pompeius post uictoriam Mithridaticam ludis Circensibus corona aurea, & omni cultu triumphantium uteretur, scenicis, autem praetexta, coronaq. aurea. Inter tribunatum autem, & praeturam cum anni quattuor intersint, praetor fuisse uidetur Pisone, & Gab. cos. idest quadriennio post Ciceronem consulem. & anno sequenti, Lentulo, & Metello cos. iuit in Ciliciam: eiq. postero anno Lentulus Marcellino, & Philippo cos. successit. itaque ratio temporum probare uidetur, Ampium, qui Ciliciae praesuit ante Lentulum, eum esse, quem nominat Velleius. Nec tamen eum negauerim esse posse, qui civili bello delectum habuit pro Pompeio, ut ep. xi. lib. 8. ad Att. ad quē exsulē epistolae Ciceronis exstant lib. 6. & lib. x. Caesar quoque Pompeianum indicat fuisse lib. 3. bel. ci. cum ait: Reperiebat, T. Ampium conatum esse tollere pecunias Ephesi ex fano Dianae, eiusque rei causa senatores omnes ex prouincia uocasse, ut, ijs restibus, summa pecunia uteretur,



tur, sed interpellatum aduentu Caesaris profu-  
gisse. Legebatur olim in uulgatis libris, T. Ap-  
pius, mendo manifesto: quia duo praenomina si-  
mul esse non possunt: ideo reposuimus, conie-  
cturam secuti, T. Ampius: quam postea coniectu-  
ram ueteres aliquot libri comprobarunt. Medi-  
ceus tamen, & alij nonnulli, Tampius: quod re-  
prehendere non ausim, cum Tampiorum quoque  
familiam Romae fuisse uideam.

EPISTOLA. IV pag. 6

PRIDIE eius diei f. 3 dicit quod supra in  
epistola 11. in qua ita scripsit: De tribus legatis,  
frequentes ierunt in alia omnia. Sed, cum ibi fa-  
ctum id esse dicat die, qui consecutus est idus Ian.  
hic autem die, qui x v 1. Kal. Febr. antecessit;  
fuere, qui dum arbitrantur, Ianuario mensi, ut  
nunc, ita tum unum & tricenos fuisse dies, corru-  
ptum esse locum crederent, uidentes hanc diem,  
ut quidem ipsi numerabant, aliam esse ab ea, quae  
est in epistola 11. cum tamen eandem esse oport-  
teret, quod absque dubio locus hic alter de tribus  
legatis repetitio prioris esset. quod si ad rationem  
eius anni, quo scripta est epistola, supputassent:  
& locum carere mendo, & eandem, quam 11.  
epistola, diem significari, cognouissent. fuit enim  
tunc Ianuarius tantummodo xxix. dierum. po-  
stea C. Caesar, annum corrigens, binos addidit,  
& ut



Et, ut xxxi. haberet, effecit. Macrobius.

eadem. pag. 7

Ego tibi aui & Timebat, ne tribunus aliquis per vim legem ferret, qua Lentulo uel Ptolemaei regis restitutionem eriperet, uel imperium abrogaret: quod factum est. epistola ii. libri ii. ad Q. fratrem, eadem de re scribens, Quid futurum sit, inquit, latrocinio tribunorum, non diuino: sed tamen suspicor per vim rogationem Caninium perlaturum.

EPISTOLA. V pag 9

Hic quae agantur, & aut hoc est alterius epistolae initium: aut, quae sequuntur, non eodem die scripta sunt, quo superior epistolae pars. Saepem autem accidit, ut litteras non continuata, sed crebro repetita scriptione cōficiamus, singulis diebus noui aliquid appingentes: id quod in epistolis ad Atticum, & ad Q. fratrem scriptis saepissime factum uidemus.

EPISTOLA. IIX pag. 17

Ex Emplatorio & non agnosco Romanam gentem: & malim, Ex M. Plaetorio. Plaetorii enim inter gentes Romanas noti: & M. Plaetorius praetor in oratione pro Cluentio nominatur.

EPI-



## EPISTOLA. IX pag. 22.

N V M potui? Quis non uidet maiorem in sententia uim esse, si a particula Num, incipiat, periodum claudente interrogandi nota, quam si a Non, sine eadem nota? & haec uis hic maxime requiritur, ubi se Lentulo, tamquam bonum ciuem, nec exsiliij mutatum calamitate, iactans, actiones pro Rep. suas extollit. Eadem uis agnoscitur lib. 1. de Orat. Num quod eloquentiae uestigium apparet? pro, Nullum prorsus eloquentiae uestigium apparet: quod idem erat in sententia, sed, ut patet, languidius. Haec, in re satis nota, tamen dixi: quia nonnullos dubitare audio, utrum rectius, Num, an Non.

eadem. pag. 24

N O N modo praemijs, & quidam hoc loquendi genus imperfectum iudicarunt; quod, Non modo non praemijs, & apertius, & usitatus esse uideretur. nos, & auctoritatem ueterum librorum, & Ciceronis consuetudinem secuti, omnino legimus, Non modo praemijs. ualet enim idem, quod, Non modo non praemijs: ut sit, Non modo, pro Nedum. exempla fidem facient. ep. 17. lib. 9. Hoc tamen scito, non modo me, sed ne ipsum quidem principem scire, quid futurum sit. Quo item loco, Non, inculcatum erat, contra ueteres libros. Sic & ep. 16. l. 2. ad Att. Qui mihi



hi non modo praemiorum, sed ne sermonum quidem umquam fructum ullum, aut gratiam retulerunt. In quo animaduertendum, Praemiorum, sermonum, pro Praemijs, Sermonibus, usurpatum esse. Et ep. 6. lib. x. Regnum non modo Romano homini, sed ne Persae quidem cuiquam tolerabile. Et ep. 24. lib. x 1. Mibi non modo irasci, grauissima iniuria accepta, sed ne dolere quidem impune licet. Lib. 1. de Oratore: Neque solum inscientiam meam, sed ne rerum quidem magnitudinem perspicit. Et in oratione 2. in Rullum: Si, non modo dena iugera dari uobis, sed ne constipari quidem tantum numerum hominum posse in agrum Campanum, intelligitis; tamen ne uexari remp. contemni maiestatem populi Romani, deludi uosmet ipsos diutius a tribuno pl. patiemi ni? Tusc. 1. Mortuorum, non modo uitae commodis, sed ne uita quidem ipsa quisquam caret. Tusc. v. Tertias, quod essent plane inanes, neque necessitatem modo, sed ne naturam quidem attingerent, funditus eijciendas putauit. id est, & non modo non necessitatem. Suspicio & Coeliū ep. 11. lib. 8. scripsisse: Non modo fecit: quod est in peruulgatis libris, Non modo non fecit. nam a plerisque abest antiquis libris alterum, Non. Varro lib. 8. lin. Lat. Dicam de uniuersa analogia, cur non modo uideatur esse reprehendenda, sed etiam cur in usu quodammodo sequenda. Atque in his, quae recitari, locis, Non modo, usurpatum uidetur pro Nedum. Eadem



de loquendi consuetudo agnoscitur in Graecis. nā  
 Isocrates in oratione, quae Πλαατικός inscribitur,  
 Οὐχ ὅπως τῆς κοινῆς ἐλευθερίας μετέχομεν, ἀλλ' οὐδὲ  
 δουλίας μετρίας ἡξιώθημεν τυχεῖν. Et in eadem in-  
 fra.

eadem. pag. 24

IN praetura, & in consulatu ꝑ praetor  
 Maniliam rogationē suavit, ut Pompeio Mithri-  
 datici belli cura mandaretur. exstat oratio. consul  
 cum alijs eum ornavit officijs, tum etiam, quod  
 retulit de supplicationibus decernēdis, rep. Mi-  
 thridatico bello felicissime gesta. Mō consule re-  
 ferente, ait in oratione de provincijs, primum de-  
 cem dierum supplicatio decreta Cn. Pompeio, Mi-  
 thridate interfecto, confectioq. Mithridatico bel-  
 lo: meaq. sentētia primum duplicata est suppli-  
 catio consularis. mihi enim estis assensi, cum,  
 eiusdem Pompeij litteris recitatis, confectis o-  
 mnibus maritimis, terrestribusq. bellis, suppli-  
 cationem dierū x i i. decrevisti. Et ep. 4. lib. 3.  
 ad Q. fr. Ille, cum a me singularibus meis stu-  
 dijs ornatus esset. &c.

eadem. pag. 26

SI ijs pro me stante pugnare licuisset, ꝑ  
 adolescens, cum hos epistolarum libros, quam di-  
 ligentissime tum potui, emendarem, hunc locum  
 ita, ut legitur, ex libris antiquis restitui; cum  
 antea ita corruptus esset, ut bonus sensus elici  
 nullus posset.

eadem.



eadem. pag. 27

PRIMUM illa furta ꝑ significatur illud tē-  
pus, cum Clodius, amore captus Pompeiae, Cae-  
sar's uxoris, ad eam introiuit, ubi sacrificium Bo-  
nae deae pro populo fiebat. ad Att. ep. 10. lib. 1. P.  
Clodium, te credo audisse, cum ueste muliebri de-  
prehensum domi C. Caesaris, cum pro populo fie-  
ret. Sed hoc non refertur ad proximum uerbum,  
Consecuta. non enim illa furta, Ciceronis reditum  
consecuta; sed ea commiserat Clodius, Messalla,  
& Pisone cos. id est triennio ante Ciceronis exsiliū.  
Est igitur, Primum illa furta, perinde ac si dixe-  
rit, Primum illa furta nota sunt, quibus iam an-  
tea polluerat Clodius aedem Bonae deae. Sed hoc  
etiam uehementer dolendum, quod proxime con-  
tigit, qui & tres sorores suas stuprauerat, & in  
opertum Bonae deae, quo uiris non licebat, noctu  
flagitij causa introierat, post reditum meum de ui  
accusatum a Milone tribuno pl. impunitatem tamē  
esse consecutum. Vbalдинus Bandinellus, & alij  
eum postea secuti, legendum putarunt, Furia, pro  
Furta, locum alioqui mutilum arbitrati: quem ta-  
men interpungendi ratio sic adiuuat, ut nihil desi-  
derari satis constet. nec tamen cuiusquam industriā  
reprehendo: sed a ueteribus libris (omnes autem  
mei, & Medicus etiam habet, Furta: quod, ut  
ostendi, sententia non respuit) sine magna causa  
discedendum non existimo. Ridicule autem nonnul-  
li de interpungendi notis antiquos libros consulunt,  
b diuersos



diuersos omnino, ad hanc quidem partem quod attinet, a recentioribus impressis. nam, Illa furta religionum muliebrium, sententia ita fert, si, Furta religionum, pro nocturno flagitio in sacris usurpentur.

eadem. pag. 36

**LIBERALITATEM** & alij, Libertatem. ego nihil muto. librum enim perantiquum habet adolescens nobilis, Bernardinus Masaeus, in quo, Liberalitatem, scriptum est. quam uocem eo libentius conseruauit, quod sequitur, Cum sine suspitione tuae cupiditatis non possis illius cupiditatem refutare. quod enim dixerat, Liberalitatem, contrarium opposuit, Suspicionem cupiditatis.

eadem. pag. 36

**FELICITATE** quidem, uellem, consequi potuisses & uellem, ita felix esse potuisses, nihil ut omnino contra eius ordinis, quem semper ornasti, aut rem, aut uoluntatem ageres. Quidam ueteres libri, Felicitatem: alij, Facilitate autem quod uellem consequi potuisses. Sed facilitas est uoluntatis: quam si Cicero requirit in Lentulo, hominem carpit amicissimum, optimeque de se meritum.

**EPISTOLA. VLTIMA.** pag. 37

**CUR** enim tibi hoc non gratificer, & Cum inscripsisset, Valerio iuriconsulto, subiunxit iocans: Nam iuriconsultum cur te non appellem, nescio, etiam



etiam si iurisconsultus ualde non sis . Et sane Valerius hic nō uidetur ius ciuile, quātum opus esset, cognouisse: cum de eo sic ad Appium scripserit: L. Valerium iurisconsultum ualde tibi commendo, sed ita etiam, si non est iurisconsultus . Verum ita familiariter eum Cicero diligebat, ut ei, quod omnino falsum non erat, id per iocum obijceret . Inscripti, inquit, hanc epistolam, iurisconsulto, gratiae potius caussa, quam ueritatis, praesertim cum hodie non qui sapientes, sed, qui audaces sint, iuriscōsulti nominentur . Hic, ut omnis, quantum quidem praestare nobis liceat, erroris tollatur occasio, quasi quoddam παράγραφον addatur, quod tamē alienum non putamus, quae nostra sit de epistolae integritate sententia . sunt enim, qui huius epistolae desiderari principium existiment; quod eis, credo, insolens, atque ineptum uideatur, prima epistolae uerba ab inscriptione pendere . cuius tamen generis exēplū hoc animaduertimus. ep. 20. lib. 3. ad Att. M. CICERO . S. D. Q. CAECILIO. Q. F. POMPONIANO. ATTICO: Quod quidem ita esse, & auunculum tuum functum esse officio, uehementissime probo . Constat enim, itidem hic epistolae principium inscriptionem spectare.

eadem. pag. 37

PARTIM te superbum esse dicunt, quod nihil respondeas; partim contumeliosum, quod male respondeas. & iocus est in his uerbis & abstrusus, & elegans . uult enim innucre,

b 2 ideo



ideo nihil cum quandoque respondere, non quod superbus sit, sed quod eum nemo consulat, cum homines bonum iuriconsultum non putent: ideo autem male respondere, non quod contumeliosus, sed quod imperitus, & indoctus. Proprium uero iuriconsultorum fuit, hodieq. est, de iure consulentibus respondere. Similis iocus est in Trebatium ep. x 1. lib. 7. Qui istinc ueniunt, superbiam tuam accusant, quod negent te percunctantibus respondere.



# IN. LIBRVM. II

## EPISTOLA. VI

P A G . XLIV

**I**n suffragijs studia & ausus sum de-  
lere, *Studia*: cum proxime dixe-  
rit, *Studium*: a quo reguntur  
haec inferiora, *Vulgi*, ac multitu-  
dinis, iuventutis & gratiosorum  
in suffragijs.

## EPISTOLA. IX pag. 48

**P**rimvm & primum gratulatur, deinde gra-  
tias agit. sed hic, *Primum*, posuit, nec intulit, De-  
inde: sententiam tamen absoluit in eo: Et cum gra-  
tulator; tum uero, quibus uerbis tibi gratias agā,  
non reperio. Eodem modo ep. 23. lib. VII. cum  
dixisset, *Primum* ipsas ego musas numquam tan-  
ti approbassem: Deinde, praetermisit; nec tamen  
imperfectam sententiam reliquit. de quo suo loco.  
Et ep. x 1. lib. 8. ad Att. & 18. lib. 12. ad eun-  
dem: & in Lucullo: *Primum* interest. Et apud Te-  
rentium: *Primum* iam de amore hoc comperit.  
*Quam consuetudinem*, Graece dictā ἀναταπέδο-  
τον, qui ignorant, *Plurimum*, pro *Primum*, hic  
reponunt: contra ueteres libros, eos quidem, quo-  
rum



rum ego ope in hoc corrigendi munere nunc utor, nec ab his discrepat *Mediceus*: cuius auctoritatem in re bona ab ijs esse neglectam, qui eiusdem libri mendas etiam interdum cuiusdam constantiae causa sibi describendas putauerunt, valde miror.

EPISTOLA. XI pag. 50

DE TE, quia, quod sperabam; de Hillo, (balbus enim sum) quod non putaram. § In ep. 4. lib. 8. *Coelius*, de Hirro competitore suo loquens, ita scripserat: Spero te celeriter auditurum & de nobis, quod sperasti, & de illo, quod uix sperare ausus es. Quibus uerbis Cicero respondens, eadem paene repetit. & quia scripserat *Coelius*, De illo; facete, & false adspirationem Cicero addidit, ut Hirri nomen, more balborum, qui r, litteram exprimere non possunt, enuncieret. itaque subiunxit, Balbus enim sum. in sequentibus autem, cum r, litteram expedite proferat, Balbi, inquit, non sumus. Hic tamen faciam, quod susceptum a me munus postulat, ut hunc locum ex ingenio mutatum significem. nam ueteres libri, omnes in mendo consentiunt, cum, Nihilo, pro, Hillo, habeant. Sed non dubito, quin haec recte intelligentibus coniectura, e *Coelii* loco ducta, cui manifeste Cicero respondet, etiam atque etiam probetur. Res, inquit, magnae gratulationis



lationis erat, quia de te, id, quod sperabam, ac-  
ciderat; de Hirro autem, quod non putaueram,  
ideſt, ut tam turpiter aedilitatis repulſam ferret.  
Atque hoc eiſdem Coelij locus alius in ep. 9. lib.  
8. ſignificat: inquit enim, Sic tu, inquis; Hirrum  
tractaſti? immo, ſi ſcias, quam facile, quam ne  
contentionis quidem minimae fuerit; pudeat te,  
auſum illum umquam eſſe incedere tamquam tuum  
competitorem.

eadem. pag. 50

**D**IVISVS aquarum diuortijs; ꝛ ut ad  
Syriam ab una parte, ad Ciliciam ab altera perti-  
neret, defluentibus aquis diſtributus. cum enim  
aquae diuiduntur, diuortium earum fit. ſic ep. 20.  
ad Att. lib. v. Ad Amanum contendit; qui Syriam  
a Cilicia aquarũ diuortio diuidit. Et lib. i. de Orat.  
Ut ex Apennino fluminum, ſic ex communi ſapien-  
tium iugo ſunt doctrinarum facta diuortia. Cur-  
tius autem lib. v. Tigris, & Euphrates ex Ar-  
meniae montibus profluunt, et magno deinde aqua-  
rum diuortio iter, quod coepere, percurrunt. Et  
Linius lib. 38. Prope ipſis iugis, ad aquarum di-  
uortia caſtra poſuiſſe. ideſt, ad eum locum, unde  
aquae pluuiæ, duas in partes diuiſæ, incipiunt  
defluere. Flaccus etiam Siculus in libro de limiti-  
bus, Diuerſia aquarum dixit, eadem ſignificatio-  
ne: quod in diuerſas partes uergant, & uertantur  
aquae: unde Diuerſium, & Diuortium.

4 4 eadem.



eadem. pag. 51

**OPIBVS**, & *Alij legunt, Operibus: sed Opera Cicero supra nominavit. Opum autem nomine, summa uis, & summa contentio significatur. unde Virgilius: Magna pugnatur opum ui. Alibi diuitiarum copia, alibi totum id, quo ualemus, Opum nomine demonstratur.*

## EPISTOLA. XII pag. 52

**QUINQUATRVS** dictum fortasse nominandi potius, quam, ut alij putarunt, generandi casu. mallet tamen, *Quinquatribus: ut intelligatur dies, quo gestae sunt res, non quo allatae: cum inferat, Citeriora nondum audiebamus. nam in uetere libro Hieronymi Ferrarij legitur, Quinquat. ut etiam pro gladiatoribus, gladiat. antiquis in libris quandoque scriptum uidimus. Quinquatrus autem quinque dies festi fuerunt, Mineruae dicati. Ouidius lib. 3. Fast.*

*Vna dies media est, & fiunt sacra Mineruae,*

*Nomina quae a iunctis quinq. diebus habent. Varro Quinquatrum diem ait appellatum, quod erat post diē quintum idus Mart. idest XIV. Kal. Apr. & quamquam ex Ouidio constet, quinquatrus fuisse quinque dies: tamen, cum Cicero quinquatrus nominat, non semper eos omnes dies, sed interdum primum dumtaxat eorum significat, ut ep. 25. lib. 12. Quinquatribus, frequenti senatu, caussam*



causam tuam egi non inuita Minerva. etenim eo ipso die senatus decreuit, ut Minerva nostra, custos urbis, quam turbo deiecerat, restitueretur. Et ad Att. ep. 9, lib. ix. Venit ad me Matius quatuordecim. Et alibi.

eadem. pag. 53

ITER habebant ad Iatorem? non satis mihi posse uideor pro eius merito laudare Iacobum Taurellum Fanensem, uirum optimum, exquisitae doctrinae, praestantis ingenij: qui, deleta macula, quae iam inueterauerat in peruulgatis omnibus libris, huic loco suam, ut ego quidem arbitror, integritatem restituit. cum enim in nullo uetere libro reperiatur, Ad Deiotarum regem, ut est in impressis ad hanc diem omnibus; in plerisque autem, Ad Iatorem: quae in Mediceo quoque scriptura est: acute Taurellus uidit, mutatione minima legi posse, Ad Adiatorum regem: quem Comanorum regem hoc tempore fuisse, Strabo docet lib. xi.

EPISTOLA. XIII. pag. 54

QVOD mihi significabant? contemnendum non putavi meorum omnium librorum consensum, & quod antea pro Mihi, Nonnihil legebatur, commenticium duxi; cum praesertim Medicus quoque liber, non ille quidem hoc in loco plane sit emendatus, sed ita prope tamen ad ueritatem accedat, ut emendari uel minimo negotio possit. Habet enim,



enim, *Quod* nihil significabant: in quo mei omnes planissime; *Quod* mihi significabant. Miror autem eos, qui Florentiae hos epistolarum libros nuper ediderunt, non modo Medicei libri (cui se tantum tribuere profitentur) auctoritatem neglexisse, (nam in illo, ut dixi, est, *Quod* nihil significabāt) uerum etiam contra ueteres omnes libros imprimi uoluisse, Nonnihil, nulla in Scholijs mentione facta. Certe enim aliqua ratione probari oportuit, quod ab antiquis libris, uel saltem (omitto alios, quos ipsi contemnunt) quod a Mediceo discreparet, cum praesertim, si uerbum Subdubitare perpenderent, intelligere potuerint Non nihil otiosum esse, minimeq. necessarium: nam adiuncta uerbo particula Sub, non nihil ostendit.

eadem. pag. 55

SUPERIORIS lustris; Mirum, quā hic antiqui libri omnes nullo prorsus excepto in mendo consentiant. Habent enim pro Confeceram, Conferam; pro Locupletaram, Locupletarin: pro Superioris, Superioribus; pro Conseruaram, Conseruata in.

eadem. pag. 55

MILITAREM Q. rem collocaſsem? Mediceus liber, & mei quattuor, Militaremq. collocarem, corrupte. duo mei, Militaremq. rem collocaſsem. sincere. unus, Militaremq. cum collocaſsem: minus mendose, nec tamen recte.

EPI-



## EPISTOLA. XV pag. 56

C V I tuae epistolae respondeant, & cum qua  
cōgruant epistola tua. Congruunt enim cum ea, qua  
reum a Dolabella factum esse Appium significau-  
ras. hoc igitur uideris dicere, moderatiore in poste-  
rū fore. Respondere ualet hic consentire, conuenire.  
similitudinem enim significat. ep. 5. Non quo ue-  
rear, ne tua uirtus opinioni hominum non respon-  
deat. De Vn. Dextra dextris respondent. lib. 3. de  
finibus: Quid posterius priori non conuenit? quid  
sequitur, quod non respondeat superiori? In Orat.  
forensibus nostris rebus etiam domesticae litterae  
respondebunt. Virg. lib. 1 Aeneid. Dictis respon-  
dent cetera matris. Quae significatio cum & his,  
& alijs exemplis notissima sit, fugit eos tamen,  
qui legendum putant Respondeam: errore puerili,  
quo enim referretur, Ea? quod ad Respondeant spe-  
ctare, nisi qui prorsus in litteris caeci sint, omnes  
uident. Est autem ordo. Scio, cui tuae epistolae re-  
spondeant ea, quae scribis Tulliae meae prudentia  
temperari posse. ut dandi casu Tuae epistolae di-  
ctum sit, non nominandi, ut acceperunt ū, qui ele-  
gantissimum loquendi genus non agnouerunt, unde  
temeritas, mutandiq. libido nata est.

eadem. pag. 56

OMNIVM fere exemplo. & plerique enim,  
de provincia decedentes, praeponere quae sto-  
rēm



rem solebant. ep. 18. Legebatur olim in uulgatis omnibus libris, Exemplum: nos ex antiquis, & more Latini sermonis, & ex ipsa quoque sententia, primi reposuimus, Exemplo.

eadem. pag. 56

PONTINIUS § qui legatus fuerat Cicero-  
nis, & Coelium honore superabat, non quod le-  
gatus, sed quod praeturam gesserat, atque etiam  
de Allobrogibus triumphauerat. praeturam Cice-  
ro, Sallustius, Epitome Liuiana, triumphum Dio  
nominat.

eadem. pag. 57

DE MATRINIO § Matrinium, scribam aedi-  
licium, nominat in oratione pro Cluentio. uidetur  
Coelius aedilis curulis aliquid aduersus eum, uel  
etiam pro eo, reip. aut amicitiae causa fecisse.

### EPISTOLA. XVI. pag. 58

ONERE § quidam libri, Honore. placet,  
Onere. ut ad illud respondeat, Molesta haec pom-  
pa. & cum stomacho dictum sit: quod, qui specie  
sit honor, ei uere tali tempore sit onus.

eadem. pag. 58

SED non ne tum prouidisti, § emendaui (sic  
enim arbitror) locum ex coniectura, adiuuante  
ueterum librorum uarietate: quorum habet unus  
meus, & alter, qui Leonici fuit, Sed sermonem  
uum prouidisti: alius, Sed nomen tuum prouidisti:

Sigonij



Sigonij unus, Sermonem tuū prouidisti: alter eiusdem, Si nomen tuum prouidisti: cum quo uideo consentire ueterem item librum, quem praestans ingenio, & doctrina uir, mihiq. carissimus, Pax Scala, sumptum ab optimo, & in primis erudito Ottonello Discalcio, proximis diebus ad me attulit. Fuluij Vrsini, doctissimi uiri, unus, Sermonem tam pium audisti. Medicus & ipse, ut arbitror, mendose: Sermonem Tampij uidisti: cum quo uidetur consensisse liber Petri Pagani, in quo nunc, derafa charta, legitur, Sermonem tā pium uidisti.

eadem. pag. 60

**LIBERALITATE** sua & immoderatos generi sumptus honesto nomine. Liberalitatem appellat. Miror hic nonnullis placere, Libertate, referentibus ad Appij accusationem. quasi uero Dolabella de Appio, eiusq. amicis, propinquis, affinibus, ualde laboraret: aut illa propter Appium Cicero subiungere debuerit: Velim quaeras, quos ille dies. &c. Quis nescit, uiros nobiles ab adolescentibus gloriae cupidis accusari solitos esse, nec ideo tamen eorum inimicitias timori fuisse.

eadem. pag. 60

**VATICINOR;** & non, diuino, sed, alucinor, & insanio: ut in oratione pro Sextio: Eos, qui dicerent, dignitati esse seruiendum, reip. consulendum, subeunda pro patria pericula, uulnera excipienda, mortem oppetendam, uaticinari, atque insanire dicebat.

EPI-



## EPISTOLA. XVII pag. 60

CANINIO Sallustio ꝓ moneo lectorem, in omnibus antiquis libris, quos quidem aut habeam nunc, aut umquam habuerim, Caninio, legi; quod si mendo uacat, legendum fortasse, Caninio Sallustiano, idest e Sallustijs in Caninios adoptato. certe, Caninio Sallustio, iunctis duarum familiarum nominibus, emendatum esse non potest. Mediceus liber, Caninio Sallusti. in eiusdem tamen libri indice, Sallustium, omisso Caninij nomine. Sunt, qui ex ingenio legant, C. Sallustio.

eadem pag. 61

PROCOS. ꝓ Secutus sum meos ueteres libros, quibus in omnibus est Procos. non Proquaes. etsi nouum omnino uidetur, cum Proconsul adhuc in prouincia sit, alterum eodem nomine appellari. Nondum enim Bibulus de prouincia decesserat. fieri tamen potest, ut Caninius hic a Bibulo, breui discessuro, prouinciae praeponeretur, potestate in eum translata. & fortasse cognomen ei fuit Veientoni. nam Bibulus decedens prouinciae Veientonem praeposuit. ep. 3. lib. 7. Eodem modo Proconsul appellatur P. Sextius ep. 6. lib. 5. qui tamen quaestor cum Antonio proconsule in Macedoniam profectus erat. Quo item in loco mendum cum irrepsisset in recentiores libros, & Proquaestori legeretur, nos e septem antiquis Proconsuli reposuimus.

eadem.



eadem. pag. 61

**APAMEA** § probo coniecturam eorum, qui Epiphanea, legunt: quae erat urbs periculo Parthici belli multo propinquior, quam Apamea. De Apamea Strabo lib. xvi. & ait esse conditam a Seleuco Nicatore, Apameamq. ab eius uxoris nomine nuncupatam. eadem Phrygiarum urbiū maximam, & commune Graecorum, Italarumq. hospitium fuisse, conditamq. non a Seleuco, sed ab eius filio Antiocho, a se ipso dissentiens ait lib. xii.

eadem. pag. 61

**CETEROS** § Malim, Certos, ut est in duobus antiquis libris; ne sit communis omnium, sed quorundam tantum opinio de praesidio non deducendo. Alioqui paucis uersibus pugnancia loqueretur; cum subiungat, Omnia praesidia, commotus hominum non dubio sermone, dimisi.

eadem. pag. 61

**LAODICEAE** § hanc urbem numero inter Asiaticas tres διοικήσεις, Ciceronis imperio attributas; cum in eorum imperio solcret esse, qui Asiae praeerant. uide ep. 67. lib. 13.

eadem. pag. 62

**DRACHMIS** § Drachmarū octo genera fuisse, Attica, Euboica, Babylonica, Corinthiaca, Aegyptia, Aegynetica, Hebraica, Syriaea. Sed Atticam



Atticam duplicem inuenio, priorem usque ad Solonem obseruatam, posteriorem a Solone inductam, minore quidem pondere, sed eodem, ut arbitror, numero in mina. Solonis enim drachmae leuiiores antiquis erant quarta parte ipsarum antiquarum: ut nonaginta sex Solonis drachmae non plus ponderis haberent, quam septuaginta duae superiores. quod ex Plutarcho uidemur posse conijcere. ait enim, centum drachmarum a Solone minam esse factam, cum antea septuaginta trium fuisset. quibus uerbis non id, opinor, significat, pauciores in mina drachmas ante Solonem fuisse: (nam mihi non fit uerisimile, uariatum esse in Attica mina drachmarum numerum: licet Fannius, & Priscianus, inter se quoque dissidentes, ille septuaginta quinque, hic octuaginta drachmarum minam constituent) sed illud, centum drachmas, a Solone percussas, non plus habuisse ponderis, quam septuaginta quinque superiorum temporum. quod idem erat, si dixisset, e drachmarum septuaginta quinque ueterum pondere nouas centum a Solone factas. In quo illud operae pretium est animaduerti; cum dicimus in mina drachmas centum fuisse, drachmas quidem centum numero significari, sed pondere tantum nonaginta sex; cum in eo pondere centum ferirentur, quattuor centesimas lucrante officina. ita septuaginta duae pondere, numero erunt septuaginta quinque; & quadraginta octo, quinquaginta: & uiginti quattuor, uiginti quinque: cum drachma

minam



unam in uiginti quinque officina lucretur: quae sunt  
 duae in quinquaginta, & tres in septuaginta quin-  
 que, & quattuor in centum: quas modo cētesimas  
 quattuor appellauī. De hoc posteriore drachmarū  
 genere, a Solone inducto, loquitur Liuius lib. xxxi v.  
 cum ait, in tetradrachmo denarios fere tres incisse,  
 ex quo fit, ut, cum in mina sint tetradrachma ui-  
 ginti quinque numero, pondere autem uiginti quat-  
 tuor, idest drachmae centum numero, pondere au-  
 tem nonaginta sex, in eadem mina sint denarij ter-  
 uiginti quinque numero, pondere autē uiginti quat-  
 tuor, idest septuaginta quinque numero, pondere  
 septuaginta duo. Nec uero, quia Liuius addidit,  
 Fere, propterea quisquam dubitet. nam, cum mo-  
 netae pondus paullulum nonnumquam & apud  
 Graecos, & apud Romanos imminui non ignora-  
 ret, ideo ueritus, ne quando tetradrachmum, &  
 denarij tres officinarum fraude minas aequaren-  
 tur, de incerta re sibi plane affirmandum iure non  
 putauit. Cum igitur, & denarius, & antiqua dra-  
 chma aequae superent Soloninam drachmam quar-  
 ta utriusque parte, tertia uero Soloninae; patet,  
 eiusdem esse ponderis denarium, & antiquam dra-  
 chmam; & ex eo sequi, ut septem antiquae drach-  
 mae in uncia Romana feriantur, aequae ac denarij:  
 in uncia uero Attica denarij octo, aequae ac drach-  
 mae. Sed quoniam Solon cum drachmae pondus  
 minuit, id maxime secutus est, ut debitores onere  
 lenarentur aeris alieni; propterea drachmae pon-  
 dus



34 S C H O L I A  
dus in moneta dumtaxat imminutum, in medici-  
nis autem uidetur idem remansisse, ut a denarij pō-  
dere nihil differret. ideo scripsit Plinius lib. XXI.  
cap. ult. Drachma Attica denarij argentei habet  
pondus. fere enim Attica obseruatione medici utū-  
tur. Quod si ita est: mirari non satis possum, cur  
& Varro apud Plinium, & Festus, & Pollux de  
priori drachma, quasi adhuc in moneta etiam, non  
in medicina tantum, obseruaretur, ita loquantur,  
tamquam Solonina obsoleuisset. Aestimant enim  
talentum sex millibus denarium. qua aestimatio-  
ne denarium drachmae respondere perspicuum est.  
quod refellit Liviij locus, supra recitatus. Huius  
explicandae quaestionis non equidem rationem ul-  
lam inuenio: neque me uel Budaei doctrina, uel A-  
gricolae diligentia, uel omnino cuiusquam libri iu-  
uant. non enim affirmare ausim, quod interdum  
cogitavi, L. Sullam captis Athenis, leges, & in-  
stituta, simulq. drachmam a Solone inductā, im-  
mutasse: cum id neque Plutarchi, nec omnino cu-  
iusquam antiqui scriptoris testimonio cōprobetur.  
quare scrupulum saltem, qui me angit, occultan-  
dum non putavi, ut haberent alij, quo ingenium in-  
tenderent; cum ipse, quantum res postulat, prae-  
stare non possem. De mina uero, siue illa antiqua,  
siue posteriore, a Solone inducta, hoc amplius di-  
xerim. neutram librae Romanae aequalem ponde-  
re fuisse. antiqua enim grauior, posterior leuior,  
quam libra, fuit. probemus utrumque. In So-  
lonis



lonis mina denarios tantū fuisse septuaginta duos, cum de tetradrachmo ageremus, ostendimus. at in libra Romana denarios octuaginta quattuor Plinius, & Celsus ponunt. sunt igitur in libra Romana duodecim denarij plures, quam in mina Solonina. quod idem est, ac si dicas: libra superat pondere minā Soloninam septima sui parte, sexta Soloninae. In drachma uero antiqua si tantundem est ponderis, quantum in denario; quod iam probatum est: sequitur, ut, quemadmodum drachmae sunt in mina nonaginta sex, item denarij totidem in libra sint. quod falsum est. fuere enim tantum octuaginta quattuor. ita fit, ut libra pondere superetur a mina antiqua septima sui parte, octaua uero minae. Verisimile autem est, libram Romanam, quemadmodum ab Attica utraque mina differt, sic Euboicae respondere: quia maior Africanus, cum Antiocho regi tributum leges imponeret, talenta Euboica praescripsit; quasi nihil, aut certe parum Euboica mina differret a libra Romana. Concludimus igitur sic. Octo drachmae antiquae Atticae aequales pondere sunt octo denarijs; octo Soloninae, sex denarijs; octo Euboicae septem denarijs. Nunc, ut nihil omittatur, quod ad drachmarum cognitionem pertineat, omnes omnium gentium aestimabimus, apposita moneta Romana, primum uetere, deinde recentiore.

Drachma Attica, ante Solonem, eiusdem fuit cum denario ponderis, & ualuit asses sedecim, id

c 2 est de-



est denarium unum. loquor enim de denario posteriore, ad sedecim asses aucto, bello Punico secundo. asses uero sedecim, baiocci Romani sunt duodecim, & sex septimae alterius baiocci, (de eo loquor baiocco, qui constat ex quinque quadrantibus.)

Drachma Solonis, asses duodecim: baiocci nouē, & fragmenta, eadem proportionē.

Euhoica, Romanae unciae octaua pars, asses quattuordecim: baiocci undecim, & fragmenta.

Babylonica, asses sedecim cum triente: baiocci tredecim, & fragmenta.

Corinthiaca, asses sedecim cum besse: baiocci tredecim, & fragmenta.

Aegyptia, asses decem, & octo, cum besse: baiocci quindecim.

Aeginetica, & Hebraica civilis, asses uiginti: baiocci sedecim, & fragmenta.

Hebraica sacra, asses quadraginta: baiocci triginta duo, & fragmenta.

Syriaca, asses quadraginta octo: baiocci triginta octo, & fragmenta.

eadem. pag. 62

CCCCIOOO: 3 centum millibus: quae sunt quadraginta millia sestertiorum: si modo drachmae Atticae sunt, non Syriacae: quod interdum dubitauimus: cum hic Sallustius e Syria scripserit, in qua Bibuli quaestor fuit. haec porro summa duodecim scutatorum millia nostratis pecuniae conficiet. Harum notarum, numerum indicantium, quae fuerit



fuert olim origo, etsi ante multos annos exposui  
in commentario epistolarum ad Atticum: tamen  
hic me locus admonet, ne silentio praetermittam.

Numerorum notas primum quinto loco uete-  
res uariarunt, deinde decimo, mox quinquagesi-  
mo, tum centesimo, eodem in reliquis ordine con-  
seruato, mutato numeri signo quoties numerus a  
quinario ad duplum, & a duplo rursus ad quina-  
rium peruenisset.

Prima nota fuit, *i*, unus, usque ad quattuor  
iterata.

Secunda nota, *v*, quinque, in quinario primum  
numero uariata.

Tertia, *x*, decem, in duplo quinario, ut iam di-  
xi, mutationem recipiens.

Quarta, *L*, quinquaginta, aucto post tertiam  
notam, idest post, *x*, in quincuplum numero.

Quinta, *c*, centum, duplicato quinquagenario.

Sexta, *i c*, quingenta, & hic, quincupli ra-  
tione seruata.

Septima, *c i c*, mille, habita dupli ratione.

Octaua mutatio fuit, cum ad quinque millia  
peruenissent. nam, ne toties *c i c* iterarent, his  
notis usi sunt, *i c c*.

Nona mutatio, a quincuplo in duplum, recepit  
has notas *c c i c c*, decem millia.

Decima, a duplo in quincuplum, *i c c c*,  
quinquaginta millia.

Undecima, & ultima, a quincuplo in duplum,

*c 3 c c c i c c c*,



CCCCIꝰꝰꝰ, centum millia.

Nec ultra notarum mutatio progressa est. non enim ueteres, ut ait Plinius, ultra centum millia numerabant. quod si ducenta, uel trecenta, aut quadringenta millia significari oporteret; has notas, CCCIꝰꝰꝰ, bis, ter, quater, & si opus esset, saepius iterabant. cuius exempla moris & in libris, & in antiquis lapidibus exstant. sunt igitur notae omnino undecim uariae, deinceps a nobis demonstratae, tamen iterandae,

I, unus:

V, quinque:

X, decem:

L, quinquaginta:

C, centum:

Iꝰ, quingenta:

CIꝰ, mille:

Iꝰꝰ, quinque millia:

CCIꝰꝰ, decem millia:

Iꝰꝰꝰ, quinquaginta millia:

CCCCIꝰꝰꝰ, centum millia.

Quam cognitionem legentibus non iniucundam fore, sum arbitratus.

Hoc etiam adiungam, a prima nota, I, ceteras omnes fluxisse. nam, V, duae primae notae sunt, infima parte coniunctae. item, X, est quinary numeri nota duplicata, cum duae, V, in acuto angulo coniungantur. at, L, quid est, nisi prima illa nota, I, recta, & altera prostrata, simul iunctae?  
quod



quod si addideris in summa parte aliam primam  
 notam, item prostratam: fiet [ , centum. non enim  
 priscis temporibus, pro centum, scribebant, C,  
 quod ad aetatem nostram permansit, sed, [: quae  
 erant tres primae notae consociatae, una recta,  
 duae prostratae, cum recta coniunctae, una in su-  
 periore parte, altera in inferiore. Quingenta uero  
 fecerunt, addita ad tres notas, quas proxime no-  
 minavi, quarta recta, cum duabus prostratis con-  
 iuncta, hoc modo, | — | . qua figura duplicata,  
 fecerunt mille, hoc modo, | — | — | : unde po-  
 stea librariorum arbitrio, uariae notae, quae mille  
 significarent, factae sunt, quarum nonnullas osten-  
 demus. nam ex | — | — | , fieri coeptum est,  $\Phi$ ,  
 &  $\omega$ , & C I C, & C I C, unde M, deriuatum  
 quo pro mille hodie quoque utimur: cum olim no-  
 ta fuerit, non littera.



# IN. LIBRVM. III

## EPISTOLA. I

P A G. LXVII

**Q**UONIAM tu ita uis, & tibi placet officijs coli amicitiam nostram: quod si tibi non placeret, facerem inuita Minerva. qui si efficies, ut idem tuis quoque propinquis placeat; (tacite Appium hortatur, ut reliquos Clodios, ob ueteres cum P. Clodio inimicitias infensos, sibi reconciliet) eandemq. Minervam, quam abs te non inuitam habeo, ab ipso accipiam: ego plane hoc non Mineruae magis, quam tibi, referam acceptum, & iure eam non tam Pallada, ut uocatur, quam Appiada, de tuo nomine, nuncupabo. Iocum autem Cicero quaesivit in nominibus similiter desinentibus. In Mediceo libro Graecis litteris maiusculis, ΠΑΛΛΑΔΑ, scriptum est.

## EPISTOLA. III. pag. 69

**P**RO nostra constantissima uoluntate, & sic quinque libri ueteres: duo, & Mediceus, Pro nostra consociatissima. ut uoluntas utriusque, post reditum in gratiam consociatissima dicatur. Sin, Constantissima, retinemus: utriusque parem in constantia



stantia uoluntatem, quae post reditum in gratiam officijs mutuis declarata fuerat, significari credamus. quam sententiam confirmat illud ep. 13. lib. 2. Ego Appium ualde diligo: meq. ab eo diligi statim coeptum esse, ut similitatem deposuimus, sensi. nam & honorificus in me consul fuit, & suauis amicus, & studiosus studiorum etiam meorum. mea uero officia ei non defuisse, tu es testis. Constantiam suam infra quoque, ep. 9. Cicero nominat. Quod quisque magis probat, id sequatur.

eadem. pag. 70

C. PONTINIUM legatum & praetorium, ac triumphalē. hunc πομπτινον, & πομπτινον Graeci libri nominant: ex Latinis alij Pomptinū, alij Pomitinum, nonnulli, quos secutus sum, Pontiniū: ut inter Romanas gentes, quae in Ius desinebant, agnoscatur. Ciceronis, Ciliciae proconsulis, quaestores fuere L. Mescinius, Cn. Volusius, C. Coelius; legati, Q. Cicero, eius frater, Cn. Pontinius, M. Anneius, L. Tullius, tribunus mil. Q. Fufidius; praefectus fabrum, Q. Lepta; scriba, M. Tullius; accensus, Pausanias; interpres, M. Marcius. De quaestore Mescinio, ep. 19. & 20. l. 5. ep. 26. l. 13. ep. 6. l. 16. De Volusio, ep. xi. l. 5. ad Att. De Coelio, qui paucis diebus ante, quam Cicero decederet, in prouinciam uenit, ep. 19. l. 2. & ad Att. ep. 5. l. 6. De legatis, ep. 4. l. 15. De tribuno mil. ep. 12. l. 13. De praefecto euocatorum, ep. 6. l. 3. De praefecto fabrum, ep. 7. lib. 3. De scriba, ep. 20



ep. 20. l. 5. De accenso, ep. 7. h. l. De interprete,  
ep. 54. l. 13.

EPISTOLA. IIX pag. 80

CUM AD urbem essēs, & antea, Iffes: nos  
Esses. Esse autem ad urbem dicebantur, qui cum  
potestate provinciali aut nuper e provincia reuer-  
tissent, aut nondum in provinciam profecti essent.  
sic enim scripsit Asconius. eoq. modo Cicero, Sal-  
lustius, & alij eiusdem aetatis locuti. Solebant  
autem, qui ob res in provincia gestas triumphum  
peterent, extra urbem expectare, donec, lege la-  
ta, triumphantes urbem introire possent. & de  
triumpho Appium cogitasse, ex ep. 10. cognosci-  
tur: ne triumpharet, accusatione Dolabellae fa-  
ctum est. ep. 6. lib. 8.

eadem. pag. 84

QUOD TE putem nolle dici; & recte: nec  
aliter est in antiquis libris. nam illa inferiora  
subiungit Cicero ad Appium consolandum: Hos  
ego sermones. &c. Quis autem non laborasse  
Appium credat, si suae cohorti malediceretur?  
debet enim, qui provinciae praeest, non ipse tan-  
tum uacare culpa, sed suos quoque praestare.  
quod Cicero fratrem suum, Asiae proconsulem,  
diligenter monet in illa praeclara de officio pro-  
consulis epistola.

eadem.



eadem. pag. 84

**LAEDI** se putat; & notat homines prouinciales, qui non eosdem e Ciceronis institutis fructus caperent, quos ex Appij administratione capere consueuerant. Huc spectat id, quod sequitur: Liberalitas tua latius in prouincia patuit. Et illud paullo post: Non debent mirari homines, me esse acerbum sibi, ut sim dulcis mihi. Alij legendum arbitrantur: Laedit te putat: discedentes primum ab antiquis libris, deinde etiam, ut mihi uideor ostendisse, a mente Ciceronis.

## EPISTOLA. X pag. 89

**A ME INVITISSIMO** & sic malo, quā, Inuitissime. nam Pontinium non libenter discessisse, uerba illa satis ostendunt, Maximis rebus suis coactus. nunc significationem suae uoluntatis, & amoris in Pontinium Cicero dat, cum inquit, A me inuitissimo.

eadem. pag. 89

**SI VERO** efficis, ut censores creentur; & quod si accidat: fore non dubitat, ut censor ipse Appius creetur. itaque subiungit, Et si ita gesseris censuram. creatus autem est cum L. Pisone, in quem exstat Ciceronis oratio. ep. 13. l. 8. de Diuinatione lib. 1. Dio lib. XL. Oratio contra Sallustium.

eadem pag. 91

**SI CLAM**, magis aperte inimicus esse? &  
si quis



si quis est, qui se ueteribus ita libris addixerit, ut locum coniecturae nullum relinquat; legat hic, Sic iam magis aperte inimicus essem. nam ita diserte ac plane in antiquioribus libris, etiam in illo Mediceo, scriptum est. sin perquirenda ueritas est, & licet a mendosis incorrupta distinguere: dubitandum, opinor, non erit, quin hic pro, Sic iam reputatur, Si clam; pro Essem, Esse. quod olim a singulari uiro, Petro Danesio, Parisiensi, Episcopo Vaurensi, quem ab adolescentia mea dilexi uehementer, & colui, acute animaduersum, ita probauit, ut imprimi uoluerim. neque haec postea coniectura hominibus eruditis, cum & ipsi has epistolas emendarent, displicuit.

eadem. pag. 91

AD ME adire quosdam memini, nimirum ex Epicteto, qui dicerent, & quis non uidet, abundare illud, Nimirum ex Epicteto? quod uitiū nec olim in nostris libris haerere passus sum; & nunc eo magis in sententia confirmor, quod a ueteribus octo libris nostram opinionem uideo comprobari. Praeterea non ex Epicteto, sed ex multis ciuitatibus ad Ciceronem adire, ut immoderatis sumptibus leuarentur. quod ep. 8. demonstratur his uerbis: Apameae cum essem, multarum ciuitatum principes ad me detulerunt, sumptus legatis decerni nimis magnos.

eadem. pag. 94

QVAE a me perfecta, quaeque instituta sunt,



sunt, cognosce. § alij, *Profecta*. mihi placet, *Perfecta*: nec tamen placet sine auctoritate ueterrum librorum. & recte coniunguntur; Quae perfecta iam, quaeq. instituta sunt. Cognosce, dixit, quia cum litteris commentarium mittebat de rebus a se pro Appio actis, & agendis. partē quidem ipsius epistolae desiderari nullam puto. quamquam alij contra sentiant.

## EPISTOLA. XI pag. 97

PROAVO § Ap. Claudio Caeco, qui censor aquam Claudiam in urbem perduxit, anno urbis CDXLI. Sed is antiquior, quam proauus. parum enim subtiliter Cicero tēporum rationem examinat. Quid, quod idem in huius Ap. Caeci mentionem non solum ab historia discrepat, cum appellet hic proauum, qui longiore distat interuallo, sed ipse etiam sibi non constat: nam quem in hac epistola proauum, in oratione de haruspicum responsis abauum Clodij uocat. Ne id quidem sentis, inquit, conuiuentes illos oculos abauī tui magis optandos fuisse, quam hos flagrantēs sororis? Fuit autem Ap. Caecus P. Clodij non proauus, aut abauus, sed tritauius: quod ex fastis maxime Capitolinis licet colligere. similis avis opuscula Ciceronis in oratione pro domo cognoscitur. C. Antonius, inquit, bona Q. Metelli, aui tui, Q. Metelle, consecrauit. Metellum Macedonicum, (hunc enim significari,



gnificari, ex Plinio lib. 7. cap. 44. & epitome Li-  
uiana lib. 59. cognouimus) auum appellat Q. Me-  
telli Nepotis, qui tum consul erat: cum proauus  
eius, non auus, fuerit. nam Macedonici filius Ba-  
learicus genuit Nepotem, patrem huius Nepotis,  
quem Cicero appellat: quod Pedianus in commen-  
tario Cornelianae, & fasti etiam Capitolini de-  
clarant.

EPISTOLA. XII pag. 99

ANTE diem III. non. 3 perinde est, ac si  
dixisset, III. non. id ex libri XVI. epistola V.  
ad Tironem intelligi facile potest. Ante diem III.  
non. ueteres dicebant, idest, die tertio ante nonas.  
nam cum dicitur, III. non. concisa locutio est:  
quae integra esset, si diceres, III. die ante no-  
nas: qua non utebantur antiqui, sed eius loco, An-  
te diem III. nonas.

IN. LI-



# IN. LIBRVM. IV

## EPISTOLA. IV

P A G. CIIX

**N** E hominis quidem caussa negaturum. § *Alij legunt, Ne ominis quidem: quibus assentiri nullo modo possum. dixit enim Caesar; se non esse roganti senatui, ne ipsius quidem Marcelli caussa, a quo grauiter esset offensus, negaturum. quamquam, aiebat, in me fuerit acerbior: tamen, ne hac quidem caussa, senatui deprecanti eius reditum negabo, non tanti apud me erit Marcelli ipsius iniuria, quanti senatus uniuersi consensus, & deprecatio. Ad hunc locum pertinet illud ex ep. 6. lib. 6. Marcellum, cui maxime succensebat, cum summa illius dignitate restituit.*

eadem. pag. 109

**A**CCEDERET. § *accedere ad se supplicem senatum, Caesar passus est: eundem accidere supplicem ad pedes suos, passus certe numquam esset. alia enim C. Marcelli, fratris reditum deprecantis, alia senatus ratio fuit: quem supplicare quidem pro M. Marcello decuit, abijcere se ad Caesaris pedes, oblitum suae dignitatis, haudquaquam decuit: nec Caesar ipse, qui omnia quidem suae potestatis esse, speciem tamen adhuc aliquam reip. manere*



manere uellet, indignitatem illam tulisset. Quare nihil mutandum.

EPISTOLA . V. pag. III

C R E D O, § Ironia: quasi credendum minime sit, ob ea, quae sequuntur. nec abest indignationis quaedam uis, cum haec duo coniunguntur, An credo. quod enim per interrogationem pronunciatur, in eo simplex Ironia non est. Sic Lucretius. An, credo, in tenebris uita ac maerore iacebat? Legi enim posset simplici ironia: At illius uicem, credo, doles.

eadem. pag. III

E T nos saepe incidimus, § Hoc non pendet ab eo, Necesse est; sed per se consistit, interpositum, ut se quoque incidere in eam cogitationem Sulpicius ostenderet. Quod quia parum est animaduersum, propterea legendum alij putauerunt, Ut, pro Et, contra ueteres omnes libros, quos quidem ego inspexerim; multis autem, amicorum studio & benignitate, nunc utor.

eadem. pag. III

P A R E R E T, § Pepererat: sed infans obiit, de quo sic Cicero ad Att. ep. 16. libri 10. Tullia mea peperit puerum ἐπαιμνία ὄν. quod ἔτόκον, gaudebam: quod quidem est natum, perimbecillum est. Alij legunt Pararet. decem octo libri habent, Parerent; unus omnino, Pararet. mihi Pareret esse



esse rectius & librorū cōsentientium auctoritas & sententia persuasit. Optandum, inquit, uidetur ut si lios pareret, quos aliquando cum florentes cerne-  
rent, laetaretur.

eadem. pag. III

**LIBERALITATE** § Dissidentibus an-  
tiquis libris: quorum alij Liberalitatem, alij, Liber-  
tatem habeant, sententiam consului, quae mihi Libe-  
ralitate probare magis uisa est. Quo nomine non  
largitio tantum, sed officium quodlibet, omnisque  
benignitas indicatur, ut ep. 9. lib. 1. in extremo: Ad  
tuam liberalitatem, qua te scio libentissime solere  
uti, pertinet, te sine ulla mora provinciam successo-  
ri concedere. Quamquam ex Libertate, etiam ali-  
quid elicio sententiae: ut ostendat Sulpicius, nemi-  
nem amicis iam nauare operā, aut studium posse,  
cum libertas omnibus adempta sit.

eadem. pag. III

**UTERENTVR?** § Omnino hic diu me torfit  
anceps dubitatio; cū in 8 scriptis libris Vti, uiderem  
non Uterentur. Nam, etsi non est, unde uerbum Vti,  
commode pendeat; cum ab illo, Possent, interposita  
bonorum mentione disiungatur; tamen, quia plurimi  
apud me solet esse ueterum exemplarium testimo-  
nium, haerebā, haesiq. tamdiu, donec in libro perā  
tquo Caroli Sigonij, plane & diserte scriptum ui-  
di, Uterentur; quod in hoc toto uerborum ordine, at-  
que ambitu locum habet aptissimum.

d Si



SI QVIS nostrum interijt, } Alijs placet, Nostrorum: ut de propinquis dicatur. sed mutare non est necesse. eodem enim sententia redit, si, Nostrum, legimus cū omnibus antiquis libris. nam etsi de uniuerso hominum genere dictum sit, Si quis nostrum interijt; pro, cum accidit, ut homo aliquis intereat: ad eos tamen homines referri, qui nobis cari sunt, quis non intelligit? cari enim sunt non omnes omnibus, sed omnes suis: & quia nemo fere est, qui carus alicui non sit: ideo generatim recte Cicero dixit, quod deinde in partes diuiditur: Si quis nostrum interijt, indignamur.

eadem. pag. 112

ETIAM TV ABHISCERE BVSA NIMVM AD COGITATIONEM tuā auoca. } Nescio quomodo mendum huc irreperat, quod uulgatos omnes libros occupauit, ijs tantum exceptis, quos olim edidit pater meus, quem pro eximia conseruandae antiquitatis cura laudare satis nemo possit. Ac mutationem quidem esse factam eo magis miror, quod omnes libri ueteres, quotquot umquam uiderim, habeant Ad cogitationem; non, Ac cogitationem, ut impressi. Restituamus igitur ueritatem uel negligentia, uel opinione corruptam. Fac, inquit Sulpicius, quod ego feci; qui cum opida, quondam florentissima, prostrata ac diruta uidissem, inde animum ad cogitandum auocaui; reprehendiq. communem errorem, quod indignamur si quis nostrum interijt, aut occisus



occisus est, quorum uitae exiguos natura terminos circumscripsit, cum uno loco tot opidorum cadauera proiecta iaceant. Haec me cogitatio ualde confirmauit. etiam tu, cum tot uiri clarissimi uno tempore perierint, imminutum ualde sit imperium, provinciae omnes conquassatae; ab hisce rebus, ut ego ab opidorum excidio, ad cogitationem animum auoca, nec unius mulierculae tantopere commouearis interitu; sed ea potius reminiscere, quae tua persona digna sunt. Ad cogitationem tuam, dixit, pro, ad eam cogitationem, quae ad te ipsum pertinet; cum illa de tot uirorum clarissimorum interitu, de imperij diminutione, de provinciarum clade, non de ipso proprie, sed aliena cogitatio fuerit. ab hisce igitur rebus ad cogitandum de te ipso animum conuerte.

## EPISTOLA. IX, pag. 120

NE suorum quidem, } per quos uicit, quo aequius ferre debemus, si minus nostro utatur. Hanc sententiam plane comprobant ea, quae sequuntur.

eadem. pag. 120

CONIUNCTVM esse periculum suo cerneret, } alij hanc lectionem uidentur suspectam habuisse. nos eam in uetusto libro Io. Scalae, & in alijs antiquis inuenimus. nec dubia sententia.

eadem. pag. 121

INCERTIS in rebus } cum incerta uictoria esset: cum bellum gereretur.

d 2

EPI-



## EPISTOLA. XIII pag. 126

NON modo certa res ulla, & alijs, Nulla, mihi, Vlla, placet. Sequor enim & meos uetetes nouem libros, & sententiam ipsam, atque etiam consuetudinem Latinae linguae. Non modo certa res ulla, dixit, pro, Nedum certa res ulla: ut ad Lentulum ep. 9. lib. 1. Non modo praemijs, sed ne periculis quidem compulsus ullis, ad eorum causam me adiungerem. Quo loco plura huius generis exempla collegimus. Tantum, inquit, abest, ut mihi certa res ulla, ut ne genus litterarum usitatum uenerit in mentem.

eadem. pag. 128

UT te horter, & obsecrem, & nihil muto. sic enim in octo uetustissimis exemplaribus inueni. aliorum tamen lectionem non improbo: etsi eam in libris scriptis ipse quidem nondum inueni.



# IN. LIBRVM. V

## EPISTOLA. II

PAG. CXXXV

**Q**UOD te audisse credo, & patet  
sententia: nec discrepant mei uete-  
res libri, quibus in omnibus plane  
legitur, Credo. At in uno Medi-  
ceo libro est, Certo, non, Credo. ex  
quo alijs orta de mendo coniectura. mihi uerisimi-  
le non fit, reliquos omnes libros ab uno illo esse de-  
scriptos: cum & ab illo, & saepe inter se dissen-  
tiant. nec uero librum ullum tam antiquum esse ar-  
bitror, qui omni prorsus uacet mendo: quippe cum  
ne illa quidem interdum, quae a nobis cogitata ip-  
si nostra manu scribimus, emendata satis esse ui-  
deamus.

eadem. pag. 135

**I**N aliquo magistratu & ne minimo quidem.  
sic in meis antiquis libris. nec sane uideo, cur quid-  
quam mutetur. aut si mutandum, placeret, Mini-  
mo magistratu: ut legebat Vbaldinus Bandinellus:  
cum sit in Mediceo libro, In animo magistratu.  
sic opponerentur, Consul, &, Minimo magi-  
stratu.

4 3 EPI.



## EPISTOLA. IV pag. 138

SVM coactus: } malo, Sum conatus, ut est in quattuor antiquis libris: nam, Coactus, cum proxime dictum sit, Inductus, sententia non desiderat. Conatus autem significat, non inuitum, Ciceronē scripsisse, inductum eius oratione mitissima.

## EPISTOLA. VI pag. 140

PROCOS. } Sic omnes antiqui libri; eadē ratione qua Proconsul Sallustius in ep. 17. lib. 2. inscriptione nominatur.

eadem. pag. 141

OMNINO semissibus magna copia est: } Et Medicus liber, & reliqui habent, Omni, non Omnino; uno excepto, qui Thomae Leonici fuit, doctissimi hominis, in quo est Omnino. Omni, pro Cuilibet, duriuscule positum uidetur. nam illud ep. 3. lib. 7. ad Atticū: Hic omnia facere omnis, ne armis decernatur; potest esse quarto casu multitudinis; quare, Omnino, malui. consensu tamen antiquorum exemplarium indicato. Deesse, inquit, nummi non possunt, si quis usuras semissas uelit pendere, id est, senos annuos, pro centenīs. Haec autem civilis & moderata fuit usura; grauissima uero omnium, quae legibus concedebatur, ea fuit; cum duodeni annui pro centenīs; quae cētesima uocabatur. in quo dissentire cogor a doctis hominibus, qui affirmant, unciarium fenus leuissimum



138  
constat,  
Coactus,  
centia non  
non inuicem  
atque non  
pag. 140  
inqui lib.  
ep. 17.  
ma copia  
bent, Om  
e Leonio  
mo. Om  
etur, non  
ia faciem  
carro cap  
conspic  
cato. Del  
suras sem  
pro cent  
miseri;  
uerebatur  
is; qui  
er a lib  
ma lib  
pau

num fuisse; quod, ut arbitror, grauissimum fuit  
idemq. cum centesima. Usurarum enim quaedam  
nomina mensuram solutionem, quaedam annuam  
significant. Mensuram; ut centesima, unciaria,  
semiunciaria: annuam; ut semis, triens, bes. Nam,  
si centesima, uel unciaria, uel semiunciaria, se-  
mel in anno soluerentur, quis tantulo quaestui pe-  
cuniam suam collocasset? Rursus, si bes uel semis,  
uel etiam triens, usura mensura esset; quis tanta  
rei familiaris iactura, fenebrem pecuniam accipe-  
re uoluisset? Opinor igitur unciarium fenus, & cen-  
tesimam idem esse; ut ratio habeatur mensurae  
solutionis, non annuae. Semiunciarium autem idē  
cum semissibus; ut in semissibus annua solutio spe-  
ctetur: in semiunciaro fenore mensura. Propte-  
rea lib. 1. ait Tacitus, xii. tabulis sancitum esse,  
ne quis unciario fenore amplius exerceret; cū an-  
tea ex libidine locupletum agitaretur: deinde ro-  
gatione tribunicia usuram ad semuncias redactā.  
Nam si xii. tabulae annum fenus unciarium  
significassent; etsi Tribuni pleb. postea de semiun-  
ciario, item annuo rogationem tulissent: graues  
admodum postea semisses usurae uisae essent, quas  
tamen ciuiles ac modicas fuisse, tum Plin. lib. 14.  
cap. 14. tum alij satis ostendunt. Grauiissima uero  
centesima, quae tamen legibus concedebatur; su-  
pra uero nō licebat. Ideoq. cū trientem, semis, bes-  
sem nominari uidemus, nō de mensura, sicut in un-  
ciario fenore, sed de annua dictū usura existimare  
debemus.

d 4



56      S C H O L I A  
debemus. alioqui non fuisset grauiſſima omnium  
centefima.

EPISTOLA. IX pag. 146

CUM Vardaeis & Dalmatiae populis; a quibus olim uastatam Italiam, auctor est Plinius li. 3. cap. 22. Antea, Vardacis: nos olim, Vardaeis, restituimus.

EPISTOLA. X pag. 147

ACTIONE & actione legis: ut actio furti, & similia. Libri ueteres, Actiones: unus Sigonij, Actores. mihi uel, Actione, ut imprimi uolui, una littera S abiecta, uel, Actores, placet. nam Actiones, uacare mendo non arbitror.

EPISTOLA. XII pag. 153

IGNOTIS nota faciebant & Ignotis, posuit non pro ijs, qui ignorarentur, sed qui ignorarent illa simulacra: ut id, quod patitur, accipiat pro eo, quod agit: antiquae: nam & Plautus in Pseudolo: Noui: notis praedicat. pro, ijs, qui nonerunt. Et noster in oratione pro Coelio: De dignitate, Coelius notis, ac maioribus natu, etiam sine mea oratione, tacitus facile ipse respondet. Et in Verr. lib. 6. Linius lib. 3. Notos gratia eorum, turbant



*bam indignitas rei uirgini conciliat. Et Curtius:  
Ignoti iumenta agebant.*

## EPISTOLA. XIV pag. 157

*QVAM* a me discesseras, & cur hoc mendo-  
sum suspicati quidam sint, quibus placuisse uideo,  
*Quam* discesserat, non equidem intelligo; praeser-  
tim cum antiqui omnes libri, quibus quidem ego  
nunc utor, cum uulgata lectione consentiant.

## EPISTOLA. XIX pag. 165

*R V F O.* & cognomen hoc esse L. Mescinij, Cice-  
ronis antea quaestoris in Cilicia, iam pridem existi-  
maui, adductus in hanc opinionem epistola sequen-  
ti: in qua tum de rationibus agitur ab eo referen-  
dis, quod quaestorij muneris erat, tum etiā Ruffi fra-  
ter M. Mindius nominatur: & idē L. Mescinij fra-  
ter appellatur in ep. 26. lib. 13. Nunc laetor opinio-  
nem confirmari meam uetere argenteo nummo, ita  
inscripto, L. MESCINIVS. RVFVS. is nummus  
est apud uirum doctissimum, Episcopum Ilerden-  
sem, Antonium Augustinum. Alterum postea  
nummum praestans uir Latina & Graeca lingua,  
omniq. liberali doctrina perpolitus, Fuluius Ursi-  
nus mihi ostendit. De Mescinio autem quaestore  
non solum in ep. 26. lib. 13. cuius proxime testi-  
monio sum usus, uerum etiam in ep. 6. lib. 16. &  
ijs



ius ad Atticum fit mentio. alter Ciceronis quaestor, qui serius in provinciam iuit, C. Coelius fuit, is ad quem scribit ultimam epistolam libri secundi.

eadem. pag. 167

QVARE TU, & ita in impressis: sed in antiquis, *Que tu*: aut, *Quae tu*: quo modo legitur in libro Petri Bembi, Cardinalis omni laude cummulati, & in libro Mediceae Bibliothecae. docti locum diligentius considerent: ego, hoc notare, mei officij esse duxi.

EPISTOLA. XX pag. 167

M. TULLIUS, scriba meus, & Ciceronis libertus, fortasse Laurea cognomento, cuius egregios uersus, in Ciceronis Academiam scriptos, recitat Plinius lib. 31. cap. 2. quod si quis dixerit hunc esse M. Tullium Tironem; qui & ipse, libertate donatus, patroni praenomen, & nomen assumpsit: negabo: quia Tiro liberatus est posteaquam e provincia ad urbem Cicero redijt: at ille scriba, qui rationes in provincia tractauit, libertus omnino fuit. Scribas enim seruos non fuisse, ex eo constat, (ut alia, quae multa occurrunt, argumenta praeteream) quod Romanis omnes nominibus appellatos uidemus.

eadem. pag. 168

MEO seruo scriba, & dixi iam, scribarum ordinem e cinibus Romanis fuisse: quare seruus hic



hic appellatur, non quia seruiret, (iam enim liberi hominis praenomine, & nomine, M. Tullius dictus est) uerum memoria praeteriti temporis, quo apud Ciceronem in seruitute fuerat. & fortasse ita locutus Cicero, ut ipsa referret Rufi uerba, exprobrantis quod rationes ita Cicero ad aerarium retulisset, ut a seruo suo scriba eas accepisset.

eadem. pag. 168

C v i potius id negotij darem, quam darem. § sic omnes, quos ego uiderim, scripti libri, tribus exceptis, duobus M. Antonij Maffei, tertio, quem uir doctissimus, idemq. omnium humanissimus, Io. Vincentius Pinellus, emptum ex Leonici Thomaei bibliotheca, mihi dono dedit. in ijs non est, Quam darem, sed, Quam tibi. quod mihi tamen (ut, quod sentio, dicam) subabsurdum, atque etiam falsum uidetur. non enim id ei Cicero negotij dedit, sed scribae suo: cui deinde Rufus fratrem suum adiunxit. quare crediderim illud, Quam darem, siue, Quam tibi, abundare, additum ab imperito, qui putaret id per se consistere non posse, Cui potius id negotij darem. quod ita consistit, si subaudiatur, Quam Tullio, scribae meo. adiunat opinionem nostram Maffei liber, in quo tantum illud est, Cui potius id negotij darem: in margine autem, Quam tibi.

eadem. pag. 168

CONSOLVITAS § sic antiquus liber Fuluij, & duo Maffei, et Medicus; alius, Cōsulatas; tres, Consolatas:



*Consolatas: unus Maffei, Consolidatas. quod mihi non placet. primum offendor insolentia uerbi: deinde, quatenus ista consolidatio esse potuit? Cōsignatas, malim, aut Conlatas. nam eas cum quaestore conferri in provincia oportere, & conlatas iam esse, dixit. fero tamen, Consolatas, non solum quia sic est in tribus antiquis libris: uerum etiam, quia pro, absolutas, accipi potest: ut a, Confectas, ita differat, quemadmodum differt, Absoluere, a Perficere. unde lib. 2. de nat. Deo. In omni natura necesse est absolui aliquid, aut perfici.*

*eadem. pag. 169*

*LEGATVM meum praefectumq. & alij legunt, Praefectumq. Q. Leptam. nos olim sustulimus, Q. Leptam, auctoritate quidem ueteris libri, sed multo etiam magis ratione adducti. cur enim Cicero praefecti sui nomē ponat, legati praetermittat? quasi uero ad alienum & ignotum hominem scriberet, non ad quaestorem suum, qui & legatos, & praefectum fabrum, & uniuersam proconsulis Ciceronis cohortem optime nouerat. praeterea res hic agitur Ruso notissima, de qua etiam ipse ad Ciceronem scripserat: ut ei praedum Valerianorum nomina significari, nequaquam necesse fuerit. Vnde igitur praefecti nomen huc irrepsit? Notum est hominibus emendandi peritis, quanta sit facta labes in optimis libris eorum inscitia, qui cum libros describerent, uerba interpretantia,*



tantia, a studiosis adiecta, non agnoscentes, omnia permiscebant. eodem errore, ut opinor, inter uerba Ciceronis receptum est, Q. Leptam: cum nescio quis, eum in Cilicia praefectum fabrum cum Cicerone fuisse, ex ep. 7. lib. 3. didicisset. adscribere legati nomen non potuit: quia conijcere facillimum non erat, quis ex quattuor cum praefecto praes Valerij fuisset. quattuor autem fuisse Ciceronis legatos, Q. fratrem, C. Pontinium, M. Annecium, L. Tullium, ex ep. 4. lib. 15. & alijs cognoscitur. Accedit auctoritas ueterum duorum librorum, unius Vincentij Riccij, quo sum usus adolescens, ut eo tempore in scholijs meis testatus sum; alterius, quo nunc utor, M. Antonij Maffei, a quo abest praefecti nomen. tertius est apud me liber, cuius in margine scriptum uideo, Q. Leptam: cum a continuatione uerborum Ciceronis absit.

eadem. pag. 169

PRUDENTIAE, cum rem a me non insipienter excogitatam quidem putas. 3 sic plane in omnibus meis ueteribus libris, duobus exceptis, in quibus est, Non insipienter quidem excogitatam: & uno, a quo abest Non. uerum ne sic quidem locus mendo uacat. non magna mutatio fiet, si legatur: Ne insipienter quidem excogitatam. nam quod nonnulli legunt: Non insipienter excogitatam, ne cogitatam quidem putas: id ego, quod ad sententiam attinet, non improbo: sed quia plus additur, quam emendandi moderata ratio



rio postulet, malui notam apponere indicem errati,  
quam ex fallaci, & lubrica coniectura, immodico  
praesertim additamento, librum immutare.

eadem. pag. 169

NAM DE logeo } Particula, Nam, saepe le-  
ctorem commodè traducit ad diuersam sententiam.  
ut hic, & infra, Nam de HS nongentis millibus.  
Et ep. 9. lib. 1. Nam de Appio, quod scribis, sicuti  
de Caesare, te non reprehendere: gaudeo tibi cō-  
siliū probari meum. Et ep. 1. lib. 7. Nā quid ego  
te athletas putem desiderare? Et ad Att. ep. 10.  
lib. 3. Nam quod me tam saepe, & tam uehemē-  
ter obiurgas. Et eodem libro, ep. 15. Nam quod  
purgas eos. &c. Logeum fuisse sanum arbitror,  
in quo pecuniae deponerentur: ubi pecunia quoque  
illa, in prouincia Ciceronis exacta, a Ruso quaes-  
tore iussu Ciceronis deposita est auctore Pompeio.  
Infra res eadem attingitur.

eadem. pag. 170

PARVUM gratiosum est, } sic libri ueteres  
quinque: alij, Gaiusum est. utrumque mendosum.  
nam, Gratosum, de inanimatis rebus non dicitur:  
sed Gratosi homines appellantur. Nec, Gaiusum  
est, politus litteris quisquam probauerit. Medicus  
liber, Gaiusum. Corrado placuit, Gratum uisum:  
nobis olim, Prouisum: quod nec a Grauisum lon-  
ge distat, nec sententia caret. nam in eo dicit pa-  
rum esse prouisum, quia, cum pecunia illa depo-  
neretur,



neretur, additum non erat, deponi iussu Ciceronis  
proconsulis. de quo supra.

eadem. pag. 170

TE CERTE in pecunia exacta ita efferre,  
ex meis rationibus relatis non oportuit: } li-  
bri aliquot scripti, etiam *Mediceus*, *Pecuniae exa-*  
*ctae*: nonnulli, *Ista* offerre. Placet idem quod olim,  
*Pecunia exacta*, non eadem tamen sententia, quae  
olim placuit. non enim illud, *Te efferre*, significa-  
re nunc arbitror iracundiam *Rufi*, qua sit elatus,  
quod *Cicero* pecuniae ab illo exactae mentionē nul-  
lam in rationibus referendis fecisset; uerum ad ero-  
gatam a *Ruso* pecuniam refero, cum sciret, eam  
scriptam esse in rationibus iam relatis. *Vt in exa-*  
*cta*, inquit, pecunia ita efferres, ita erogares, ex  
meis rationibus relatis non oportuit: id est: per  
meas rationes tibi non licebat. Hanc nostram opi-  
nionem adiuuare uidentur & superiora uerba. De  
eo mihi quid per leges liceat, considerandum est:  
& quae sequuntur proxima: Nisi quid me fal-  
lit: sunt enim alij peritiores. *Exactae* pecuniae  
plus consumpserat *Rufus*, quam scriptae ratio-  
nes, praesertim iam a *Cicerone* relatae, pate-  
rentur: id cum in rationibus *Ciceronis*, ut cum  
suis consentirent, corrigi uellet; de eo quid sibi  
per leges liceat, considerandum *Cicero* respon-  
det: mox indicat, non licere, subiungens, Non o-  
portuit. atque in hac opinione, possum, inquit,  
falli:



falli: sunt enim alij peritiores. Ut Rufum quodam modo consoletur.

eadem. pag. 170

DE beneficijs, & proconsules, propraetores, atque etiam, ut hic locus indicat, quaestores, cum ad urbem a provincijs reuertissent, eorum nomina post relatas rationes ad aerarium deferrebant, quorum strenua fidelique opera usi essent. hi autem erant ex ijs, quos secum in provinciam duxerant. qui deferri in beneficijs dicebantur, quod eorum uirtus, ac fides reip. profuisset. in quo erat eorum, qui deferrebant, ambitio quaedam, ostendendis non modo suis, uerum aliorum quoque beneficijs in remp. Detulerat igitur Cicero, non exspectato quaestore suos contubernales, praefectos, tribunos mil. quosdam autem non detulerat, ut centuriones, & tribunorum mil. cootubernales: de quibus ait rem esse in integro, si Rufus eos deferre uelit. Morem hunc ostendit oratio pro Archia: In beneficijs ad aerarium delatus est a L. Lucullo praetore, & consule. Et pro Balbo: In praetura, in consulatu praefectum fabrum detulit.

eadem. pag. 171

MYRINA & libro duo, Sigicelli, & Fuluij, habent, Smyrna: reliqui, Myrina. utraque nota urbs, Smyrna in Ionia, Myrina in Aeolia. quis potest diuinare, ex utra scripserit Rufus eas litteras? Smyrna quidem nauiganti in Italiam Mesinio propinquior, & commodior.

eadem.



eadem. pag. 171

DECESSIMVS: § sic omnes, quos uiderim, ueteres libri. a quibus olim discedendum putabam, & legendum, unius litterae mutatione, Decessimus. nunc me ipse reuoco, & ita statuo, sincopem esse non posse in ijs uerbis, quorum in praeteritis ultima syllaba est, Si: ut Cedo, Cessi, Cessissem, non Cesssem. eodemq. modo in compositis, decedo, recedo, incedo, discedo, concedo. Antea Decessissemus, legebatur.

## EPISTOLA. XXI pag. 172

ITA mihi communia omnia, quae opto, contingant, § uerbum, Communia, uideo esse in omnibus ueteribus libris, praeter unum, qui fuit olim Hieronymi Ferrarij, nunc est Caroli Borromaei Cardinalis. in eo est, Commoda, non, Communia: quod olim probaui: cum & Plautus in Trin. similiter dixisset: Ita commoda, quae cupio, eueniunt. Nonnulli, Communia, putarunt abundare. quorum non displicet opinio. ne tamen tot librorum consensus repudietur; uidendum etiam atque etiam, an probabilis aliqua sententia elici possit, nullo nec deleta uerbo, nec mutato. Ita mihi, inquit, ea, quae opto, contingant omnia communia, ut uehementer uelim. idest: ita te rerum omnium, quas opto, participem habeam, ut esse tecum uehementer uelim. nam ad uerbum, Com-

e                      munia,



munia, subaudio, Tecum: ut sit: ita mihi tecum communia, quae opto, contingant omnia. Occurrit alia sententia quam non occultare consilium est. Ita mihi res omnes publicae, quales opto, contingant. nam, Communia, & Communes res, pro publicis rebus accipi, nemo, ut opinor, dubitat. idque uel hoc uno constat exemplo, quod obseruauimus ep. 8. lib. 1. Ex eodem de toto statu rerum communium cognosces: quae quales sint, non facile est scribere. Communem quoque rem, dixit ep. 27. lib. 7. Communium fortunarum, ep. 12. lib. 5. Hoc totum ad eruditorum hominum iudicium refero. nam ipse nihil affirmo: tantum enitor, uti ueterum librorum auctoritatem conseruem.

eadem. pag. 172

ET ENIM, cum esset maior & alijs Placet Ut enim, pro, Etenim: quia sic habent plerique ueteres libri. soloecismi species apparet. quid refert? inquiunt. quam multa praeterea huiusce generis in Cicerone deprehenduntur. His itaque responderi uidetur posse: soloecismum, si modo libri ueteres in eo consentiant, ferendum: sin aliter, tollendum. itaque cum habeam duos ueteres libros, unum M. Antonij Maffei, quo etiam olim, commodante eius fratre Bernardino Cardinali, usus sum: alterum Fuluij Ursini, in quibus diserte legitur, Etenim: libenter aufero soloecismum, & integritatem Cicerone dignam restituo.



# IN. LIBRVM. VI

## EPISTOLA. I

P A G. CLXXIV

**Q**UISQVIS ? Quisquis, pro quisque, interdum ueteres usurparunt, ut hic ipse Tusc. v. Ut quidquid obiectum est, quod modo a natura non sit alienum, eo contenti non quaerunt amplius. In Verr. lib. 4. Ita odorabantur omnia, ut, ubi quidquid esset, aliqua ratione inuenirent. Plautus Trinummo: Sin unum quidquid sigillatim, & placide percunctabere. Lucretius autem saepissime.

eadem. pag. 175

**V**EREOR, ne consolatio nulla possit uera reperiri, & mei ueteres libri, Vlla, omnes habent: sed, Nulla, requirit sententia. nam Vereor cum simplici negatione coniunctum, usurpatur in rebus, quas accidere nolimus; ut Vereor ne filius peccet; cum gemina uero negatione, in rebus, quas accidere nollemus: ut Vercor ne filius recte uiuat: uolumus enim filium recte uiuere: interdum, quod idem ualet, pro gemina negatione utimur, Ut, hoc modo: Vereor ut filius recte uiuat. quare uidetur aut legendum hic, Vereor ut consolatio ulla possit uera reperiri: aut, Vereor ne consolatio nulla possit uera

e 2

fit uera



fit uera reperiri. nam & paullo post, cum dicit, Vereor ne nefas sit dicere: hoc significat, nefas sit dicere. sic igitur, si dicas, Vereor, ne consolatio ulla possit uera reperiri: hoc significes, consolatio aliqua possit uera reperiri. quod a Ciceronis mente discrepat. nullam enim ait sibi uideri esse consolationem tanti mali, praeter illam, & c. Vide, quae de hoc uerbo, Vereor, diximus in ep. 1. lib. 2. in Commentario nostro.

EPISTOLA. IV pag. 182

QUANTO fuerim dolore, meministi. & offendi scio Latinae linguae rudes hoc loquendi genere: quasi mendosum sit, Quanto fuerim dolore: sincerum autem, Quanto fuerim in dolore: quia scilicet non dicatur, Ego sum laetitia, sed, Ego sum in laetitia. Aptè uero, & apposite. quis enim hoc negat, Ego sum laetitia, dolore, spe, Latine non dici? at illud quis negare potest, Ego sum magna laetitia, magno dolore, magna spe, recte, & eleganter dici? Discant igitur uti similibus exemplis, ubi refellere aliquid, aut probare conantur, nec tam facile consensum, auctoritatemq. ueterum omnium librorum contemnant.

EPISTOLA. V pag. 184

QUAM extra ordinem de te ipso habemus, & praecipuam, non eandem, quam habemus de alijs,



de alijs, qui patria carent. Hic quaero, quibus  
caussis adductus Cicero spem haberet extraordina-  
riam de Caecina. non enim ob ingenium, & uir-  
tutem, quae paullo post nominantur, spem de ipso  
praecipuam ceperat: sed illa dixit ad eam spem  
accedere, quam extra ordinem iam habebat. ita-  
que aliae caussae, praeter ingenium, & uirtutem,  
quaerendae sunt, quae spem extraordinariam effi-  
cerent. quae quoniam occurrunt nullae, dicendum  
est, cum Cicero scripsit, *Quam extra ordinem de*  
*te ipso habemus*, significasse eam ipsam spem, quā  
haberet ob illius ingenium, & uirtutem, non ul-  
lam, quae, sine ingenij, & uirtutis accessione, ex-  
traordinaria esset. ut hoc dixerit: accedunt ad  
spem, ut extraordinaria sit, ingenium, & uirtus:  
accedunt autem, praeter illa, quae tibi sunt cum  
alijs communia.

eadem. pag. 184

ACCEDUNT tua praecipua, } haec ego  
libenter, atque etiam, quae sequuntur, Propter  
eximium ingenium, summamq. uirtutem, parēthesi  
superiore includerem, ut post communia multorum  
ornamenta, statim praecipua Caecinae subijceren-  
tur. sed hoc uidetur fieri non posse propter illud,  
Ad eam spem: quod ad aliquod uerbum referri ne-  
cesse est. omnino carere locum mendo uix credide-  
rim: aut, si mendo uacat, erit ex eo genere, quod  
Pedianus habere soloecismi speciem, in Cicerone  
interdum notauit.

e 3 EPI-



## EPISTOLA. VI pag. 185

MERITORVM multorum, & studio-  
rum parium ꝥ ep. 66. lib. 13. Caecinam appellat  
hominem omnibus secum studijs, officijsq. coniu-  
ctissimum. Hic uel studia litterarum significantur,  
ut ep. 15. lib. v. Vetustas est, amor, consuetudo,  
studia paria: uel etiam studia in remp. quia fue-  
rat uterque in praesidijs Pompeij, pro causa opti-  
matum, id est reip. Antea legebatur, Et studio-  
rum, & partium. placuit eorum sententia, qui,  
Studiorum parium, ope aliqua ueteris libri, repo-  
suerunt.

## EPISTOLA. VII pag. 191

MVLT A deos uenerati ꝥ Multa, aduerbij  
loco posuit, ut Virg. Georg. lib. 1 v. Et spiritus oris  
Multa reluctanti obstruitur. Sic locutus idem Ci-  
cero de nat. de. lib. 3. & pro Murena. Topicorum  
autem initio, Cum, inquit, mihi, meisq. multa  
saepe cauisses. Gellius lib. 13. cap. 23.

eadem. pag. 191

ATQVE elatum ꝥ unus Maffei liber, E-  
latum: quod olim probauimus: reliqui mei omnes,  
Latum. Sed coniecturam nostram alijs quoque  
placuisse, nunc uideo.

EPI-



## EPISTOLA . IX pag. 196

RECUPERES & antea, Receperis : nos, Recuperes, aliquot iam annis emendauimus, & impressimus. liber uetustus habet, Reciperes. & in alijs etiam exemplaribus, 1 litteram pro V saepissime reperias.

## EPISTOLA . XIIIX pag. 206

SIMVL acceppi & uariis est huius aduerbij usus. dicitur enim, Simul atque, S mul ac, Simul ut, Simul. hic quidem, ut scripsi olim adolescens, omnes libri ueteres, quos tunc uidere potui, habebant, Simul accepi, non, Simul atque accepi, ut est in uulgatis libris. itidem nunc, inspectis omnibus libris, quos ab amicis contrahere potui, uideo consentire omnes cum ijs, quibus olim usus sum. itaque discedendum a ueteribus libris non censui, cum praesertim ita locutos esse non modo Terentium, Lucretium, Virgilium, Horatium uiderem; (nam sermo poeticus ab oratorio nonnihil differt) uerum etiam Ciceronem ipsum, ut & in Acad. lib. 2. Simul tibicen inflauit, carmen agnoscitur: & de Fin. lib. 3. Simul autem cepit intelligentiam. Omitto alia eiusdem generis exempla. quamquam quibus hoc loquendi genus ignotum fuit, ij pro libidine saepe mutarunt Simul in Simul atque, uel, Simul

c 4 ac:



ac: in quo scripti libri, sublato mendo, ueritatem restituunt. Virg. Ge. 4. Taygete simul os terris ostendit honestum Pleias. Et Lucr. l. 1. Cui simul insula uirgineas circūdata comptus, Ex utraque pari malarum parte profusa est. Et Hor. ep. x. l. 1. Viuo, & simul regno, simul ista reliqui. Et Catullus non semel.

EPISTOLA. XIX pag. 208

M VNERVM regionum, } & antiquus liber, & Suetonij testimonium, ipsa etiam sententia me hortatur, ut, Regionum, legam. ludi enim significantur, quos Caesar, superatis iam in Hispania Pompeij liberis, per singulas regiones dare cogitabat: id quod e Suetonij cognoscitur historia. Ac, ne quis, mentione a me regionum facta, contradicendi occasionem arripiat, quod ante Augustum diuisa urbs non fuerit in regiones: ait enim de augusto Suetonius haec: Spatium urbis in regiones, uicosq. diuisit: moneo lectorem, urbis regiones hic uocari quasdam urbis partes a locis, lic et earum certi fines nondum essent, qui postea statuti sunt ab Augusto, Italiam, urbemq. in regiones diuidente. propterea et Suetonius dixit, ludos regionatim urbe tota a Caesare, confectis bellis ciuilibus, datos esse. Alijs placet legere, Munerum regionum: ut munera Caesaris regis dicantur. quod nec improbo, nec tamen satis probo: licet regem appellari Caesarem



Caesarem uideam ep. 37. lib. 13. ad Att. non enim arbitror Ciceronem in ullis, praeterquam ad Atticum, litteris ausum esse regem Caesarem appellare. sed Attico nihil occultat, sensus omnes aperit, fretus eius amore, fide, summaq. sapientia.

eadem. pag. 208

ALIQUID uidebimus, in quo sit spes. 3 in hac enim curatione spes ponenda non est. nam quod eo labore assequi uis, nullo modo assequere. aliquid igitur uidebimus, unde sperare liceat in eorum numerum, qui Caesaris intimi familiares sunt, posse te peruenire. Hanc ego loci huius esse omnino sententiam arbitror: ad eamq. pertinent uerba, quae sequuntur. Non modo, inquit, non appetendum, sed fugiendum arbitror, quidquid eiusmodi sit, ut, quod tu assequi uis, id ex eo assequi non queas. Sunt, quibus placeat, Species, non Spes: quod ita scriptum uideant in Mediceo libro. qui si ubique esset emendatus, non tam saepe ab eo discederent. Hic quidem, ut omittam eos libros, quibus olim usus sum, tredecim exemplaria, quorum nonnulla haud parum antiqua sunt, habent, Spes. quare, cum nec obscura sit sententia; nec libri ueteres dissentiant; mutandum nihil statuo.



# IN. LIBR V M. VII

## EPISTOLA. I

PAG. CCXIII

MAECIVS } qui poemata a mi-  
mis in scena recitanda prius indi-  
cabat. est enim hic, ut opinor, P.  
Maecius Tarpa, de quo Horatius  
in epistola ad Pisones:

*Si quid tamen olim.*

*Scripseris, in Maecij descendat iudicis aures,  
Et patris, & nostras. Maecij, pro Maeci.  
Quo loco inquit Porphyrio: Maecius perdiligēs  
carminum fuit aestimator. & Sat. x. lib. i.*

*Quae nec in aede sonent certatim iudice Tarpa.*

*eadem. pag. 214*

HOMINI POLITICO } si ueteribus  
libris habenda fides est: in omnibus, & quos olim  
uidi, & quibus nunc utor, ita legitur. Si de sentē-  
tia laboramus: causae nihil uideo, cur non placeat,  
Homini politico. ualet enim, uiro graui, & in  
rep. uersato. Medicus liber, Homini polito: quod  
est, eleganti.

*eadem. pag. 214*

FRUCTVM ullum laboris exspecto: } ue-  
teres omnes libri pro Exspecto, habent, Ex his  
peto. alij legunt, Ex his exspecto. mihi nostra le-  
ctio



Etio magis probatur, ut quae a ueteri scriptura minus recedat. nam & Exspecto, & Exscribo, & Exsupero, & alia huiusmodi cum S. littera ueteres scribebant, ut ex antiquis monumentis licet cognoscere. uide Quinētil. lib. I.

## EPISTOLA. II pag. 216

DE BURSA } hic est T. Munatius Plācus Bursa, frater L. Planci oratoris, ad quem sunt Ciceronis epistolae lib. x. tribunus pl. anno proximo acerbissimis concionibus in inuidiam rapere Milonem, Ciceronemq. conatus erat: eoq. incitante plebs curiam incēderat: quo crimine anno sequenti, statim post depositum magistratum, lege Pompeia de ui damnatus est. ep. I. lib. 8. & Plutarchus in Pompeio, & Caione, Dio lib. 40. & Pedianus. Restitutus a Caesare post uictum Pompeium. quare sic Phil. 13. Sequuntur alij tribunicij, T. Plancus in primis: qui si senatum dilexisset, numquam curiam incendiisset. quo scelere damnatus, in eam urbem redijt armis, a qua excefferat legibus.

## EPISTOLA. III pag. 219

ME uoluisse etiam reliquis omnibus; postquam non potuerim, mihi ipsi finem fecisse belli: } hic locus antea in omnibus impressis perperam distinctus sensum peruertebat.

EPI-



## EPISTOLA. V. pag. 221

M. IRFIVM, & antiquos libros inspexi multos. alij habent, M. Irfium: alij, M. Iffium: alij, Mirfium: alij, Idfium: quidam, m. u. fuuium: nonnulli, M. Ilfinium: uel, M. Itifium: uel, M. Infium: uel, M. Infinium: uel, M. Lifium: uel, Marcum Rufum: alij aliter nullus, Orfium: quod tamen nonnullis placuit, opinantibus eum esse de quo in ep. 13. lib. 2. ad Q. fr. fit mentio. qua de re scripsi olim, tempora non congruere: nam huc, qui nominatur in hac epistola, iuisse ad Caesarem, constat, ante Trebatium, illum autem post; cum in ea sit epistola in extremo: Trebatium ut ualde ames, uehementer te rogo. Hic a coniectura subsidium quaerunt; et aiunt posse fieri, ut Orfius in Galliam antea sit profectus; deinde, sui negotij causa, uel ab ipso Caesare missus, Romam uenerit; unde cum litteris Ciceronis ad Q. fratrem in Galliam redierit. haec facile possunt excogitari: sed nihil cogimur credere, nisi quod ratio persuadeat. nam illa uerba, quae sunt in ea ad Q. fratrem epistola, Est tribunus mil. in exercitu uestro: mihi quidem argumentum asserre non uidentur, cur ille Orfius antea fuerit in exercitu Caesaris. fortasse etiam contrarium significant. nam si fuerat antea tribunus mil. in exercitu Caesaris: cur, quasi de homine ignoto, scriberet ad fratrem Cicero, Est tribunus



tribunus mil. in exercitu uestro? quis putet a legato legionis Quinto ignoratum esse tribunum mil. cuiuscumque legionis. Dicit igitur Cicero, ut opinor, hoc: uenit ad Caesarem tribunus mil. creatus. Nō enim soli imperatores tribunos mil. creabant, ut ijdem credunt; sed ea potestas populi quoque fuit. Tribunorum militarium, inquit Asconius, duo genera, primum eorum, qui Rufuli dicuntur. hi in exercitu creari solent. alij sunt Comitiatij; qui Romae comitijs designantur. Idem legitur apud Festum. idem & a Liuiο lib. ix. significatur. Erat igitur Orfius e comitiatis. quo refellitur illud argumentum: non potuisse Ciceronem diuinare, tribunum mil. Orfium a Caesare creatum iri: itaque antea creatum esse, & in exercitu fuisse.

eadem. pag. 221

LEPTAE delega: & uideo scriptum esse, Delegam, in quattuor antiquis libris, in alijs omnibus, Delega. utroque modo locus, ut arbitror, mendo non uacat: nec ipse mihi in coniectura satisfacio.

eadem. pag. 221

QVOD familiam ducit, & Hoc non ad ipsum Trebatium refero; ut dicatur, suos habere senatores; uerum ad eius excellentem in iure ciuili memoriam, atque scientiam. cum enim laudare Trebatium Cicero coepisset, adiunxit ea, quae in eius laudibus ita prima sunt, ut quasi familiam ducere, & excellere uideantur. Laudatur enim, & necessaria



cessaria in primis est, in iuriconsulto memoria: si-  
ne qua scientia non consistit: nec tamen memoria so-  
la laudem habet, sed ita, si cum intelligentia con-  
iungatur: ex utraque enim fit scientia. itaque post  
memoriam adiunxit Cicero scientiam; ut optimum  
iuriconsultum describeret. Quod ad loquendi ge-  
nus attinet, confirmatur exemplo lib. 1v. de Fin.  
Primum, inquit, illud uide, grauissimam illam ue-  
stram sententiam, quae familiam ducit; honestum  
quod fit, id esse solum bonum; honesteq. uiuere,  
bonorum finem; communem fore uobis cum omni-  
bus, qui in una uirtute constituunt bonorum finem.  
Et Phil. v. Lucius, frater eius, utpote qui peregre  
depugnarit, familiam ducit. Translatio ab ijs, qui  
ceteros ducunt, quia potestate, aut honore, scien-  
tiae antecellunt.

eadem. pag. 222

SVMVS enim putidiusculi, } excusat se,  
quod in Trebatio commendando plura uerba con-  
sumpserit, quam Caesaris humanitas patiatur.  
Putidum appellat Cicero, in quo nimia diligentia  
reprehendi possit. ut de Orat. lib. 3. Nolo exprimi  
litteras putidius, nolo obscurari diligentius. Et de  
Off. l. 1. Litterae neque expressae, neque oppressae:  
ne aut obscurum esset, aut nimis putidum. Vidi  
scriptum in quibusdam antiquis libris, Blandius-  
culi: sed in plerisque, Putidiusculi: quod magis  
probo. & fortasse, Blandiusculi, glossema fuit.

EPI-



## EPISTOLA. IIX pag. 224

N I H I L audeo dicere: & ne magistrum of-  
fendam, reprehensio discipulo. A Cornelio ius ci-  
uile Trebatius didicerat: ut, sine praeceptoris cul-  
pa, stultus esse non posset. Digest. l. 1. tit. 2.

## EPISTOLA. IX pag. 224

P R O P T E R eius occupationes & Soleo,  
quam maxime possum, ad antiquorum librorum  
testimonium opiniones meas accommodare. itaque  
olim, cum in nullo uetere libro hoc uerbum, Occu-  
pationes, reperirem; desiderari graecum aliquid,  
aut mendosum esse locum existimaui: quod etiam  
nunc arbitrarer, nisi uiderem in quattuor ueteri-  
bus libris diserte scriptum esse, Occupationes: idq.  
rectum puto. notae sunt autem, & nominantur  
saepe in his epistolis occupationes Caesaris Gallico  
bello, omnium maximo. Nam quod a multis hoc  
uerbum abest antiquis libris: non est cur miremur.  
nota librorum uarietas est: ex uarietate autem,  
quod speciem ueritatis maiorem praeseferat, id eli-  
gimus in emendando; si modo ueritatem ipsam po-  
tius, quam coniecturas nostras, amamus. Lu-  
ctum, autem, quod uerbum alij ex ingenio repo-  
suerunt, in uetustis libris, cum paene innumera-  
biles uiderim, nondum inueni.

EPI-



## EPISTOLA. X pag. 226

A V T consolando, aut consilio, aut re iuue-  
ro § senarius integer e Terentij Heautontimorume-  
no translatus in hunc locum. Sic enim in ea fabula  
cum Menedemo loquens Chremes inducitur:

Istuc, quidquid est, fac me, ut sciam.

Ne retice, ne uerere: crede inquam mihi:

Aut consolando, aut consilio, aut re iuero.

Terentius porro, ut opinor, a Plauto, paucis im-  
mutatis, accepit: apud quem in Pseudolo, actu  
primo, ita loquitur Pseudolus seruus:

Fac me certum, quid tibi sit:

Iuuabo aut re, aut opera, aut consilio bono.

Ad hunc Terentij uersum respexit etiam ep. 6.  
lib. 1 x. ad Att. Eripe, inquit, mihi hunc dolorē,  
aut minue saltem, aut consolatione, aut consilio,  
aut quacumque re, potes.

## EPISTOLA. XI. pag. 226

V N D E petitur, § Vnde petitur, dicebatur is,  
a quo pecunia in iudicio, tamquam debita, peteba-  
tur. non enim, unde petititur, & debitor, idem  
sunt. nam quia uel interdum non debita pecunia pe-  
tebatur; uel petebatur ante, quam esset coepta de-  
beri; propterea debitor dici non semper poterat is,  
unde petebatur; sed tum uere, cum pecuniam de-  
bebat.



bebat. Atque hunc loquendi modum antiquis iurisperitis, quorum scripta perire, familiarem arbitror fuisse. hodie quidem exempla habemus perpauca: quorum unum, ut mihi nunc in mentem uenit, subiungam. lib. 1. de Orat. Nobis in tribunali Q. Pompeij, praetoris urbani, petentibus, homo ex numero disertorum postulabat, ut illi, unde peteretur, uetus, atque usitata exceptio daretur, Cuius pecuniae dies fuisset? quod petitoris causa comparatum esse non intelligebat.

## EPISTOLA. XII pag. 228

VT inter bonos bene agier oportet? haec formula bis ponitur lib. 3. Off. omisso uerbo, Oportet: secundo loco, Ut: in Topicis, item ut hic, legitur, Ut inter bonos bene agier oportet. unus omnino antiquus liber hic non habet, Ut. Sententia non obscura, siue Ut retineatur, siue deleatur: bene agi oportere inter bonos: uel, ita bene agi oportere, tamquam inter bonos res agatur.

## EPISTOLA. XIII pag. 229

TREVIROS uites, censeo: audio capitales esse. & ut unicuique, quod suum est, tribuamus, Pctri Bembi, hominis & dignitate, & omnium paene uirtutum laude clarissimi, epistolam, qua huius loci sententiam diligentissime, &  
f orna-



ornatissime explanauit, adscribemus. non enim eos imitari placet, qui ex aliena industria sibi laudem aucupantes, quae ab alijs didicerunt, edūt pro suis.

Petrus Bombus Bernardino Sandro S.

Quod hodie mane quaerenti tibi a me de illis Ciceronis ad Trebatium uerbis: Treuiros uites censeo: audio capitales esse: mallet, auro, argento, aere essent: respondi, iocum esse & multiplicem, & festiuum: qui quidem iocus in antiquis & nuntis, & scriptoribus deprehenderetur: itaque, quoniam eramus in uia, ut neque libros, neque nummos haberemus, reieci te in alium diem: id, ne te diutius torqueat, est eiusmodi, ut ioci causa, quod quidem Cicero ad illum scribens more suo ferre semper facit, & Treuiri, & capitales in ambigui genere sint posita. nam cum uideatur monere illum, ut uitet Treuiros Galliae populos, qui capitales, bellicosique sint; ludit cum in Treuitorum, tum in capitalium uerbo. erat enim Romae magistratus, Triumuii capitales, qui etiam Treuiri dicebantur. sed quoniam hoc ipsum Triumuirum nomen iterum in ambiguo poni poterat, cum essent etiam apud Romanos Triumuii pecuniae cudendae: quos ita inscribebant, A. A. A. F. F. hoc est, Auro, argento, aere flando, feriundo: iocatur iterum in hoc uerbo, luditque Cicero, ut mihi quidem uidetur, bellissime, addens, mallet Treuiros istos esse pecuniosos, quam bellicosos; ut, Caesare eos uincente, tu ditesceres.

itaque



itaque insert, mallem esse Treuiros auro, argen-  
to, aere, quam scilicet capitales. Trium uiros  
autem Treuiros solitos dici, Linus satis locu-  
ples esse testis potest: cuius sunt haec in libro XL.  
Colonia Grauiscae eo anno deducta est in agrum  
Etruscum, de Tarquiniensibus quondam captum.  
quina ingera agri data. Treuiri deduxerunt C.  
Calpurnius Piso, P. Claudius Puleher, C. Te-  
rentius Hister. Quod uero Triumuii pecuniae sic,  
ut dixi, inscriberentur; est apud me nummus ae-  
reus perantiquus ita inscriptus, C. PLOTIVS.  
I I I . V I R . A . A . A . F . F . Sunt & alij num-  
mi aliorum nominum, eiusdem tamen tituli; quos  
inspicias, cum uoles. Haec ad te scripsi, cum do-  
mum redissem, & nummos, ac librum sumpsis-  
sem, amore tui admonitus. Vale. Pridie idus  
Iun. M. D. XXXII.

## EPISTOLA . XVI pag. 231

NON nimis φιλοθέωρον non ualde cupi-  
dum spectandi: quia transire in Britanniam nolui-  
sti, neque spectare effedarios. Hic locus alio loco  
ep. 6. illustratur. Secutus autem sum Politiani cor-  
rectionem: licet libri ueteres, pro Nimis, Minus,  
& pro, φιλοθέωρον, Quam Philotetem, omnes  
habeant, uno tantum excepto, in quo est, Non mi-  
nus Philothcorum, item ut esse in Mediceo libro  
Politianus idem scripsit.

f 2 EPI,



## EPISTOLA .XIIIX pag. 234

GRAECVLAM cautionem chirographi mei } litteras commēdaticias ad Caesarem Graece scriptas mea manu. sic enim malo, quam, Graecis mistas uersibus. Cautionem appellat, quod ita utilis ei futura esset illa commendatio, ut iurisperitorum cautiones ijs utiles esse solent, a quibus de iure consuluntur. Sic ep. 13. Vt ego quoque, inquit, te de nostris cautionibus admoneam; Treuiros uites, censeo.

eadem. pag. 234

QVAM haec scribere: } Cum in hoc loco diuersis temporibus innumerabiles prope inspexerim ueteres libros, omnes tamen consentire animaduerti: quo magis adducor, ut dissentiam a Bernardino Rutilio, qui primus legendum arbitratus est, Quam haec non scribere. At sententia postulare negantem particulam uidetur. Esto: quis praestabit, numquam falli nos in eo, quod uidetur? quod si mutandum; quod facile concessim; & ego ipse in emendandis libris uti coniectura interdum soleo: mutatio modica sit, quaeq. a litterarum similitudine non discedat. itaque crederem, non absurde legi posse, Quam exscribere. diuinat enim Cicero, quod ex illa chartula deletum sit, exscriptum.



ptum non esse: siquidem, qui scribit in palimpsesto, chartae laborat inopia: itaque delere mauult, quã exscribere. Haec ita opinabar, ut mihi ipse nec placerem ualde, nec omnino displicerem.

eadem. pag. 234

METRILII Philemonis } ueteres libri non nihil dissentiunt: alij enim, Metilli, alij Meulij, alij Metrinij, alij aliter habent. Suspiciatus sum adolescens, neque nunc muto sententiam, legendum esse, M. Aemilij Philemonis: ut sit libertus Aemiliae gentis, & is fortasse, de quo Pedianus haec in argumento orationis pro Milone: Munatius Placus tribunus pl. produxerat in concionem M. Aemilium Philemonem, notum hominem, libertum M. Lepidi.

EPISTOLA. XIX pag. 235

DOCTOREM tamen lumenq. } qui doceat, & illustret ea, quae obscuriora sunt. Dixit iam: Sin tibi quaedam uidebuntur obscuriora. Et cum negauerit ullam artem sine interprete, & sine exercitatione aliqua litteris posse percipi: hic pro interprete Doctorem nominat: de exercitatione autem subiunget ijs uerbis: Ut uero etiam ipsi tibi loci, proposita quaestione, occurrant, exercitatione consequere. Veteres libri non consentiunt. duo habent, Lumenq. quos secutus sum: alij uarie, Vnumque, Vnumquemque, Nonnumquam.

f 3 EPI-



## EPISTOLA. XX pag. 236

RUFIO mediusfidius tuus? *Rufionem Trebatij gentilem fuisse, didici ex hoc antiquo lapide, qui est Romae ad portam Latinam.*

C. VIBIVS. C. F. MACER. C. TREBATIVS. RUFIO. FACIVNDO. CVRAVERVNT eadem. pag. 236

LVCVM, § Sunt, qui, Lucum, ideo male legi credant, quod neque luci capax esset privata domus, & luci, quia sacri, non sine scelere incidi possent. Vtraque ratio parum firma. primum enim, lucum illum non intra aedes Trebatij, sed ante eas fuisse, licet existimare: deinde, ne Cicero putetur impie sensisse, qui eum a Trebatio caedi uellet; docet M. Cato, quo modo recte, & sine piaculo caedi lucus possit. Quod attinet ad ueteres libros; unum tantum uidi, in quo est, Lacum. reliqui omnes habent, Locum. ex quo, Lotum, quidam legere maluerunt. quam coniecturam probare non possum; cum proxime sequatur, A quo: quod certe ad arborem lotum referri posse, nemo dixerit. Praeterea, luco magis, quam unius arboris umbra, uel forma, teneri aduenas, credibile est. quod ideo dico, quia sequitur, A quo etiam aduenae teneri solent. Iam illud, Multum prospexeris, aptius pertinere arbitror ad lucum, quam ad arborem. magis enim prospectum lucus impedit, quam arbor:



bor: cum praesertim, Prospexeris, intelligendum  
videatur, e totis aedibus, non ex uno tantum cu-  
biculo, aut una aedium parte.

EPISTOLA. XXIII pag. 238

MANEAT Damasippus in sententia. §  
Scripserat, opinor, Gallus, empturum ea signa Da-  
masippum, si Ciceroni non placerent. Horatius  
Sat. 3. lib. 2.

Insanit ueteres statuas Damasippus emendo.

EPISTOLA. XXIV pag. 240

CAPIVS, opinor, olim, § recte addidit,  
Opinor, ueritus ne erraret in nomine: nam Cipium  
nominat Festus in huius adagij mentione, Non  
omnibus dormio. libri ueteres plerique habent, Ci-  
tius, uel, Cicius: nonnulli, Caepio.

eadem. pag. 241

NULLO modo me facere posse, cum  
uellem: § in uoluntate obsequendi, facultatem  
deesse. Similiter locutus ep. 12 lib. XI. Saepe ad  
eum scripsi, non potuisse, cum cupissem, sermones  
hominum sustinere. Nec dissimile illud in oratione  
pro Flacco: Nihil dixit, quod laederet eum, cum  
cuperet. Videndum tamen, an rectius hoc sit: Nul-  
lo modo me facere posse: quem uel alium diem

f 4 si sum-



si sumpisset, me ei non defuturum. Sic enim habent quattuor ueteres libri: & eadem de re sic plane scripsit Cicero ad Atticum, ep. 47. lib. xiii. Respondi, inquit, non ignorare eum, quid ego deberem Sextio: quem uellet alium diem si sumpisset, me ei non defuturum. Moueor etiam, quod antiquum librum, in quo sit, Cum uellem, nullum uidi. alij enim habent, Quem uellem: alij, Quem uellent: nonnulli, Quem uellet. quod ego sincerum existimo, nec tamen statuo quidquam, nisi consentientibus eruditis.

## EPISTOLA. XXV pag. 241

NE, SI & omnes antiqui libri, Nisi. coniectura ductus, sic emendaui. quod postea alios sequi uideo.

eadem. pag. 241

VEREOR, ne in Catonem, Cato in nos. & uereor, ne nos in Catonem scribamus, id est eum scriptis nostris laudemus; (scribere in aliquem, non in malam tantum, sed in bonam quoque partem accipi, exemplis intelligitur de or. l. 2. de nat. de lib. 2.) Cato autem exitio nobis sit, Caesare nos, quod eius inimicum laudemus, male multante. Liber Maffei, & Fuluij Ursini sic habent: alij autem, In Catonium Catoninos: ut sit: uereor, ne Caesar Catoni deditos in Catonium demittat. Catonium autem



tem pro tristi exitu possumus accipere, qualis Catonis fuit, qui sua se manu interfecit.

## EPISTOLA. XXVII. pag. 243

GALLO. § alij credunt, hunc esse Q. Fabium Sangam, qui, de coniuratione Catilinae quae ab Allobrogibus acceperat, ad Ciceronem detulit. ego illi cognomen Gallo fuisse non arbitror. itaque libentius crediderim, hunc esse P. Sextium, pro quo exstat oratio, cui cognomen fuerit Gallo: fuisse enim hoc Sextiae gentis cognomen, intelligitur ex oratione pro Milone, ubi ita scriptum est: Sacrarium, quod est in fundo T. Sextij Galli. Tribunatum autem plebis & petijisse Sextium Ciceronis restituendi causa, & pro eius salute gessisse, ex ipsius Ciceronis oratione notissimum est. quod item de Fabio Sanga dici non potest. neque enim is, quo tempore Cicero exsulavit, tribunus fuit. quod facile cognoscitur ex oratione post reditum, in senatu habita: in qua nominantur octo tribuni pl. quorum studio, atque opera Cicero sit in patriam restitutus, T. Milo, P. Sextius, C. Sextilius, M. Cispinus, T. Fadius, M. Curtius, C. Mescinius, Q. Fabricius, nulla Q. Fabij Sangae mentio fit. Adde illud, & hunc exsulasse Gallum, quod illa uerba declarant, Ais fore, ut te Caesar restituat; & P. Sextium, quem opinor eundem esse cum Gallo. accusatum enim uideo ep. 24. & ad Att.

ep. 47.



ep. 47. lib. 13. damnatum autem coniicio ex episto.  
1. lib. 14. ad eundem. Iam uero illa uerba: *Vt isto*  
*ipso in genere, in quo aliquid posse uis, te nihil*  
*esse cognosceres: optime in Sextium conueniunt,*  
*qui salibus delectabatur. nam ep. 32. Ais enim,*  
*ut ego discesserim, omnia omnium dicta, in his et-*  
*tiam Sextiana, in me conferri. Quod uero infra*  
*dicitur, Si falsa fuerunt, quae tu ad me detuli-*  
*sti: quis non putet significari ea, quae Sextius, C.*  
*Antonij consulis quaestor, ad Ciceronem consu-*  
*lem de ipso Antonio, consule suo, detulit? sic e-*  
*nim in oratione pro eodem Sextio habita: Quae-*  
*stor C. Antonij, collegae mei, fuit, sorte, sed socie-*  
*tate consiliorum meus. impediore nonnullius officij,*  
*ut ego interpretor, religione, quo minus exponam,*  
*quanta ad me detulerit.*

## EPISTOLA. XXX pag. 247

MAXIMO meo beneficio est: & maximum  
a me beneficium habet: ut cum dicitur, Summo in-  
genio est: & ep. 3. lib. 3. ad fr. Cicero tuus, nosterq.  
summo studio est Paeonij sui rhetoris. Quae si quis  
diuersa iudicat: accipiat, Est, pro, *Vuit.* locum  
certe simillimum, qui hunc maxime confirmat, ostē-  
demus. nam Phil. 8. ita dixit Cicero: Negat, se  
illi amicum esse debere: cum suo magno esset bene-  
ficio, uenisse eum contra se.

eadem.



eadem. pag. 247

REBUS saluis, & Aut, rep. incolumi, ut ep. 1.  
 lib. 14. Utinam, Serui, saluis rebus colloqui potuisse  
 mus inter nos. Et Acad. lib. 2. Deli fuisse multos  
 accepimus, salutis rebus illis, qui gallinas alere  
 permultas quaestus causa solerent. Aut, Rebus  
 saluis, nullo suo damno: est enim absolutus.

## EPISTOLA. XXXIII pag. 250

PENNIGERO, non armigero in corpore;  
 non dubium est intelligi de auibus, Quas Philotte  
 tes configebat tardus celeres, stans uolantes. Alij  
 tamen, Pinnigero, legere maluerunt, contra Quin-  
 tiliiani sententiam, qui Pinnae de auibus dici non  
 uult. Pennigero etiam est in meis ueteribus libris.  
 Lib. 5. de Fin. Philottetes cum cruciaretur non se-  
 rendis doloribus, propagabat tamen uitam aucu-  
 pio sagittarum; Configebat tardus celeres, stans  
 uolantes; ut apud Attium est; pennarumque con-  
 textu corpori tegumenta faciebat. Ingemiscebat Ci-  
 cero, quod ingenium suum non, ut antea, in agen-  
 dis causis, aut in tuenda rep. sed in declamationi-  
 bus illis exerceret.

eadem. pag. 250

Ne pluribus legerem & quamquam ob-  
 scura sententia est: consensum tamen omnium  
 antiquorum



antiquorum librorum non uideo cur contemnam.  
 Perinuitus, pro Pluribus, placeret, si uel unius  
 libri ueteris testimonio comprobaretur; aut, si mu-  
 tatio quam minima fieret; quod in coniecturis pro-  
 bare maxime soleo. nam, quod ad sententiam at-  
 tinet: recte opponerentur, Perinuitus legerem,  
 Gratissimas fore.

EPICURUS. XXXIII. pag. 250

non dubitamus, quod intelligit de multis, Quas Philo-  
 sophus, Perinuitus, legere uoluerunt, coartat. Quia  
 illius Perinuitus, qui Perinuitus de multis, non  
 aut. Perinuitus, qui Perinuitus de multis, non  
 Lib. v. de Perinuitus, qui Perinuitus de multis, non  
 Perinuitus, qui Perinuitus de multis, non  
 Perinuitus, qui Perinuitus de multis, non  
 Perinuitus, qui Perinuitus de multis, non  
 Perinuitus, qui Perinuitus de multis, non  
 Perinuitus, qui Perinuitus de multis, non  
 Perinuitus, qui Perinuitus de multis, non  
 Perinuitus, qui Perinuitus de multis, non

EPICURUS. XXXIII. pag. 250

Perinuitus, qui Perinuitus de multis, non  
 Perinuitus, qui Perinuitus de multis, non  
 Perinuitus, qui Perinuitus de multis, non  
 Perinuitus, qui Perinuitus de multis, non  
 Perinuitus, qui Perinuitus de multis, non  
 Perinuitus, qui Perinuitus de multis, non  
 Perinuitus, qui Perinuitus de multis, non  
 Perinuitus, qui Perinuitus de multis, non  
 Perinuitus, qui Perinuitus de multis, non  
 Perinuitus, qui Perinuitus de multis, non



# IN. LIBR VM. IIX

## EPISTOLA. I

PAG. CCLIII

EMBAENETICAM facere }

ἐμβαίνειν est nauem conscendere : ex

E quo, Embaeneticam facere, pro conscendendi artem exercere. maritima fortasse mercatura uictum sibi

Pompeius exsul comparabat, ad inopiam reductus, ut ex eo, quod sequitur, liquet, Ut ego misererer eius esurie. Sunt, qui malint, Embaticam: ut maritimum Pompeij latrocinium significetur: ἐπὶ τοῦ ἐμβαίνειν : unde ἐμβατής, sicut ὀμβατής, & ἀμβατής: & inde ἐμβατικός potius, quam ἐμβαivenτικός. Turnebus legebat, Empinaeticam, a uerbo πεινᾶν, quod est esurire : ut Q. Pompeium dicat esuriendi artem facere.

## EPISTOLA. II pag. 253

ME repraesentante } sic aliquot antiqui libri:  
alij, Me repraesentare : nonnulli, Me prehensante : quod non displicet. putat aliquis, Matre prehensante : quae fuit soror Hortensij oratoris. ego nihil affirmo.

EPI-



## EPISTOLA. IV pag. 256

M. CLAUDIVM? M. Claudius consul erat hoc anno cum Ser. Sulpicio. itaque nec in eum repulsae, nec accusationis mentio conuenit. nisi si alium M. Claudium putemus intelligi. quod si ita esset, omnino, distinguendi gratia, uel cognomen, uel patris praenomen, uel notam aliquam Coelius addidisset. placet igitur, quod Corradus sensit, Calidium, pro Claudio, & Galliis, pro Gallis. ut sit M. Calidius orator, a duobus fratribus Galliis accusatus. quod eo uerisimilius uidetur, quia ipse quoque eorum alterum, Q. Gallium, accusauerat, quem Cicero defendit. Constat ex libro de claris oratoribus: in quo sunt haec: Memini, cum M. Calidius in accusatione sua Q. Gallio crimini dedisset, sibi eum uenenum parauisse, idque a se esse deprehensum. idem legimus in Valerio lib. 8. cap. 10. idem hic epistola 9. Coelius significat his uerbis: Calidius in defensione sua fuit disertissimus, in accusatione satis frigidus. Sunt, qui legant, A Galliis duabus: & M. Claudium putant ab ulteriore, & citeriore Gallia, accusatum. in quo primum discedunt & a Mediceo, & plane a scriptis omnibus libris, in quibus est, Duobus, non Duabus: deinde nulla nituntur historia. nam si accusatur a prouincijs, certe repetundarum. utrique igitur Galliae praesuerit, necesse est. quod nemo pro-



prodidit. nec omnino cuiquam, ante C. Caesarem,  
administrationem utriusque Galliae mandatam  
existimo.

eadem. pag. 256

LENTULI Cruris & fortasse is est, qui anno  
sequenti consul designatus est. potuit enim & Crus,  
& Cruscellus nominari.

eadem. pag. 256

PERQVAM uenuste cecidisse, & omnes li-  
bri ueteres, etiam Medicens, Cecinisse. unus tan-  
tum, Cedisse. placet, Cecidisse: ex more Latine  
loquendi.

eadem. pag. 256

RATIONE, & insidijs &c. & si uel unus suf-  
fragaretur antiquus liber, legerem libenter: Ra-  
tione, & consilio usus uideretur in euitandis eo-  
rum insidijs. Quo modo locutus est lib. vii. in Ver-  
rem: Laborem itinerum facilem sibi, & iucundum  
ratione, consilioque reddidit.

eadem. pag. 256

HIS consilijs, & cum sequatur, Qui; rectius  
uideretur, Eorum consilijs. quid agas? Coelia-  
num est. Similiter dixit in proxima epistola, Eo-  
rum odia, quae Hirrum premunt: pro, Qui Hir-  
rum premunt.

eadem. pag. 256

LAELIOS, & Antonios, & cum de Cae-  
sarianis loquatur, qui Curioni, Caesaris inimico,  
(ut quidem tum aut erat, aut uidebatur) in peti-  
tione



tionem tribunatus aduersarentur; malim, Lollius, pro Laelios. nam Laelii Pompeiani: quod ex libris Caesaris de bel. ci. cognoscitur. Antonius autem quaestor Caesaris erat in Gallia, & post annum tribunus pl. acerrime Pompeianis Caesarem oppugnantibus, restitit, intercessitq. ne S. C. de Galliarum successione fieret. Nostram opinionem de Laelijs in Lolliis mutandis adiuvat locus epistolae 3. lib. v. nam, ubi, Lollium, legitur, non desunt scripti libri, qui habeant, Laelium, errorem creante nominis similitudine, & quod notiores Laelii, quam Lollii.

eadem. pag. 257

ME A porro comitia quem euentum sint habitura, } sic antea in omnibus impressis: nos uocem, Comitia, sustulimus: quae subintelligitur; ut etiam cum dicit, Praetorijs morae quaedam inciderunt.

eadem. pag. 257

COELIVM Vicinianum } adoptatum in Coeliam gentem; cum ex Vicinia natus esset. uerū, ne celem quod sentio, Licinianum, una tantum littera immutata, potius quam Vicinianum, legendum existimo, adductus in hanc opinionem primum hoc argumento, quod hic, qui de dictatore Pompeio cogitauit, uarie nominatur, Lucilius a Plutarcho, Vinitianus ab Hirtio lib. 4. de bello Alexandrino, Crassus Iunianus ab ipso Cicerone ep. 8. li. 3. ad Q. fr. nominatur: & in Sigonij uetere libro, Memianum,



*Memianum*, non *Vicinianum*, legi uideo: ut ipsa  
uarietas mendii suspicionem afferat: deinde, quod,  
cum *Crassus Iunianus* a *Cicerone* appelletur, &  
*Crassus Licinia* gentis cognomen fuerit, licet intel  
ligere, uel eum ex *Licinia* gēte, uel in *Liciniam* ado  
ptatum, unde *Crassi* cognomen acceperit. in *Lici  
niam*, qui potest? cum *Coelius* appelletur: nō enim  
duarum familiarum nomina simul ponuntur. ergo  
ex *Licinia* in *Coeliam*: ut fiat *Coelius Licinianus*  
*Crassus*, uetere cognomine conseruato: ut *Scipionis*  
cognomen retinuit is, qui *Magni Pompeij* socer una  
cum eo consulatum gessit; cum tamen a *Q. Caeci  
lio Metello Pio*, ut *Dio* scripsit, adoptatus, ab ado  
ptino patre praenomen, nomen, cognomen sumpsis  
set. itaque in *S.C.* quod *Coelius* ep. 8. *Ciceroni* mi  
sit, *Q. Caecilius Metellus Pius Scipio* uocatur. &  
*M. Lucullus*, *Lucij Luculli*, qui de *Mithridate*, ac  
*Tigrane* triumphauit, frater consobrinus, qui con  
sul fuit cum *C. Cassio Varo*, cum ex *Licinijs* in *Te  
rentios* transisset, uetere cognomine *Lucullus*, nouo  
autem *Varro* nuncupatus est. Sed ut nouo praeno  
mine semper, uetere abiecto, sic uetere cognomine  
non illi quidem semper, sed frequentius, quā nouo,  
utebantur. exemplo sunt, ne alios quaeramus, ij  
duo, quos proxime nominauimus: quorum alterum  
semper *Lucillum*, numquā *Varronem*, alterum sae  
pissime *Scipionem* unico cognomine, interdum gemi  
no *Metellum Scipionem*, numquam *Metellum* sim  
pliciter uocatum meminimus. Accedit ratio tempo  
rum,



rum, ut idem esse uideatur, qui nunc aedilitatē cum Hirro petit, & qui tribunus pl. cum eodē designatus est in ea ad *Quinctum* epist. Ergo & hic *Coeliū Licinianum*, non *Vicinianum*, & in epistola ad *Quinctū*, *Crassum Licinianū*, nō *Iunianum*, rectius legi crediderim. aequis tamen iudicibus tum hoc, tū omnia, quae a nostra proficiuntur industria, libenter committimus. Cum haec scripsissem, ostendit mihi uir eruditissimus *Fuluius Ursinus* nummum argenteum, in quo mentio fit *Coelij Viniciani*: alterū, in quo *P. Crassi Iuniani*. fortasse potest hic esse *P. Coelius Crassus Iunianus*, qui ex *Innia Crassorum* gente adoptionis iure transierit in *Coeliam*.

eadem. pag. 257

Non faciendū, & *Alij*: Ad non faciendū. eadē sententia. Deiecto, inquit, *Coelio*, cuncti flagitare *Hirrū* coeperūt, ne faceret, id est, ne peteret aedilitatē. haec est enim illa incredibilis opinio, quā proxime dixit sua comitia nata esse aediliū pl. comitijs.

eadem. pag. 257

Quo appeteretur, & quo numero tribui deberet. *Sigonij* liber unus, Appeteret: quod non placuit.



### EPISTOLA. VI pag. 260

Ad illam summam ueritatem & sic antiqui libri, nec, opinor, mēdose. Si legitimo, inquit, iure uti uolueris, nihil ut pro *Appio*, nisi quod summa ueritas, id est summa iustitia praescribit, agēdū tibi existimes:



*istimes: suspiciōe fide recōciliatae gratiae fortasse aliquā dabis. Expressit Cicero alijs uerbis eādē sententiā e. 12. l. 3. Vetus, inquit, nostra similtas antea stimulat me, ut cauere, ne cui suspiciōe fide recōciliatae gratiae dare. Ea de re sententiā egregiā recitat Hieronymus in Apologia aduersus Rufinū, ex Ciceronis oratione pro Gabinio. Ego cū oēs amicitias tuendas semper putavi summa religione, & fide, tū eas maxime, quae essent ex inimicijs reuocatae in gratiā: propterea quod integris amicitijs officium praetermissum, imprudentiae, uel etiā (ut grauius interpretemur) negligentiae excusatione defenditur: post reditum in gratiam si quid est commissum, id non neglectum, sed uiolatum putatur, nec imprudentiae, sed perfidiae assignari solet.*

*eadem. pag. 260*

*CONFECTA sic olim emēdauit, secutus antiquū Petri Bēbi librū, & alterū Ioānis Scalae, in quo nō omnino diserte, Cōfecta, ut in Bēbi libro, sed, Confecta, legebat. postea in Alberti Ferri libro, Cōfecta, animaduerti Cōfecta, inquit, adhuc a Dolabella, foeda oīa sunt, & inhonestā: ut odiū potius, quā ueritatē ullā, praeseferat. Quid tū, si, Cōficta, legat? ut sit, Cōficta omnia, foeda, et inhonestā sunt. Quid ē, si hoc totū non de uno Appio, sed de omnibus reis uniuerse dicat? hoc modo: Nos hic reos omnes absoluius: & Hercules confecta iudicia, foeda omnia, & inhonestā sunt. Confirmare uidet hāc opinionē, quod sequit de consulum negligentia: quod ipsum nō*

*g 2 satis*



satis apte cum Appij accusatione, cum publica uero iudiciorum turpitudine aptissime connectitur. Sigonij liber, & alij, Cōsepta omnia foedera: unus, Conscripta. Mediceus, Consepta omnia foderā. Io. Baptistae Titio placet: Consepta: quasi, munita: quod reos nemo condemnet. tuta igitur culpa, ueluti saepta moenibus. Proxime dixit: Hic nos omnes absoluiamus.

eadem. pag. 261

Nisi ego cum tabernarijs, & aquarijs pugnarem, & Aquarum publicarum cura ad aediles cur. pertinebat. propterea Coelius, qui aedilis cur. erat, cum tabernarijs, & aquarijs, publicas aquas ad priuatum usum cōuertentibus, pugnabant. qua de re Frontini uerba ex lib. 1. de Aquaeductibus recitabo, quae magnam huic loco lucem afferunt. Causa est, inquit, fraus aquariorum, quos aquas ex publicis ductibus in priuatorum usum deriuare deprehendimus. Sed & plerique possessorum, ex quorum agris aquae circumducuntur, fraude formas riuorum perforant: unde fit, ut ductus publici hominib. priuatis uel ad hortorum usum subseruiant, uel ad itinera suspendāt. ac de uitijs eiusmodi nec plura, nec meliora dici possunt, quam a Coelio Rufo dicta sunt in ea concione, cui titulus est, De aquis. quae nunc nos omnia, simili licentia usurpata, utinam non per offensas probaremus. irriguos agros, tabernas, cenacula, & corruptelas denique omnes perpetuis salientibus



lientibus instructas inuenimus. Haec Frontinus. Aquarij erant, quibus deducendi in urbem publicas aquas cura mandabatur. quod & recitata proxime, & illa praeterea eiusdem Frontini uerba lib. 1. satis ostendunt: Aquarij nostri partem maximam Crabrae semper in supplementum Iuliae vindicauerunt, nec ut Iuliam augerent, quam habebant largiendo cōpendij sui gratia. Ab hac forsitan affectandae, & perducendae aquae similitudine dicti sunt Aquarioli, qui mulieres impudicas, ut ait Festus, affectarentur. & Aquarioli in stupris uxorem conuiuentes, ut aquarij in derivationibus aquarum publicarum. Tabernarios uocat Coelius non omnes omnium mercium institores, uerum eos tantum, quorum in tabernas cibi gratia homines diuertunt. nam hi publicas aquas in usum suum conuertebant. Differt autem Taberna ab Officina, & Apotheca. Officina tēpore prior est utraque nam in ea sunt, quae postea uel in apothecam custodienda, uel in tabernam uendenda deferantur. Apotheca est, quae multas capit, custoditque merces, ut deinde ad tabernas missa prostent uenalia. hodie, corrupto uocabulo, ab apothecis nomen acceperunt ea loca, quae a ueteribus tabernae dicebantur. Taberna tantum habet, quae minutatim uendantur: cui qui praest, Institor uocatur: qui autem apothecae, Mercator. Sunt & tabernae, in quibus habitant pauperes. unde Horatius: Pauperum tabernas, regumque turre.



eadem. pag. 261

QVAS § fortasse, Qua. ut alimentaria sua lege iuberet Curio aediles metiri frumentum plebi.

## EPISTOLA. VII pag. 262

PAYLLA § raro quidem cognominibus mulieres utebantur: sed, numquam, qui putarunt, plane falluntur. id quod, ut Plutarchi testimonium omittam, vel hic locus ostendit. Syllae uero filiam, quae Miloni nupsit, quis nescit Corneliam fuisse, cum eadem tamen Fausta uocaretur? quid Orestilla, a Coelio, & Sallustio, quid Laterensis, a Valerio Max. lib. I IX. cap. 2. nominata, non aperte cognomen est? nam a nominibus omnes appellatas, ut Valeria, Terentia, Tullia, satis inter omnes constat. Haec uero Paulla eadem est, quae Polla uocatur ep. 8. lib. XI.

eadem. pag. 262

NONDUM retulerat. § nondum retulerat, ad quos referendum erat, de nouis nuptijs. nam de diuortio retulisset, antequam fieret.

## EPISTOLA. IIX pag. 262

M. TVCCIVM, accusatorem suum &c. § huius loci sensum, etsi obscurissimus est, tamē declarare conabimur. Reorum causae ordine agebantur. nam quae tempore prior fuerat, eius prior itē locus



locus erat. excipiebantur tamen eae caussae, quae cum caussis iam iudicatis coniunctionem aliquam habebant, ut earum quasi appendices quaedam uiderentur. cuiusmodi enim caussis, etiam si post multas alias delatae essent, tamen primus locus erat constitutus. itaque in oratione pro Cluentio, Fabricium, inquit, reum statim fecit; utq. ei locus primus constitueretur, propter caussae coniunctionem impetrauit. Propter caussae coniunctionem, inquit, quod Fabricij causa eadem erat, quae Scamandri, qui antea condemnatus erat. & infra in eadem oratione: Apud eosdem iudices reus est factus Oppianicus, cum is duobus praeiudicijs iam damnatus esset, ab iisdem autem iudicibus locus ei primus est constitutus. Hoc ideo factum est, quod Oppianici causa coniunctionem habebat cum Fabricij, & Scamandri causa, quos iudices iam damnauerant. Excipiebantur etiam caussae de ui, quae primo loco agebantur, reiectis alijs caussis, quae tempore priores fuerant. sic Milonis causa, quod erat de ui, extra ordinem est acta. sic M. Coelius, cum Atratini patrem de ambitu reum fecisset, de ui postea accusatus, causam ipse prior dicere coactus est. sic etiam C. Sempronius cum a M. Tuccio esset accusatus, & causam suam eo anno nollet agi, (forte, quod ex ijs, qui tunc iudices erant, complures sibi infensos intelligeret) accusauit accusatorem suum lege Plotia de ui, eo consilio, ut, interposita extraordinaria causa, tempus terere-

§ 4 tur,



tur, & suae causae iudicium, cum eius agenda-  
spatium non esset, in annum sequentem necessario  
reijceretur. Extraordinarius autem reus is dice-  
batur, cuius causa non ordine, ut aliae causae,  
sed primo loco semper ageretur, & inde extraor-  
dinaria causa, quae statim ante omnes causas age-  
retur, ut cum erat de ui, uel coniunctionem habe-  
bat cum aliqua causa ante iudicata.

eadem. pag. 263

SI QUID iniuriis suis esset, quod Ve-  
storius teneret. § cum sit huius loci mihi qui-  
dem perdifficilis intelligentia, a duobus ueteribus  
libris, uno Sigonij, altero meo, discedendum non  
putaui: ut sit, quo niti coniectura possit, si quis  
ingenio ueritatem uestigare uoluerit. quod si ex his  
uerbis aliquam omnino cogar elicere sententiam, in-  
terpretabor hoc modo: Tibi pro beneficio dedit, si  
quid esset iniurijs suis, id est, si quid esset suo da-  
mno, suaeque iniuria, quod Vestorius teneret. quasi  
ademptum sibi aliquid, ac teneri a Vestorio dice-  
ret, quod aliqua eius iniuria fieret. nam ut, Iniu-  
ria, interdum aduerbij loco ponimus, ut, Iniuria  
facis hoc: sic uidetur pronomen addi posse, ut dica-  
tur, Iniuria mea facis hoc: quemadmodum, In-  
gratjs, & Ingratjs tuis, Merito, & Merito  
meo ueteres dicebant. Paulo asperius hoc est,  
aliquis dicet. quis negat? uerum hanc asperita-  
tem Coelius amauit. Tres praeterea minime  
recentes libri pro, Si quid, habent, Si quod:  
duo,



duo, Quo Vestorius. Quod autem pro, Iniurijs suis, in quo mei quidem scripti libri omnes consentiunt, nonnulli reposuere, Iuris sui: commenticium suspicor, & eo magis, quod ijdem, Iniurijs suis, esse in suo illo perueteri libro, editis antea, ut ipsi uocarunt, castigationibus indicauerant: nec tamen huius postea mutationis causam ostenderunt.

eadem. pag. 263

A E Q U O numero 3 aequo sententiarum numero reus absoluebatur. habendam scilicet humanitatis rationem ueteres illi legum latores censuerunt; ut, in re dubia, ad misericordiam inclinatio fieret. testem habeo Ciceronem in oratione pro Cluentio. In consilium, inquit, ituri erant iudices triginta, & duo. sententijs decem, & sex absolutio confici poterat. Confirmat in Mario Plutarchus: παραλόγως ἀπέφυγε, ἴσων τῶν ψήφων ἔσοι μάλιστα. Hoc Laterensis ignorans, cum absolutum Seruilius, ob sententiarum paritatem pronunciare deberet, non pronunciauit absolutum, neque de sententiarum numero mentionem fecit, sed, cum tres ordines, senatus, equites, tribuni aerarij lege Aurelia iudicaret, ordinum iudicia exposuit; quibus absolutum Seruilius, haec infra uerba demonstrant, Pro absoluto Seruilius haberi coeptus. in quo geminus Laterensis error agnoscitur, primū, quod aequo sententiarū numero absolui reum ignorauit; deinde, quod in absoluendo, aut condemnando



mnando habendam ordinum rationem arbitratus est; ut, quem ordines duo absoluisent, aut damnaissent, is absolutus, aut damnatus putaretur: cum non intelligeret accidere posse, ut, a duobus ordinibus absolutus reus, tamen damneretur, ex uniuerso sententiarum numero, quarum maior pars uel salutem reo, uel poenam afferebat. exempli gratia, senatores reum absoluunt, item equites, sed utrique paucis sententijs: tribuni aerarij omnes, aut plerique condemnant. quis non uidet absolui reum, si ordinum potius, quam sententiarum, ratio ducatur? contra tamen accidit: nam sententiae numerabantur, separatim quidem primo cuiusque ordinis, sed ut mox summa fieret ex omnibus: quarum maiorem numerum uel absolutio rei, uel calamitas consequebatur. quod ne putetur a coniectura ductum, quae saepe, tamquam in lubrico posita, ad falsa prolabitur; praeclarum contra ordines (ut ita loquar) pro sententijs habemus exemplum in utilissimo Pediani commentario: in quo damnatus a duobus ordinibus L. Saufeius, ex numero tamen sententiarum impunitatem assequitur. uerba recitemus. Defenderunt Saufeium M. Cicero, M. Coelius; obtinueruntque ut una sententia absolueretur. condemnauerunt senatores decem, absoluerunt octo: condemnauerunt equites nonem, absoluerunt octo: sed ex tribunis aerarijs decem absoluerunt, sex condemnauerunt. Alterum succurrit exemplum in ep. 5. lib. 2. ad fratrem.

nam



nam de Sex. Clodio absoluto significans, Tres, ait, ei sententiae taeterrimae in consilio defuerunt. subiungit autem: Senatorum urna copiose absoluit: equitum adaequavit: tribuni aerarii condemnarunt. Ex quo patet, si ordines considerentur, dubium esse iudicii exitum; cum unus absoluat, alter condemnet, tertius aequo sententiarum numero nihil decernat. numeratis autem senatorum, ac tribunorum sententijs, (nam equitum pares fuere) uicit tribus sententijs ea pars, quae absoluebat: qui senatores fuere: dixit enim, Senatorum urna copiose absoluit. Quid? ipse Coelius non idem ostendit, uerbis ex legis capite uno, & centesimo recitatis? Quod eorum iudicium maior pars iudicarit, id ins, ratumque esto.

eadem. pag. 264

EMISSARIO est factus. § in antiquo libro Mediceae bibliothecae, & in duobus praeterea, Petri Bembi, & Vbaldini Bandinelli, legitur, Emissarius rustetio factus. fortasse corrigendum, Emissario, S. Tettio factus: ut existimat amicissimus meus. Tettios autem & liberos, & amicos Claudiorum fuisse, in qua gente erat Appius, ostendit Asconius, ubi in oratione pro Milone illum locum explanat. Haec insidiata Pompeio est. quamquam ibi tantum de Damione Clodij liberto loquitur. sed Damionem Tettiae gentis fuisse ostenditur in lib. 4. ad Att. ep. 3. itaque hic Coelius, de Appio loquens, Accusatus, inquit, est a quodam suo emissario Sex. Tettio.



Tettio . nam cum , Sextus , antiqui significare uolebant , uel Sex . scribebant , uel S . ita patebit & uera lectio , & sententia . quo quidem eo magis inclino , quod etiam in libro peruetere Caroli Sigonij scriptum uideo , Omissa rustetio : ut in hac uarietate augeatur mendi suspicio , & ad ueritatem indagandam quasi latior uia patefiat .

eadem . pag . 264

VILLIUS § antiqua familia , primis fere temporibus a Liuiio nominata . Annales dicti , ab eo , qui legem tulit , quo anno magistratus capere liceret . Villium Annalem Cicero etiam memorat in oratione pro Fundanio apud Priscianum l . 6 . Antea in omnibus impressis , Iulius . primi nos reposuimus , Villius .

eadem . pag . 264

P O M . § tribus Pomptina fuit . nam ex xxxv tribubus , aliquam , ut inquit Pedianus , necesse erat , cuiuscumque esset ordinis , ciuis Romanus obtineret . is autem ostendebatur a praenomine suo , a nomine , ( nomine autem familia significatur ) a patris praenomine , a tribu , a cognomine , ut Philippica ix . Ser . Sulpicius Q . F . Lemonia Rufus . Lemonia enim tribus est ablatiui casus : ut sit ex Lemonia , ut inquit Asconius . in lapidibus autem antiquis fere semper , in libris aliquando prioribus tantummodo litteris significari tribus animaduertas , ut in hoc S . C . ubi enim legitur , Pom . sciendum est , Pomptinam intelligi : ubi Pop . Popiliam :



liam; ubi Pup. Pupiniam: ubi An. Aniensem: quod cum antea non esset exploratum, alij pro An. Capito, duabus uocibus coniunctis legebant An-capito: Bernardinus autem Rutilius in suis annotationibus credidit, antiquas notas fuisse, quae significarent, Ateij nepos. in quo quam deceptus sit, non attinet dicere. si enim ab auo ostendendus aliquis erat, non ab eius nomine, sed a praenomine ostendebatur. sed incidit in errorem, quia tribum Aniensem non agnouit, quae duabus modo litteris, ut iam dixi, scripta fuerat. quae me ratio mouit, ut ubi, Puphirrus, uno tantum uerbo antea legabatur, duobus in nostro libro scriberem, Pup. Hirrus. idest Pupinia Hirrus. tribus enim ante cognomen ponebatur, ut & hic, & alibi licet uidere. Quoniam autem hanc tribuum cognitionem non ita facilem esse perspicimus, (nam & Volaterranus, & Alexander, qui dies Geniales scripsit, & alij, quos non necesse est commemorare, parum uidentur in suis libris earum numerum, & nomina tenuisse) studiosis non fore prorsus inutile, aut iniucundum arbitramur, si, quae in hanc rationem dispersa in ueterum monumentis leguntur, coacta huc asseramus. quae cum olim scripserim adolescens, cum haec noua uidebantur; nunc eadem, correctione quadam, breuissime colligam.

Fuerunt igitur Romanae tribus omnino xxxv. quarum nomina infra scripsimus, & scriptores aliquot, qui de ijs locuti sunt, apposui, ut inde facilius



facilior earum, ac certior unicuique cognitio sit.

AEM. uel, AEMI. Aemilia. Cicero ad Att. lib. 11. Liuius l. xxxi ix. antiquae urbis inscriptiones 75.

ANI. Aniensis. Cicero pro Plancio, Liuius l. x. antiquae urbis inscript. 160 : 175 : & in li. Petri Appiani de inscriptionibus antiquis totius orbis, 93.

ARN. uel, ARNIEN. Arniensis. Cicero in agraria 11. in Rullum, Liu. lib. vi. & lib. xxix. ubi corrupte legi putamus Narniensis. nam lapis antiquus, quem Vulsinijs in Templi parietibus uidimus, expressam Arniensis mentionem continet.

CLA. Claudia. Liuius li. 11. Virgil. l. vii. Dionysius Halic. l. v. antiquae urb. ins. 75. 84. 114 liber Appiani 479.

CLV. uel, CLVST. Clustumina. Cicero pro Plancio, pro Balbo, antiquae urb. inscr.

COL. Collina. Varro lib. iv. de ling. Lat. Plinius lib. xii ix. cap. 111. Festus, antiquae urb. inscr. 27. 99. 120. liber Appiani 110.

COR. Cornelia. Liuius lib. xxxi ix. antiquae urb. inscr. 29.

ESQ. uel, EXQ. Esquilina. Varro lib. ix. de ling. Lat. Plinius lib. xii ix. cap. 111. Festus, antiquae urb. inscr. 75: Est praeterea in aedibus uiri optimi, ualdeque eruditi, Gentilis Delphinijs Romani fragmentum antiqui lapidis cum hac tribu.

FAB.



FAB. Fabia. Horatius epist. VI. lib. I. Suetonius in Augusto, antiquae urb. inscr. 61. 73. 74. 76. & Petri Appiani lib. 62. 66. 335. 343. 500.

FAL. Falerina. Livius lib. IX. in libro Appiani 105. 120. & Neapoli antiquus lapis est ita inscriptus: C. PISTORIO. C. F. FAL. FIRMO. AEDIL. II VIR. CVRATORI. OPER. PVBLICOR. Item Iosephus, ἐν τῷ τῆς ἰουδαϊκῆς ἀρχαιολογίας λόγῳ γ, κεφαλῇ ιξ.

GAL. Galeria. Lin. li. XXVII. Plinius li. VII. ca. 49. etsi, pro Galeria, legitur Galerius. sed corrigendus locus est ex antiquo libro auunculi mei Francisci Asulani. & antiquae urb. inscr. 89. 142. 159: liber Appiani 14. 15. 16. 19. 21. 22.

HOR. uel, HORAT. Horatia. Scriptum in libris de hac tribu nihil est: in lapidibus tamen saepe nominatur. deductam satis constat a uetere familia patricia, ut alias non paucas.

LEM. Lemonia. Cicero pro Plancio, Phil. IX. Festus, antiquae urb. ins. 91: 151:

MAEC. Maecia. Hanc in antiquis lapidibus duobus inuenimus: C. OCTAVIO. C. F. MAEC. VERO. C. HERBACIO. MAEC. ROMANO. in libris quinque nominatam obseruauimus, a Tulio lib. IV. ad Att. ep. 14. a Lilio li. I IX. & XX IX. a Valerio Max. li. 2. cap. IV. a Festo.

MEN. Mentina. Cic. l. XII I. ep. fa. e. 9. Iosephus ἐν τῷ τῆς ἰουδαϊκῆς ἀρχαιολογίας λόγῳ γ, κεφαλῇ ιξ.



an. 18. Cum quibus lapides tres consentiunt.

C. VALERIO. C. F. MEN. DQ LV-  
TIO. MARCIANO

A. MVNIO. A. F. MEN. EVARISTO

C. CATIO. C. F. MEN. BALBO

C. CATIVS. C. F. MEN. GALLVS. & hic  
epist. IX. lib. XII. Puto tamen hanc tribum  
fuisse Meneniam potius, quam Mentinam, & cor-  
ruptum esse Iosephi locum. deducetur enim ab an-  
tiqua familia patricia, ut aliae octo, Aemilia,  
Claudia, Cornelia, Fabia, Horatia, Papiria, Ser-  
gia, Veturia. nam Publilia nomen accepit a ple-  
beia gente.

OVF. Oufentina. *Liuius lib. IX. Festus. an-  
tiquae urbis inscript. 86. 133. in libro Appiani  
27. 28. 30. 51. 63. 71. 79. 84. 85. 86. & in lib.  
Veronensium antiquitatum sic: Q. EVFEMVS.  
Q. F. OVF. LVCVLLIVS.*

PAL. uel, PALAT. Palatina. *Cicero in Verrē.  
Pedianus 18: Varro lib. IV. de ling. Lat. Plinius  
lib. XII. cap. III. Liuius lib. XX. Festus. antiquae  
urbis inscr. 29. 34. 39. 62: 116. 155. 176: liber  
Appiani 17. 22. 34. 64.*

PAP. uel, PAPIR. Papiria. *Liuius lib. XIX. Fe-  
stus. antiquae urbis inscr. 72. 135.*

POB. Poblilia, quae deinde Publilia scripta  
est. sicuti ex Poblus Publius factus est. Reperi-  
tur in lapidibus & PVB. & PVBL. & PV-  
BLIL. & POB. *Liuius li. VII. antiquae urb. in-  
scr. 10.*



scr. 10. liber Appiani 252. & in libro Veronensium antiquitatum saepe. Exempla Publiliae, per v. scriptae, quinque habemus, duo in antiquae urb. inscr. 66. 81. tria in App. lib. 65. 105. 352. Puto hanc esse, quam Festus Popilliam nominat: de qua Valerius lib. ix. cap. x. liber Appiani 297.

POL. Pollia. Livius lib. xxix. Valerius Max. lib. ii. cap. iv. & lib. ix. cap. x. antiquae urbis inscriptiones 110. 113. 147. liber Appiani 18.

POM. uel, POMP. Pomptina. Cicero ad Atticum, lib. iv. Livius lib. vii. Festus. antiquae urb. inscrip. 114. 177. liber Appiani 141. 484.

PVP. Pupinia. Cicero ad Q. fratrem lib. iii. Livius lib. xxvi. Festus. Duo antiquorum lapidum exempla exstant. alterum Capuae, D. VIBIDI. D. F. PVP. NIGRI; alterum Patavij, CLAVSIO. C. F. PVP.

QVI. uel, QVIR. Quirina. Cicero pro Quintio. Asconius 61. Festus. antiquae urb. inscrip. 15. 34. 44: 115. liber Appiani 14. 17. 18. 19. 103.

ROM. Romilia. Cicero in Verrem, idemque in agraria 1. Asconius 18: Varro lib. iv. de ling. Lat. Festus. Servius in comment. iii. Aeneidos. antiquae urbis insc. 165: in libro Veronensium antiquitatum 51. L. GALLIO. L. F. ROM. Est etiam Ferrariae semisraclius lapis, in imis summi Templi parietibus instratus, in quo ita scriptum  
h uidimus,



uidimus, -ITIO.T.F.ROM.

SAB. Sabatina. *Liuius* libro VI. *Festus* *Lapis antiquus Romae in aedibus eximij Cardinalis Carpensis*: CN. CORNELIO. CN. F. SAB. MVSAEO. MANCIPI. VIAE. APPIAE.

SCA. uel, SCAP. uel, SCAPT. *Scaptia*. *Liuius* lib. IIX. *Suetonius* in *Augusto*, *Festus*. *Lapidis antiqui exemplum Romae exstat in regione Pantheonis*: C. AVFELIVS. C. F. SCA. SEVERVS. & item aliud, C. CRANTANIVS. SCAPTIA. MACER.

SER. uel, SERG. *Sergia*. *Asconius* 61. antiquae urb. inscr. 61.63:81:165: est etiam in eodem libro 63: quattuor litteris SERG.

STEL. *Stellatina*. *Liuius* lib. VI. antiquae urb. inscr. 110. & duabus litteris. ST. 239.

SVB. *Suburana*. *Varro* lib. IV. de ling-Lat. *Cicero* etiam in *agraria* 11. quo in loco uidetur corrupte legi, *Ab Ocriculana*: cum in quinque antiquis libris legatur, *Ab usura* nam. unde mihi orta coniectura est, legi posse, a *Suburana*, mutatione fere nulla. *Plinius* lib. XII. cap. III. *Festus*. antiquae urb. inscr. 117. & alibi.

TER. *Terentina*. *Cicero* pro *Plancio*. *Liuius* lib. X. antiquae urb. inscr. 140. 199. liber *Appiani* 105. 336.

TRO. uel, TROMEN. *Tromentina*. *Festus*. *Liuius* etiam lib. VI. scripsit, *Tromentina*, ut opinor, non, ut impressum est, *Promentina*. antiquae



quae urb. inscr. 207: liber Appiani 16. 177. & in lapide, qui Caietae est, L. ATILIO. L. F. TROMEN.

VEIEN. Veientina, pro Plancio.

VEL. Velina. Cicero ad Attic. lib. IV. & in Bruto. Horat. ep. VI. lib. I. Persius, antiquae urb. inscr. 162. liber Appiani 19.

VET. Veturia, hoc lapide notata, C. CASSIUS. C. F. VET. & hoc, SEX. APVSIVS. SEX. F. VET. & hoc, SEX. CALPVRNIVS. SEX. F. VETVRIA.

VOL. uel, VOLT. uel, VOLTIN. Voltinia. Cicero pro Plancio. antiq. urb. inscr. 155. & in antiquo lapide, qui est Venetijs in turri S. Vitalis, CN. NVMERIVS. CN. F. VOLFRONTO. & c. Est & quatuor litteris VOLT. in Appiani lib. 484. alibi VOLTIN. & integrum VOLTINIA.

Ex hoc numero quattuor tantum urbanae fuerunt, Palatina, Esquilina, Collina, Suburana, in quas, ut inquit Plinius, transferri ignominiae esset, dictae a partibus urbis, in quibus habitabant. reliquae omnes rusticae, laudatissimae, eorum, qui rura haberent: quae propriae ingenuorum erant, cum urbanae libertinorum essent: ut in Asconio, & in epitome Liuiana lib. XX. Asconium autem, ubi illud in Verrem explanat, V. & XXX. tribus, cur de nominibus Sabinarum plures tribus esse factas dixerit, mirari non satis possum; cum a Sabinis non tribus, sed curiae nomina acceperint, ut

h 2 inquit



inquit *Liuius lib. 1. & Sex. Pompeius.*

eadem. pag. 264

A . D . EX X Kal. Mart. 3 sic est in tribus  
meis antiquis libris, & in uno Sigonij, & in Me-  
diceo. suspicor tamen locum non carere mendo, &  
legendum fortasse, A . d . ex kal. Mart. uel po-  
tius, Ex a . d . kal. Mart. quod ualet, Ex ante diem  
kal. Mart. nam ueteres consueuisse dicere, Ex an-  
te diem, non, Ante diem ex, animaduerti. exem-  
pla subiungam. ep. 17. lib. 3. ad Att. Nuncij nobis  
tristes, nec uarij, uenerant ex ante diem non Iun.  
Varro lib. 2. de re rust. Ex ante diem vii . id. Feb .  
ex ante diem vii . id. Mai. ex ante diem iii . id.  
Sext. ex ante diem iii . id. Non. *Liuius lib. XLV.*  
Supplicatio pro concione populi indicta est ex an-  
te diem v . id. Oct. cum eo die in quinque dies. Ac-  
cedit Colotiani lapidis testimonium.

M. AEMILIUS. M. ANTONIUS. IMP.  
CAESAR. IIII. VIR. R. P. C.

EX. A. D. V. K. DEC. AD. PR. X. IAN.  
SEX.

VT alias omittam ueteres inscriptiones, quas  
in unum collegit Aldus filius. Quod autem, Ex a.  
d. Kal. Mart. malo legere, quam, Ex a. d. x. Kal.  
Mart. infirmis in eo rationibus moueri me non ar-  
bitror. Kalendas enim Martias omnino designari,  
non x. Kal. Mart. ex eo quod proxime supra di-  
ctum est, intelligitur: Perspecta Cn. Pompeij uo-  
luntate in eam partem, ut eum decedere post Kal.  
Mart.



Mart. placeret. Maxime autem confirmat opinionem nostram id, quod sequitur paucis interiectis uerbis: Ne ue quid prius ex Kal. Mart. ne ue quid coniunctim referretur a cōsulibus. Idem dies, eademq. res ep. 3. lib. 8. ad Att. ostenditur. M. Marcello consuli finienti provincias Gallias Kal. Mart. restitit. Quod attinet ad modum loquendi, Ante diem, ualet Ad: non enim hoc loquendi genere mutatur is dies, qui deinde nominatur. itaque quod est ep. 22. lib. 12. Ad XIII. Kal. Ian. senatus frequens mihi est assensus: in Phil. 14. est, Memoria tenent, me ante diem XIII. kal. Ian. principem reuocandae libertatis fuisse. Et ep. 5. lib. 16. qui dies sequitur nonas Nou. appellatur ante diem IIX. id. Nou. quem IIX. id. esse constat. Gellius quoque lib. 15. cap. 28. Ciceronem dixit esse natum ante diem III. non. Ian. is uero dies III. non. Ian. uocatur epist. 5. lib. 7. ad Att. Saepe autem imperiti librarij, cum a. d. non intelligerent, scripserunt ad. quod mendum irrepsit in libros, in lapides non potuit, nec multorum utemur testimonio: unum uidimus apud familiarem nostrum, uirum optimum, & eruditissimum, Fuluium Vrsinum, ita inscriptum.

CN. CINNA. MAGNO

L. VALERIO. VOLESO. COS

A. D. XIII. K. APRILIS

AD. MONUMENTVM. SOCIORVM

IN. CONVENTV. HABENDO. CYRATORE

h 3 C. PE-



C. PETRONIO. C. F. FAL. VARIA. A-  
CTVM. EST

ET. ITA. DECREVERUNT. LOCVM. L.  
SEMPRONI

D. L. HILARI. ET. OLLAS. V. DARI.  
ADSIGNARI

G. PETRONIO. C. F. FAL. VARIAE. CV-  
RATORI

OB. PIVM. OFFICIVM. INDVSTRIAM.  
ERGA. SOCIOS

EIVS MONVMENTI. ET. SOCIVMQVE.  
EVM. ADSCIVER

eadem. pag. 265

*SEX 3 maliam, Eos. ut omnes a iudicijs ab-  
ducti adessent in senatu. sic infra locutus: Quos  
eorum ex S.C. cum imperio in provincias pro prae-  
tores mitti oporteret, eos sortito in provincias mit-  
ti placere.*

eadem. pag. 265

*INTERCEDENDI, impediendi, 3 satis erat,  
Impediendi: quo uno uerbo & intercessio, & quid  
quid impedimento potest esse, continetur. nam &  
paullo post subiunxit, Qui impedierit, non, Qui in-  
tercesserit, impedierit. itaque suspicatus quando-  
que sum, Intercedendi, abundare. sed hoc & du-  
bium est, & parui refert: itaque magnopere nec  
affirmo, nec, si quis contra uelit disputare, contem-  
derim: liberam cuique iudicium relinquitur.*

eadem.



eadem. pag. 265

C. VIBIVS Pansa. § qui consul, mortuo Caesare, fuit cum A. Hirtio. Antea, Iulius, mendoſe.

eadem. pag. 266

PRAETORII propraetores § cum imperio tamen omnes : quod belli gerendi cauſſa neceſſarium fuit : de eo Caesar his uerbis lib. i. de bel. ci. In reliquas prouincias praetoriū mittuntur : neque exſpectant, quod ſuperioribus annis acciderat, ut de eorum imperio ad populum feratur. Et hic proxime ſequitur, Neque in prouincia cum imperio fuerunt. In uulgatis, Praetoriū pro praetore. Fortaſſe legendum, Praetoriū pro praetoribus. quod poſtulat uſus Latinae linguae : & a contraſta ſcribendi ratione manare mendum facile potuit.

eadem. pag. 266

COLLEGIVM primum § ſignificantur qui proxime praetores fuerunt : qui, ſi praeteriti numerentur, primi occurrunt. malim tamen, Proximum : quo modo locutus eſt infra.

## EPISTOLA. IX pag. 268

OBIURGATVS. § pro, Obiurgauit : ut, iuratus, pro iurauit, & Rebellatos, pro rebellauiffe, dixit Valerius Max. lib. 9. cap. 10. Interdum tamen orta mihi de mendo ſuſpicio eſt : quod fortaffe ſcripſerit Coelius ; Obiurgat. ſcilicet hac repulſa ſe mutauit, & ſcilicet, unica ſcriptum lit-

b 4

tera



tera S, occasionem dederit loci deprauandi. omnes tamen libri ueteres in, Obiurgatus, consentiunt. itaque potest antiquum esse, & ideo Coelianum.

eadem. pag. 269

MAIOREM partem § pro, Ex maiore parte: ut ep. 15. lib. ix. Mihi licere, res has non omnino quidem, sed magnam partem relinquere. Et alibi saepius. Et Caesar lib. iv. de bel. Gal. Maximam partem lacte, atque pecore uiuunt, Et Lucretius lib. iii. Non minimam partem mortis formidine aluntur.

eadem. pag. 269

AGROS, quos fructuarios habent ciuitates, § ita legitur in duobus uetustis libris Io. Scaevae, & in libro Petri Bembi, etiam in uno Caroli Sigonij. itaque nihil muto, cum sit aperta sententia.

### EPISTOLA. XI pag. 273

DECRERANT, § non equidem is sum, qui diuinationibus, praesertim quae sola coniectura nititur, facile acquiescam: uerumtamen, ubi nec sententia repugnat, & mutatio levis est, cur libertatem ingenij eripiam? Hoc quidem in loco, qui nunc in manibus est, cum antiqui libri plerique haberent, Deerant; nonnulli, Deferant; alij aliter; ex hac uarietate sum adductus, ut probarem, Decrerant:



crerant : qua sententia , nunc exponam . L. Domitius Ahenobarbus , & P. Scipio , Pompeij socer , uterque Caesaris inimicus , cum inique ferrent transigi de supplicationibus Ciceronis , easque Curionis tribuni pl. intercessione cuperent impediri : simulatione benevolentiae supplicationes decreuerunt , ut ea re Curionem , omnibus Pompeianorum actionibus acriter aduersari solitum , ad intercedendum elicerent . Accedit Coeliani sermonis consuetudo . paullo enim ante dictum est , Non decrerat supplicationes . Et in Verrem dixit Cicero , Decreisset .

## EPISTOLA . XII pag. 274

COLLEGIUM § augures , ( erat enim Appius augur ) ut aliquid contra Coelum molirentur . Alij ex coniectura , parum necessaria , contra ueteres omnes libros legendum putant , Collegam , idest Pisonem censorem : quod hoc tempore censuram gerebat Appius .

eadem. pag. 275

PALAM Seruium § nihil muto : uideant tamen eruditi , an sit rectius , quod monui adolescens in Scholijs nostris , Polam Seruium , quem Cicero nominat , ut accusatorem , lib. 2. ad fr. epistola 2. & Coelius ipse paullo post : Vix hoc erat Pola elocutus .

eadem.



eadem. pag. 275

POLA elocutus, § uix hoc Pola Seruius accusator dixerat. Antea, Praelocutus. ego, cum in antiquis libris uiderem, Pole locutus, legendum putavi, Pola elocutus. posset etiam, Polae locutus: idest, uix Polae dixerat Appius, cupere se mihi accusatorem ponere. nam & paullo ante Coelius cum dandi casu idem uerbum coniunxit, Amicis, inquit, locutus sum.

eadem. pag. 275

COEPI facellum, in domo quod est, ab eo petere. § Censorum erat curare, ut facella non in domo cuiusquam essent, sed populo paterent. itaque Linius lib. XL. ubi loquitur de Lepido, & Fulvio censoribus, Complura, inquit, facella, publicaue sacra, occupata a priuatis, ut paterent essentque populo, curarant. Coelius autem, ut ostenderet, Appium censorem officio suo deesse, petere coepit ab eo, ut facellum in domo priuata ne relinqueretur: cuius rei cura Appij, qui censor erat, esse debuerat. Sed libetius intellexim de facello, quod ipse Appius occupasset: ex quo grauior ei concitata esset inuidia, occupatis rebus a censore, quas censor, ab alijs occupatas, populo restituere deberet.

eadem. pag. 275.

SCIS Domitio diem timori esse? § similiter locutus ep. 14. Scis Appium censorem hic ostenta facere? sed cum obscura sententia est: tum  
ita



ita discrepant inter se ueteres libri, ut, obscuro per se loco, maiores etiam tenebras offundant. In uno meo scriptum est hoc modo, Diem timor est exspectatio ualde & quamprimum. in uno Sigonij, Diem tu morare exspecto & quamprimū: in altero eiusdem, Timor est exspecto ualde & quamprimum. In nullo quidem uidi, Timori esse.

## EPISTOLA. XIII pag. 276

STOMACHO est scilicet Pōpeius Magnus; dixi olim, Scilicet Pompeius, mihi uideri esse glossema ad uerbum Magnus: nec aliter nunc uidetur.

eadem. pag. 276

VT RATIO esset eius habenda, & hoc totum ita legitur in antiquis libris: Ut ratione eius habenda, qui exercitum, neque prouincias tradere. quod ita mendosum est, ut omnis mihi quidem ad correctionem aditus intercludatur. relinquo non inuitus, quod alij quaerant. Sententia quidem haec uidetur esse: Transierant senatores in alia omnia, id est probauerant Curionis intercessionē, improbantes M. Marcelli sententiam; tamquam ratione illius habenda, qui neque exercitum, neque prouincias traderet. Hoc, ut dixi, arbitror significari. Sed addere uerbum, Neque, contra ueteres libros non audeo: nisi si, ut est omnino asper durusq. Coelij sermo, scriptum ab eo putemus,  
Qui



*Qui exercitum, neque provincias traderet; pro,  
 Qui neque exercitum, n. p. t: ut, Neque, tum ad  
 exercitum, quam ad provincias referatur. Venit  
 etiam in mentem, hoc dumtaxat a Coelio scriptum.  
 Transferant illuc, ut ratione eius habenda. glossam  
 autem esse id, quod sequitur, additam ab interpre-  
 tante pronomen illud, Eius: cum hoc pronomine  
 Coelius Caesarem significare solitus sit: dixit enim  
 ep. vii. Perſpecta Cn. Pompeij uoluntate in eam  
 partem, ut eum decedere post Kal. Mart. placeret.  
 Cum Caesarem significet, minime tamen antea no-  
 minatum.*

*eadem. pag. 276*

*LATURVS sit, cum cognoscat, & unus Si-  
 gonij liber, & meus, Laturus est iste, cum cogno-  
 scam: alter eiusdem, Laturus, cum iste cognoscā:  
 itaque subesse uitium suspicor.*

*eadem. pag. 276*

*FUTVRVM & uideo, quid dicatur: sed ex inge-  
 nio emendatum existimo: nam ueteres omnes libri,  
 Futurus, habent, quod uidetur ad Pompeium re-  
 ferri.*

*eadem. pag. 276*

*SI AUT non curet, & sic antiqui libri. mu-  
 tilus locus est, aut certe deprauatus.*

#### *EPISTOLA. XIV pag. 277*

*N V N C in expectatione est, & ubicumque  
 scriptos*



scriptos libros, praesertim & multos, & uetustiores, dissentire uideo ab impressis: operae pretium puto, lectorem admoneri. nam, etsi perspicue patet sententia, uidendum tamen, eius ne sit, qui librum composuit, an eius, qui descripsit, aut emendare conatus est. Hic antiqui libri, quos quidem ego uiderim, omnes, in omnibus uerbis aliter habent, atque in uulgatis legitur: Non, pro Nunc: In, nō habent: Expectationem, pro Expectatione: Inest, pro Est.

eadem. pag. 277

SE ERUMPIT. § sic liber Sigonij, & recte: ut cum proximo uerbo, Recedit, congruat: nam si, Erupit, legatur, ut est in plerisque antiquis libris, reponendum erit, Recidit pro Recedit, contra uetorum librorum auctoritatem. Erumpit, & Erumpit se, ueteres dicebant. Caesar lib. 2. bel. ci. Portis se foras erumpunt. Virg. lib. 1. Georg.

Aut ubi sub lucem densa inter nubilia sese

Diuerſi erumpunt radij. Et l. 1v. ibidem:

Et caput, unde altus primū se erumpit Enipeus.

Et lib. 111. Aen. Interdumque atram prorumpit ad aethera nubem.

Lucretius lib. 1v. Tandem ubi se erupit neruis coniecta cupido, Parua fit ardoris uolenti pausa parumper. Attius Epigono, apud Nonium: Imperitus stupiditate erumpit se, impos consilij. Erumpere stomachum, dixit Cicero ad Attic. lib. xv. Lege arcano conuiuius tuus, sed, si me  
amas,



amas, hilaris, & bene acceptis: ne in me stomachum erumpant, cum sint tibi irati. Et Terentius Eun. Iam ne erumpere licet hoc mihi gaudium? Sic, Emergit, & Emergit se, probavit antiqua consuetudo. Cicero de harusp. resp. Tum se emergit, & fertur illuc. Nepos in Attici vita: Quibus ex malis ut se emerferat.

eadem. pag. 278.

DE AGRI modo, § sic malui, contra ueteres omnes libros, quam, De agris modo. quam enim sententiam habet, De agris modo? at, si legamus, De agri modo, hoc significabitur, egisse acerrime Appium censorem de moderanda agrorum possessione: quod maiorum memoria fecerant C. Licinius, & L. Sextius tribuni pl. lege lata de agrorum modo, ne quis ultra Diugera agri possideret. Liuius lib. VI. & Epitome lib. LII. Eandem rem significat, & eodem modo locutus est Varro lib. I. de re rust. Licinij Stolonis, inquit, maiores de modo agri legem tulerunt. Cicero etiam in epistola ad Atticum lib. XIII. de modo agri mentionem facit. Ut alia eiusdem, & aliorum exempla praetermittam.

#### EPISTOLA. XV pag. 280

COHORTIBVS § pro, Cum cohortibus. sic enim interdum locutos esse ueteres animaduerti. Quidam legunt, Cum cohortibus: quibus fortasse assentirer,



assentirer, si, Cum, in ullo antiquo libro reperi-  
rem. Sed additum fortasse a rudibus Latinae Lin-  
guae, quos offenderet minus observata loquendi  
ratio. exempla aliquot afferam. Cicero Philippi-  
ca ultima: His viginti cohortibus, nullo equitatu  
conflixit. Livius lib. 1. Egressus omnibus copijs,  
partem militum locis circa densa obsita uirgulta  
obscuris subsidere in insidijs iussit. Et lib. 41. Eo-  
dem decem nauibus C. Furius, duumuir navalis,  
uenit. Et Q. Curtius lib. 1 v. Vnchas peruenit,  
ubi excepere eum Graecorum quattuor millia, qui-  
bus ad Euphratem contendit.

eadem. pag. 280

QUANTVM ipse cadenatus ante multos an-  
nos in omnibus vulgatis libris legebatur, Ipse ca-  
tenatus. Octavius Pantagathus, uir bonis omni-  
bus ob insignem probitatem, & doctrinam iure ca-  
rissimus, cultus a me semper optimi parentis loco,  
legendum primus existimauit, Psecade natus: ut  
significetur Bellienus uerna. Psecas enim ancilla  
est: uernas autem eos esse, qui ancillis nascantur,  
nemo nescit. Si Bellienus, ait Coelius, ancilla na-  
tus, Domitium comprehendere, & strangulare  
non dubitauit: quid Caesari, Venere prognato, in  
uestro Domitio faciendum fuit? Commendat igitur,  
ac ualde probat Pantagathi opinionem anti-  
thetorum gratia; (nam Coelius Coeliano illo more,  
hoc est perargute, Psecade natus, & Venere prog-  
natus, opposuit) confirmat ueterum librorum au-  
thoritas,



*Et oritas, in quibus fere omnibus est: Ipse cadentatus; ut, una detracta litterula, I, suus loco nitor, suaq. reddatur integritas. De Psecade si quis exempla quaerit, Iuvenalem legat Sat. VI. & Ovidium lib. 3. Met.*

EPISTOLA. XVII pag. 282

IN ISTA parte, & in qua tu es. Verum totus hic locus obscuratur mendo. Mediceus liber: *Quod utinam aut Ap. Claudius in ista parte, C. Curio. unus Sigonij: Cum Curio: cetera eodem modo. alter eiusdem, Aut C. Curio: cetera eadem. Tres mei: Quod utinam aut Ap. Claudius in ista parte prohibuisset, aut C. Curio. In tanta perturbatione uideant eruditi homines, an emendare locum possint: ego ne conari quidem audeo. uarietatem antiquorum exemplarium fideliter ostendi.*

eadem. pag. 282

IN hanc portam causam & sic & Mediceus liber, & quidam alij: meus unus, Partem causam: Sigonij, Parte causam: alter eiusdem, Partem causae: quod sententia non respuit.

eadem. pag. 282

PORRO, & sic lego ex duobus antiquis libris, nisi si, Tu Tu porro, placet: ut geminato pronomine maior ostendatur iracundia. in quo liber Petri Pagani cum Mediceo consentit.

eadem.



eadem. pag. 282

ARIMINVM uenissēmz Arimini, habet unus Sigonij liber. Placuit, Ariminum, ut est in altero eiusdem, atque etiam in meo. postulat enim sententia, & usus Latinae linguae, Ariminum, potius, quam, Arimini. Veteres aliquot libri, in quibus est Mediceus, habent, Venissent: mendoſe.

eadem. pag. 282

NEQVE mihi consuluiſti nullam mei curam suscepisti. ep. 2. lib. 3. Proſpicias, & consules rationibus meis. Fortasse scripsit Coelius, Mi, non Mihi. quod ideo dico, quia tum in Mediceo libro, tū in ceteris omnibus, Me, scriptum est. E autem, & I, quam facile commutentur, periti antiquitatis intelligunt.

eadem. pag. 282

NISI Pompeianus. omnes antiqui libri, etiam Mediceus: Nisi est Pompeianus.

eadem. pag. 282

PLEBS, z cum Populi nomen plebem quoque contineat, & de populo sequatur mentio; miror hic Plebem nominari: & omnino mendum olere locus uidetur. quam suspicionem auget uarietas ueterum librorum. tres habent, Partes: cum quibus Sigonianus unus consentit: alter habet, Pios: unus, Pius: Mediceus, Pies. Hic ego me non explico: exitum fortasse reperiet aliorum industria, quod si mutare liceat; malim, Patres, quam.  
i Plebs:



*Plebs : ut senatores eos , qui , neutram in partem animo propensi , in urbe remanserant , opera sua Pompeianos factos esse dicat : tum de populo subiungat . Nec temeraria mutatio uideri potest , si ex , Partes , fiat , Patres , praesertim adiuuante sententia .*

*eadem . pag. 283*

*RELIQVA exspecta : § ualde hic & ab impressis , & inter se dissentiunt scripti libri . Mediceus , & duo praeterea , Reliquas exspectant . alij , Reliqui exspectant , Reliqua exspectant , Reliquos exspectant . Mihi non displicet , Reliqua exspectant : ut dicat Coelius , populum reliqua exspectare , id est , ut aliquam ipse Coelius in urbe seditio- nem commoueat .*

*eadem . pag. 283*

*ARRVNTANVM me Catonem . § Sic Mediceus liber , sic reliqui fere omnes : mendose : tamen lectorem uestigio saltem ueritatis fraudandum non putauit : ut eruditus hominibus liberior , ac facilius coniectura detur , cognito ueterum librorum testimonio . M. Catonem , pro , Me Catonem , est in uno Sigonij libro .*

*eadem . pag. 283*

*QVOD firmissimum est ? § ex parte Caesaris . Mediceus liber , & alter Petri Pagani , Haec , non Est . in quo si consentirent reliqui ; legendum ,*



gendum, & distinguendum sic arbitrarer: Quod fir-  
missimum? nec uestras copias non noui. id est: nec  
uestras copias ignoro, minime cum nostris conferen-  
das. Verum duo libri habent, Est: quod placet.



## EPISTOLA. V pag. 259

IN quodam incilicia omnia & sic Medicus  
liber, & qui fuit Vbaldini. Sigonij unus, In  
quodam incilicia omnia: Ioannis Scalac, In quo-  
dam omnia in Sicilia: Maffeorum, In quodam ui-  
tilicra omnia. Mendum patet: nec displiceret, In  
quodam incili iam omnia: quod olim placuit. In-  
cilia fossae sunt, in quas ex fossis aquae deriuatur.

eadem. pag. 259

QVI, sua causa, rep. non curent, & sic  
plane in plerisque antiquis libris. mihi uidetur,  
cum de uno Caesare sermo habeatur, legendum, Cu-  
ret. nam is, suae potentiae causa, rep. non cu-  
rabit. Adiuuat & confirmat opinionem nostrā Ful-  
uij Ursini liber, in quo est, Qui sua cū rep. nō curet.

eadem. pag. 259

SUPERET & supersit, reliquum sit: id est, quan-  
tū in hoc Caesar negotij sit habiturus. sic l. v. de Fi.  
De eo, quod ipsis superat, alijs gratificari uolunt.  
& ad Att. l. 13. Si quid aere meo alieno su perabit.

i 2

IN LIB.



# IN. LIBR V M. IX

## EPISTOLA. I

PAG. CCLXXXIV

I  
N EO } sic ueteres libri omnes.  
fortasse refertur ad, *Usum*. dixit  
enim, *Eorum usum dimiseram*.  
quod tamen distat longius. Vel,  
In eo: quod praeceptis illorum pa-  
rueris. in quo ego non permansi. quamquam hoc  
falsum uidetur. nam & Varro Pompeium secutus  
est, fuitque una cum Cicerone, & M. Catone Dyr-  
rhachij, cū in Pharsalicis campis dimicarunt Cae-  
sar, & Pompeius. lib. 1. de *Diuin.* Itaque malim  
accipere, In eo, idest in eorum usu, quem ego di-  
misi. ut intelligatur illud tempus, quod Pharsali-  
cam pugnam consecutum est. tunc enim Brundisij  
Cicero in maerore iacuit, nullo librorum usu, ui-  
ctorem Caesarem timens, cuius ex Alexandrino  
bello aduentus expectabatur. Varro autem, ui-  
cto in Pharsalia Pompeio, uidetur in Italiam red-  
iisse, ut ex epistola sexta colligitur, nec se maerori,  
ut Cicero, sed litteris dedisse: quod ex hac epistola  
licet coniungere.

EPI



## EPISTOLA . II pag. 286

NAVARE remp. § sic duo ueteres libri, mendose. mihi non displiceret, Iuuare remp. quod omnino sententia postulat. certe enim, quae de optimi ciuis officio scribuntur, utilia sunt reip. quod nisi ita esset, quorsum & scribere, & legere πολιτείας Cicero cogitaret? In reliquis antiquis libris, Grauari, est, non Nauare, mendo manifesto. Quidam opinantur, legi posse, Gubernare: alij, uerbo addito, Nauare operam reip.

## EPISTOLA . IV pag. 288

CHRYSIPPIAS haec, § mendosum locum esse constat. quidā ueteres libri, An Chrysippias haec. uetustiores autem omnes, An, non habent. ex quo nobis orta coniectura est, mendum tolli posse unius litterae mutatione: ut legatur hoc modo, Chrysippi, an haec.

## EPISTOLA . V pag. 288

CONSILII nostri; ne si eos quidē, qui id secuti non sunt, non paeniteret, nobis paenitendum putarem. § erant, qui Ciceronem, Varronemque reprehenderent, quod statim, post deuietum in Pharsalia Pompeium, ab armis discessis-

i 3 sent.



sent. huius nostri consilij, inquit Cicero, ne tum quidem nobis paenitendum putarem, si eos, qui id secuti non sunt, non paeniteret. cum uero eos paeniteat, quod in bello remanserint: multo minus nobis, qui saniores fuimus, paenitendum puto. Libri omnes ueteres habent, Nisi, sed mendose, ut satis liquet. itaque recte Hieronymus Ferrarius restituit, Ne si. a quibus particulis, cum praeponuntur, ad uerbum infra positum uis negandi transfertur. quod si uerbum praepōnatur, altera negatio cum eo coniungitur. id exemplo fiet illustrius. hoc quidem in loco, Ne si, uerbo praepōnuntur, & in eo tamen uerbo inest uis negandi. nam illud, Nobis paenitendum putarem, ualet, Non putarem, quia respicit superiores particulas, Ne si. quae si postponantur, addenda erit eidem uerbo altera negatio, ut ita dicatur: Nobis paenitendum non putarem, ne si eos quidem &c. Prioris generis exemplum habemus illud ep. 10. lib. 13. ad Att. Purgat Caesarem de interitu Marcelli: in quem, ne si insidijs quidem ille interfectus esset, caderet ulla suspicio. pro, non caderet. Et in Oratore: Nobis, ne si cupiamus quidem, distrahere uocales conceditur. pro, non conceditur. Et Tusc. 1. Obliti ne sumus, hoc nunc nobis esse positum, cum satis de aeternitate dixissemus, ne si interirent quidem animi, quidquam mali esse in morte. Alterum genus agnoscitur ep. 22. lib. 12. ad Att. Enitar, ut, praeter me, nemo dolorem meum sentiat, ne tu quidem.



dem. Et ibidem, ep. 35. Non habeo, ne me quidem ipsum, qui cum tam audacter comunicem, quā te.

EPISTOLA. VI. pag. 289

UTRUBIQUE § ex uerbo Scires, apte non pendet. quid enim est, Ut scires, utrubique tibi hospitium parares. nam Utrubique non significat, utro in loco, sed, utroque in loco: at hic uidetur Cicero significare, utro in loco: cum incertum esset, quid Caesar facturum esset, utrum in Alsienſe uenturus, an Ostiae exiturus. permittit enim Varro, qui Caesari obuiam ire cogitabat, ut statuatur ipse, utro in loco sibi hospitium paret. cui sententiae non seruit, Utrubique, quod affirmationem habet utriusque loci, sed potius Utrubi, quod dubitationem ostendit utrius loci. hoc autem uerbum ideo fortasse mutatum est quod eius exempla non facile inuenirentur in Latina lingua. nos ueteres grammaticos, ut interdum solemus otiosi, peruolutantes, Naenium ita locutum in Tarentilla, apud Carisium. obseruauimus, Utrubi, inquit, cenaturi estis, hiccine, an in triclinio? Idem M. Catonis haec uerba recitat ex oratione pro Hispanis: De frumento, utrubi bona, utrubi mala gratia capiat, utrinde iras, utrinde factiones tibi pares. Dixit etiam Plautus in Stichō: Utrubi accumbo? Sa. Utrubi tu uis. Et Ulpianus lib. 43. Dig. tit. xxxi. l. i. Praetor ait: Utrubi hic homo, de quo agitur,

i 4 tur,



tur, maiore parte huiusce anni fuerit, quo minus  
is eum ducat, uim fieri ueto. Ac me quidem, iam  
pridem de mendo suspicantem, hanc in coniectu-  
ram illa quoque ratio deduxit, quod in nullo uete-  
re libro, cum prope innumerabiles inspexerim, scri-  
ptum est, Vtrubique, sed in omnibus fere, Vtar  
ubique.

cadem. pag. 289

NON enim est idem § arguta sententia. Fe-  
ro, inquit, quae ferenda sunt, (quis enim cum  
temporum necessitate pugnet?) non ideo tamen  
probo, quae probanda non sunt. Simile illud ep. 3.  
li. 10. Si te ea, quae patiebare, probasse etiam ar-  
bitrarer.

cadem. pag. 289

ETSI, quid non probem quidem, nescio,  
praeter initia rerum. § Veteres libri: Et si quid  
non probem? quid enim iam scio, praeter initia  
rerum? Ut hoc dicatur: quid enim iam scio, quod  
non probem, praeter initia rerum? Vetus liber  
uetus: Et si quid non probem. quid iam nescio,  
praeter initia rerum. Ex quo libro, & ex alijs,  
uidetur haud inepte legi posse: Et si, quid non pro-  
bem quidem, iam nescio, praeter initia rerum.  
Initia uero rerum, quae non probabat in Caesare,  
illa, ut opinor, fuerant, quod consul Caesar leges  
multas contra auspicia tulerat: quod a populo pro-  
uinciam



uinciam inuito senatu acceperat: quod absens consulatum petere uoluerat: & similia.

EPISTOLA. VII pag. 291

QVOD antea calumniatus sum, & abundare, Te, semper putavi, nunc eo magis, quod, opinionem meam qui comprobaret, ueterem librum inueni. Coniecturam meam inde ducebam, quia Cicero numquam Varronem calumniatus erat, sed ipse secum, ea cogitans, uel potius ea se cogitare simulans, (hoc enim ostendunt illa uerba, Indicabo malitiam meam) quae nullo modo cogitabat. quae Calumnia recte dicitur, ut ep. 1. & 4. lib. 1. Significat autem illa, quae scripsit ep. 2.

eadem. pag. 291

VOLEBAM prope alicubi esse te, & omnes libri ueteres, Esset, uno excepto, in quo est, Esse. quo librorum consensu, ut legendum arbitrarer, Esse te, sum adductus. Vel, si legamus, Esse, sub audiendum, Te. Non displiceret, Esses; quod uideo placuisse nonnullis; si uel unum antiquum librum, qui suffragaretur, inuenirem.

eadem. pag. 291

QVANDO & sic duo ueteres libri: alij, Quoniam: nonnulli, Quom. nihil reiicio: sed, Quando, libentius retineo.

eadem.



eadem. pag. 291

EQUIS uiris, & omni conatu, manibus pedibusque subaudi, Caesari obuiam eamus. Translatio a militari certamine, quo contenditur equis, uirisque inde manauit prouerbiū. cum uero celeritas indicatur, Equis, uclis, dicitur, fugientium similitudine, terra, marique.

EPISTOLA. X pag. 295

CULINARVM & laetae cenae significantur, quibus affuit Cicero cum Nicia, & eius fortasse uxore Sophia. Hic ueteres libri discrepant inter se. habent enim, Cularum, Gularum, Tullarum, Gallinarum, Cochlearum, Ferculorum: duo, Culinarum: quos probaui.

eadem. pag. 295

UT NE in foro quidem & in uno tantum uetere libro, Quidem, inuenimus. quod ideo significandum duximus, quia, uel si tollatur, sententia tamen consistit, & fortasse rectius.

EPISTOLA. XII pag. 297

MVNVS CVLVM mittere uolui leuidentse, crasso filo, & uerbum, Volui, est in quatuor antiquis libris. itaque non uideo, cur in dubium uocetur, praesertim requirente sententia. Leuidentse autem, sine diphthongo in ultima syllaba,



ba, legitur in omnibus antiquis libris : nec de mendosus suspicari possum , cum Isidorus lib. 19. inter nomina uestium *Leuidensem* appellet, eamq. sic uocatam ostendat , quod raro filo sit , leuiterq. densata . Deinde subiungit haec : *Pauidentis*, contraria *leuidensi*, dicta , quod grauiter densa, atque calcata sit .

## EPISTOLA. XIII pag. 298

HEREDIS, § non dubito, quin sit hoc *Planij* cognomen . itaque scripsi, prima littera maiuscula.

## EPISTOLA. XIV. pag. 300

NON alienum dignitate tua , § nonnulli ueteres libri, A dignitate tua: alij, Dignitati tuae. omnes recte, quod attinet ad consuetudinem Latini sermonis : nam & dandi , & auferendi , & generandi etiam casibus *Alienum* iungitur .

## EPISTOLA. XV pag. 301

INTELLEXI pergratam tibi esse curam meam uoletudinis tuae : quam tibi perspectam esse gaudeo : § sic unus omnino uetus liber , & recte . reliqui omnes mendose , Intellexi pergratum tibi perspectum esse gaudeo.

eadem. pag. 304

IN denos dies , § quem sumptum in singulos



los dies praescribit sumptuaria lex, cum in decem  
dies distribuam. ita non modo non contra legem,  
sed etiam intra legem epulabor. Tulit eam legem  
Caesar post bellum Africanum Dione teste. uide  
ep. 26. lib. 7. & ep. ult. huius libri, & ep. 7. lib. 13.  
ad Att.

EPISTOLA. XVI pag. 305

SED ego ꝑ ratio Latini sermonis, Tamen,  
postulabat: uerum Cicero, sententiam spectans po-  
tius, quam uerba, Sed, pro Tamen, intulit.

eadem. pag. 306

OFFENSIONEM; ꝑ non laesionem. (nam sub-  
iungit, nil se loqui, quod offendat aut Caesaris, aut  
eorum, qui ab illo diliguntur, Voluntatem; sed non-  
nulla dicta, in quae, uel sine industria offendo, &  
incurro. Hoc uerbum est in antiquis libris omni-  
bus, quibus ego nunc utor, et erat in ijs, quibus ute-  
bar olim adolescens. Quod ideo testatum uolui;  
quia nonnulli de hoc loco ita scripserunt: Nulli ue-  
teres Codices, Offensionem, habent: postea mendo-  
sum hic esse librum illum, quem reliquis omnibus  
praesferre non dubitant, ijsdem confessi sunt. Omni-  
no ualde mirabar, cur illud uerbum, quod ego in  
cunctis ueteribus libris uidebant, ipsi in nullis esse  
affirmarent. Satis igitur liquet, quod saepe dixi,  
non unum, aut paucos ueteres libros, sed multos in-  
ficiendos esse, si restituere antiquitatē cupimus,  
interdum



interdum enim, ubi libri ante multa saecula descri-  
pti, mendis inquinati sunt, recentiores uacare uitio  
animaduerti. Itaque uetustiores quidem diligētius  
inquirere, nullum tamen contemnere debemus.

eadem. pag. 307

ILLOS apud me declamitare; me apud il-  
los cenitare. § Ne quis hunc locum ex ingenio  
suppletum arbitretur; moneo lectorem hoc totum  
esse in duobus antiquis libris; cum quibus olim cō  
sensisse memini librum Vincentij Riceij. Idque mea  
Scholia, ante multos annos edita, testantur.

eadem. pag. 307

TV AVTEM quod mihi bonam copiam  
eiures, nihil est § Hieronymus Ferrarius, con-  
tra ueteres omnes libros, legendum arbitratur,  
Bonam copiam iures, hoc sensu: non est, quod te  
mihi semper praesto fore, tuiq. bonam copiam fa-  
cturum iures. ut respexerit ad id, quod M. Var-  
ro scribit lib. v. de lingua Lat. Debitores non nul-  
li pro pecunia, quam debebant, operas in seruitu-  
tem dabant, dum soluerent. C. Popillio rogan-  
te, Visolo dictatore, sublatis: Et omnes, qui bonam  
copiam iurarent, ne essent nexi, dissoluti, idest qui  
sui facultatē creditoribus semper esse facturos, iu-  
reiurando promitterent. Ego autem puto hic di-  
ctum esse, Quod mihi bonam copiam eiures, pro,  
Quod iures mihi, te non habere unde sumptum  
facias. Tantumq. abest, ut ex Varrone Ciceronis  
locum emendem, ut potius ex Cicerone Varro-  
nis



nis locum putem esse corrigendum: ut legatur, Voluitque, ut ij bonam copiam eiurarent: id est, ut iurarent, se non habere, unde creditoribus satisfacerent. Mecum faciunt, ut dixi, ueteres libri omnes, praeterea Sex. Pompeius; qui nostram sententiam ita confirmat, ut dubitatio prorsus nulla relinquatur. Eiuratio, inquit, significat, id, quod desideretur, non posse praestari. Et Cicero lib. 2. de Orat. Eiero, iniquus est. Et in Verrem: Praetor prouinciam suam totam sibi iniquam eiurat. Et Phil. 12. Me iniquum eiurabant. Plautus quoque: Eiurauit militiam. Tacitus lib. 12. Adactus Syllanus eiurare magistratum. Et lib. 14. Regulus in locum Caecinae, cui dies unus supererat, consulatum iniit, eiurauitque.

eadem pag. 308

AESTIMATIONEM te aliquam putes accipere? Allusit ad aestimationem possessionum, quam Caesar per arbitros debitorum caussa fieri uoluerat, ut ij creditoribus facilius satisfacerent. Qua de re initio lib. 3. de bel. ci. his uerbis: Cum si des tota Italia esset angustior, neque creditae pecuniae soluerentur; constituit, ut arbitri darentur; per eos fierent aestimationes possessionum, & rerum, quanti quaeque earum ante bellum fuissent; atque eae creditoribus traderentur. Hoc & ad timorem nouarum tabularum tollendum, minuendum ue, qui fere bella, & ciuiles dissensiones sequi consuevit, & ad debitorum tuendam existimationem



nem esse aptissimum existimauit. Suetonius etiam in Caesare, De pecunijs, inquit, mutuis disiecta nouarum tabularum expectatione, quae crebro mouebatur, decreuit tandem, ut debitores creditoribus satisfacerent per aestimationem possessionum, quanti quasque ante ciuile bellum comparassent, deducta summa aeris alieni, si quid usurae nomine numeratum, aut perscriptum fuisset. qua condicione quarta pars fere debiti deperibat. Cum igitur Papirius ex eo Caesaris decreto magnam a debitoribus plagam accepisset, aestimatis eorum possessionibus, non quanti essent eo tempore, sed quanti ante ciuile bellum fuissent, iocans, ut solet, Cicero, Ne credas, inquit, cum me hospitio recipias, aestimationem te aliquam accepturum. Et dixit, Aestimationem aliquam, tamquam si, magnum aliquod damnum, dixisset. Papirius enim aestimationes, id est praedia per arbitros aestimata, a debitoribus accipiens, crediti iacturam non minimam fecerat; cum quarta fere pars debiti, ut dixit Suetonius, deperiret. Deinde sequitur: Etiam haec leuior est plaga ab amico, quam a debitore: hoc est: & tamen, quod ab amico bona tua comedantur; non id tibi aequae graue esse debet, atque illud est, quod debitorum causa deperdis: a quibus possessiones, quanti uendere numquam poteris, accipiendae tibi sunt. Eaedem aestimationes infra nominantur ep. 18.

eadem.



TEMPERIVS § maturius. refero enim ad tempus, non ad frugalitatem. hoc uerbum alibi semel dumtaxat, quod equidem legendo obseruauerim, usurpatum inuenio. sic autem locutum esse Cornelium Nepotem, Ciceronis aequalem, ex Donati uerbis, quae sunt in Terentij uita, facile possum conijcere. Nepos, inquit, auctore certo comperisse se ait, C. Laelium quondam in Puteolano Kalendis Mart. admonitum ab uxore, temperius ut discumberet, petijse ab ea, ne interPELLARETUR: se rius tandem ingressum triclinium dixisse, non saepe in scribendo magis successisse sibi: deinde rogatum, ut scripta illa proferret, pronunciaſſe uersus, qui sunt in Heautontimorumenos:

Satis, pol, proterue me Syri promissa huc induxerunt. Ouidius, & Columella, Temperius, dixere: quod recentius uidetur, deductum a tempus temporis: temperius autem, antiquum, a tempus temperis: quemadmodum dixere ueteres, Pignus Pigneris, unde Pignero uerbum: posteriores autem, Pignus pignoris. Plautus in Per. Temperari hanc uigilare oportet formulam, atque aetatu- lam. Et infra: Cedo partem, quam pepigi. To. temperi. Et in Rud. Qui sua uult temperi conficere negotia.

eadem. pag. 308

DELECTARI § sic in quinque libris antiquis, & duobus praeterea Caroli Sigonij: nonnulli, De-  
bilitari:



bilitari: unus, Delibitari: quasi leuiter pasci: a  
Delibo.

eadem. pag. 308

SANNIONVM parum: § plerique ueteres li-  
bri, Sannonum, duo Sannionum, quos probaui.

EPISTOLA. XVII pag. 309

QUANDO § sic libri septem ueteres: duo, Quo-  
niam; unus, Cum.

eadem. pag. 309

VIR fortis, idemque philosophus, § sic  
omnes, quos ego uiderim, antiqui libri. & est  
peruenusta sententia. Cum, inquit, & uiri fortes  
ex animi quadam praestantia, & philosophi ex  
doctrina, patriam, honestatem, libertatem ui-  
tae anteponant; ego tamē, qui utrumque profitcor,  
& uirum fortem, & philosophum, uiuere pulcher-  
rimum duxi. Idem locutus est e. 2. Caninius idem  
tuus, & idem noster. Et lib. 2. de Diuin. Marcel-  
lus, idem imperator, idem augur optimus. Cum  
igitur & ueterum librorum testimonium, & sen-  
tentiam ipsam, & consuetudinem loquendi sequar;  
dissentire cogor ab ijs, qui non, Idemq. sed, Idem  
quod, legere maluerunt. numquam enim, quoad  
quidem per me liceat, studiosum lectorem fraudari  
ueritate patiar.

eadem. pag. 309

NON modo me, § qui legendum opinaban-  
tur, Non modo non me, sine caussa discedebant ab  
omnibus antiquis libris. uide, quae diximus in lo

k cum



cum illum ep. 9. lib. 1. Non modo praemijs, sed ne periculis quidem compulsus ullis.

EPISTOLA. XIIX pag. 311

AESTIMATIONES tuas uendere non potes, & hunc locum qui recte interpretaretur, neminem uideo fuisse. significat autem possessiones per aestimationem a debitoribus acceptas; & quae admodum supra ep. 16. posuit Aestimationem pro rebus aestimatis.

EPISTOLA. XX pag. 312

UT scurram uelitem, & tamquam militem parum utilem. nam uelites, tirones erant, & minimam in exercitu operam praebebant, neque sua uexilla, neque suos centuriones habebant. Liuius hastas, gladium, parmam ijs tribuit lib. 31. & lib. 38. cum tamen iacula, non hastas, quo primum tempore sunt instituti, septena habuissent, ut idem Liuius lib. 36. ostendit.

eadem. pag. 312

NEC tamen ad hanc insolentiam, & Plane ab ijs dissentio, qui mendum esse in uerbo, Insolentiam, existimarunt. est enim hic Insolentia nimius sumptus, qui fiebat in cenas: a quo se alienum esse Cicero dicit, lautitiam tantum quaerere. quod etiam ep. 15. his uerbis ostendit: Nec tamen eas



eas cenas quaero, ut magnae reliquiae fiant, quod  
 erit, magnificum sit, & lautum. Insolentiam eo-  
 dem sensu posuit Philipp. ix. Magnifice enim, in-  
 quit, Ser. Sulpicius maiorum continentiam dili-  
 gebat, huius saeculi insolentiam uituperabat. Et  
 in oratione pro Sex. Roscio: Qui in sua re fuisset  
 egentissimus, erat, ut fit, insolens in aliena. Tol-  
 latur igitur omnis mendi suspicio, & elegans Lati-  
 ni uerbi significatio conseruetur.

eadem. pag. 312

CUM in sumptum habebas: 3. uetustio-  
 rum librorum haec est lectio: quam alij quoque  
 receperunt, licet eam, ut ipsi dixerunt, mendo-  
 sam suspicati. mihi ea uel maxime probatur, ut  
 desiderari nihil credam. dixit autem, Cum in su-  
 mptum habebas, pro eo quod dicimus; cum ad su-  
 mptum copiae suppetebant; cum pro sumptu facul-  
 tates aderant; cum erat tibi, quod esset in sumptum  
 satis. sic enim hoc loco, In sumptum, idest, pro  
 sumptu, dixit, quemadmodum etiam ad Atticum  
 ep. 5. lib. 8. Tironem Curio commendes, ut ei, si  
 quid opus erit, in sumptum croget. Epistola etiã,  
 quae sequitur, eodem libro, Sed enim, inquit, ui-  
 deo, in sumptum ab alijs mutuatum. Et ad eun-  
 dem lib. xv. Velim cures, ut permutetur Athenas,  
 quod sit in annum sumptum. Imitamur igitur lau-  
 titiam tuam, inquit, non hanc recentem, satis te-  
 nuem, sed illam ueterem, cum habebas in su-  
 mptum: etsi nunc quidem plura praedia tibi sunt:

k 2 quae



quae scilicet a debitoribus pro pecunia, quam credideras, inuitus accepisti, aestimata ex edicto Caesaris, quanti quaeque ante civile bellum fuissent.

Haec quasi per iocum dicta sunt; ut irrideatur Pae-  
tus, qui non habeat in sumptum, ut antea; cum  
ei possessiones multo, quam antea, plures sint:  
quas uendere cum uellet, non poterat: ut est in  
ep. 18.

eadem. pag. 313

EX ARTIS } mendum subesse quis non uidet?  
antiqui libri quinque habent, Ex arcis: unus, Ex  
orcis: reliqui, Ex artis. nihil horum est, in quo  
animus acquiescat. quidam legunt, Et artis. non  
improbo coniecturam: licet particula, Et, otiosa  
uideatur esse. potest hoc referri ad uerbum, *ϕι-  
μαδεῖς*. ut hoc dicat: quamquam sero didicerint ce-  
nas facere, tamen artis tantum iam sum ade-  
ptus, ut Verrium. &c. Ex areis, olim pla-  
cuit: nunc in dubio sum: tum quia Cicero non ab-  
undabat hoc tempore; itaque dixit epist. 15. Do-  
num si habebo, in denos dies singulos sumptuariae  
legis conferam: Et ep. ult. Epulamur una non mo-  
do non contra legem, si ulla nunc lex est, sed et-  
iam intra legem, & quidem aliquanto. Tum et-  
iam quia non hic suas copias, uerum audaciam ex  
tollit: inopiam autem potius indicat, cum ait in-  
fra: In ea cena coquus meus, praeter ius feruens,  
nihil potuit imitari. Praeterea, cum inuitantur  
ad



ad cenam mundi homines, & elegantes, quales hic Verrius & Camillus vocantur; non tam sumptu, quam lautitia, & scientia opus est, ut eleganter potius accipiantur, quam opipare. Haec sunt, cur id, quod olim nobis placuit, nunc paene displiceat.

## EPISTOLA. XXI pag. 313

ILLVD a Trabea, § cum Papirius ostendere uelit Ciceroni, se frustra ipsius orationes imitari, Trabeae poetae uerbis id ostenderat. quod reijcit Cicero, ac potius sibi illud ipsum a Trabea opus esse affirmat. nam cum Papirius non solum consequatur, sed etiam uincat; suum esse, frustra conari, affirmat. *ὁ τὸ ἄγμα* igitur meum: subaudi, est. tu enim omnia, quae uis, consequeris. quod ego non possum: itaque *ὁ τὸ ἄγμα* meum est, non tuum.

eadem. pag. 314.

CCCXII. § hoc ad censuram refero: nam consulatus biennio anteceffit, ut ait Liuius, eosdem, quos Cicero, auctores secutus. nam Verrius horum consulatum anno urbis CCCIX, censuram autem anno CCCXI collocauit.

eadem pag. 315

FUGIT Marcus ex Sicilia. § cum in ea praetor, aut quaestor, aut legatus esset. Hoc totum alij

adtexunt



adtexunt ad superiora, & legunt, Fur magnus ex Sicilia, non attendentes, si ita legatur, de tribus fratribus Marcum praetermitti.

EPISTOLA. XXII. pag. 315

VIRGINEM me quōdam inuitam per uim uiolat. § potest hoc esse eiusdem Thebes in Alexandrum tyrannum. Violat, modeste dixit. antiqui enim, ut lib. v. de ling. Lat. scripsit Varro, Violauit uirginem, pro Vitiauit, &, Cum muliere fuit, pro Concubuit, modeste dicebant.

eadem. pag. 316

PENICVLVS: § in antiquis libris, &, Peniculus, est, & Penicillus. Festus Peniculum appellat, quo calceamenta tergentur: & ait a Pene ductum, idest cauda. Plautus quoque in Men. act. i. Iuuentus, ait sub persona Parasiti, nomen fecit Peniculo mihi, Ideo quia mensam, quando edo, detergeo.

EPISTOLA. XXIV. pag. 319

COMMVNITATEM § ut simul uiuatur, animusq. remittatur sermone familiari. Placet alijs, Comitatem: sed libri ueteres aduersantur omnes.

EPI-



## EPISTOLA. XXV pag. 320

ADES ad imperandum, uel ad parendum  
 potius: sic enim antiqui loquebantur. § Scri-  
 pta ueterum interiere, in quibus hic loquendi mo-  
 dus crebrior fuit. unius igitur Sallustij utemur te-  
 stimonio. Iugurtha, inquit, ubi armis, uirisque,  
 & pecunia spoliatus est, cum ad imperandum Tif-  
 drum uocaretur, rursus coepit flectere animum  
 suum. Ad imperandum, idest ut ei imperaretur,  
 ad parendum: quod Cicero subiunxit. Hunc loquen-  
 di modum et Seruius agnouit in illo Virgilij uersu:  
 Frigidus in pratis cantando rumpitur anguis. Can-  
 tando, inquit, dum incantatur.

## EPISTOLA. XXVI pag. 321

HARVM exemplum § cum Cicero apud Vo-  
 lumnium Eutrapelum cenaret, hanc epistolam ad  
 Papirium in codicillis conscripserat: eo consilio,  
 ut, cum domum redisset, eam in charta exscribe-  
 ret, & ad Papirium mitteret. propterea, Ha-  
 rum exemplum, dixit. non enim in animo habe-  
 bat, eas ipsas mittere, quas scribebat, quas uo-  
 cat Exemplum, sed eas, quas inde exscribere co-  
 gitabat.

eadem. pag. 322

SERVITVTVM nostram? § sic ueteres ali-

k 4 quot



quot libri, non, Seueritatem; idque puto recte, seruitus enim per se tristis: re autem nulla magis, quam conuiuio, exhilaratur.

eadem. pag. 322

HAUD possem uiuere, & sic libri quattuor antiqui: reliqui omnes, Aut. utroque modo recte. quamquam, Haud, & Aut, possunt idem esse: cū ueteres quandoque, Haut, pro Haud, scripserint.

eadem. pag. 322

ET SI minimum mihi est in cena, & postea quam in litteris satis uersatus sum, etsi cenam in minimis pono; tamen, cum aliud, quod agam, non habeam, ad cenas me confero. Iocatur autem in his uerbis, Minimum mihi est in cena, referens uerba Papirij: qui cum Dioni philosopho posuisset illud ὀλίγη, esset ne aliquid minimum; negassetq. Dio; (negant enim philosophi, quidquam esse in magnitudine minimum; cum tam parua magnitudo nulla sit, quae non diuidi queat) iocans Papirius adiecit, Mihi uero minimum est in cena; cum cenam sibi tenuiter admodum paratam esse indicaret.

eadem. pag. 322

Nec Aristippus quidem ille Socraticus erubuit, & sic tres ueteres libri: octo autem, Aristippus quidem ille Socraticus non erubuit. utroque modo recte. nam, quod alij, Germanos secuti, maluerunt, Ne Aristippus quidem ille Socraticus erubuit: discedunt ab antiquis libris: in quibus,



quibus, Ne, non reperitur. Quod autem, nullos ueteres libros habere, Non erubuit, ijdem dicunt: mirari non satis possum: cum in octo, ut iam diximus, ita legatur.

eadem. pag. 322

NE NUNC senem. § sic locutus est Liuius lib. 3. Nouam, inquit, inexpertamq. eam potestatem eripere patribus nostris: ne nunc, dulcedine semel capti, desiderium ferant. Hunc Ciceronis locum unico adhuc Liuij exemplo, cum Latinorum scripta non omnino negligenter euoluerim, confirmare mihi licuit. Differt autem Ne nunc a Nedum: quia Nedum ad omnia tempora, Ne nunc ad praesens tantum accommodatur: & ualet, Ne dum nunc.

eadem. pag. 322

ET gemitum & in risus maximos transfero. § sic plerique ueteres libri, nec male: ut alterum, Et, ualeat etiam: & hoc dicatur: a maestitia, & gemitu uel maximos ad risus me conuerto. Omnino planius esset, quod in duobus legitur antiquis libris, Et gemitum etiam in risus maximos transfero.

eadem. pag. 322

BARO § octo libri scripti, Vero: unus, Baro: alius, Non, placet, Baro, pro fatuus. ep. 11. ad Att. lib. v. Apud Patronem, & reliquos Barones te in maxima gratia posui. Non displicet tamen eruditissimi uiri, Hadriani Turnebi, opinio, qui legendum,



elum, Varro, existimat: ut sit nomen contumeliosum. atque ille suam sententiam confirmat Lucilij uersu, quem recitat Festus,

Varronum, ac rupicum squarrofa incondita rostra.

Quo in uersu, Varronum, probri causa dictum uidetur. Ego autem locum addo ex epistola D. Bruti, quo clarius aliquanto ueritas illucescat. Si thesauros, inquit, uarronis haberem, sustinere sumptum non possem. Varronem appellat M. Antonium, qui thesauros Caesaris, ad Opis depositos, post eius necem abstulerat. Patet igitur contumeliae uocabulum esse. Et uetus liber meus in epist. illa ad Atticum, cuius testimonio sum usus, habet, Varrones, r geminata. Nec moueor, quod in quibusdam libris hoc nomen a littera, B, non ab, V, incipiat. nam, ueteres et B pro V, et uicissim V pro B, scripsisse, testimonio sunt antiqua monumeta.

eadem. pag. 322

TIBI praesertim? Tibi, non, Ibi, lego cum omnibus antiquis libris, duobus exceptis, quorum in altero est, Mibi: in altero, Ad te: mendose, nisi fallor, in utroque. Tibi praesertim, hoc significat. cena ad te ualde pertinet, tibi praesertim quae daretur; quam te quacrerere a mane dixisti.

IN LIB.



# IN. LIBRVM. X

## EPISTOLA. I

PAG. CCCXXIII

**E** medio cursu & cur non ita legam, cum & ita scriptum uideam in uetere libro, & historia suffragetur? nam in epistola ad M. Brutum, In medio, inquit, Achaico cursu, cum Etesiarum diebus auster me in Italiam retulisset. Et lib. 3. Off. Si ipse uenissem Athenas: quod quidem esset factum, nisi me de medio cursu clara uoce patria reuocasset.

EPISTOLA. V. pag. 329

**ATTULERUNT.** & sic ueteres libri omnes: nec mutatio placet: licet hoc uerbum ad illud, Commemoratio, referri uideatur. potest enim Cicero ad illa omnia, quae proxime dixerat, paternam necessitudinem, beneuolentiam Planci, ceterasque res ad eam sententiam pertinentes, hoc uerbum accommodasse.

EPISTOLA. IIX pag. 333

**OPVS** fuit, & sic decem ueteres libri: nonnulli,  
Opus



Opus fuerunt : quod ita probarem , si legeretur ,  
 Labores , non Laboris : ut omnia dic ant er nomi-  
 nandi casu .

eadem. pag. 333

PAREREMVS . § hic magna dissensio est uete-  
 rum librorum . unus habet , Pararemus : alius ,  
 Pareremus : alius , Putaremus : alius , Patire-  
 mur : reliqui omnes , Pateremur . nam , Parti-  
 remur , quod quibusdam placuit , ex ingenio  
 est . Potest loqui Plancus uel de sua , uel de hostiū  
 uictoria : si de sua , Pararemus . locum habet , aut ,  
 Pareremus ; si hostium , Pateremur . sed malo de  
 hostium uictoria loqui Plancum : quae funesta or-  
 bi terrarum futura esset , afflicta rep . Quid autem ,  
 ubi ueritatem ab antiquis libris petere licet , consu-  
 gere ad coniecturam opus est ? dixi , plerosque ue-  
 teres libros habere , Pateremur . id optime congruit  
 cum superioribus uerbis . nam , pati funestam orbi  
 terrarum uictoriam , est , uinci magno omnium da-  
 mno . Praestat , inquit , cū pluribus libertatem defen-  
 dere , & uictoriae gloriam communicare , quam , dū  
 pauci totam gloriam auide quaerimus , uictoriam  
 pati omnibus calamitosam .

eadem. pag. 334

CVM , deum benignitate , ab omni re su-  
 mus paratiores , § Sumus , ueteres libri omnes ,  
 & recte . sic enim alibi Cicero locutus .

EPI



## EPISTOLA. IX. pag. 335

CONCUPISCO autem nihil mihi, contra  
quod ipse pugno. § Difficilis ad intelligendum  
locus: nec ueteres libri consentiunt: nam plerique,  
Contra quod: unus, Contra quam: alius, Contra  
quem. fortasse autem hoc dicitur: & nihil mihi  
mea causa concupisco; cum ad reip. salutem, di-  
gnitatemq. omnia referam; & contendo tamen,  
atque elaboro, ut ea consequar, quae minime con-  
cupisco. haec si placet sententia; quam ego non cō-  
temno: legi poterit &, Contra quam: &, Con-  
tra quod: atque etiam, Contraq. ut olim Rutilio,  
post etiam alijs placuisse uideo: quamquam id qui-  
dem, quod sciam, non est in meis ueteribus libris.

eadem. pag. 335

SED ET § sic in uno tantum antiquo libro:  
quod probavi. apte enim particula, Sed, sequen-  
tem sententiam cum superiore coniungit.

eadem. pag. 336

VIENNA § alij, Viennam, ut habent ueteres  
aliquot libri. quod non placet: primum, quia, cum  
ingressus in Galliam Narbonensem Plancus non  
longe absit Vienna, cur dicat, Magnis itineribus  
Viennam equites praemissi? deinde, praemittendi  
equites erant, non ut Viennam, sed ut Mutinam,  
obsessam ab Antonio, peterent: nam Viennae  
praesidium imponi, hoc tempore non oportuit. iam  
illud,



illud, *Via breuiore*, perueniendi necessitatem indicat. quod omnino ad *Mutinam* pertinet, in qua *Planci* collega *D. Brutus* obsidebatur. Accedit, quod ep. 11. scribit *Plancus*, transiecto *Rhodano* se fratrem cum equitibus praemisisse, & ipsum ad *Mutinam* iter dirigere: nulla facta *Viennae* mentione. Praeterea, cum sequatur, Ipse ostenditur, *uia breuiore* mille equites *Mutinam* praemissos; ipsum *Plancum* *uia longiore* cum reliquis copiis secuturum. Nec me tamen aliquis ita putet opinione mea delectari, ut discedam ab antiquis libris. nam in quattuor, scriptis in membrana, & in duobus communi charta, est, *Vienna*: in quattuor item, *Viennam*: in uno, *Vicinia*: in alio, *Vi etiam*. Est autem *Vienna Allobrogum*, quam *Strabo* lib. 4. principem urbem uocat. *Plinius* lib. 2.

EPISTOLA. XII pag. 339

T V A dignitas affert; & Afferat, antea legebatur in omnibus uulgatis libris. nos olim, Afferat, reposuimus ex uno *Ioannis Scalae* antiquo libro: cum quo nullum postea, quod equidem miror, consentire animaduerti. sensus est. Ita mihi detur te uictorem complecti rep. recuperata, ut mihi, quamquam ipsius reip. causa maxime gaudere debeo, tantum ei te praesidij, tantum opis attulisse extremis paene temporibus, tamen dignitas tua magnam laetitiae partem affert. Verbum, Complectar,



plectar, qui crediderunt esse indicatiui modi; uerbum, Affert, ut ipsi putabant, emendarunt; ut ego existimo, deprauarunt.

eadem. pag. 339

PROMISSA & promiserat Planus, & ipse se non desuturum. Coelius Rhodiginus, nodum in scyrpo quaerens, Praemissa, legendum arbitrabatur. quod nec sententia postulat, nec ueteres libri confirmant.

eadem. pag. 340

Nec, quo progredi uelles, & sic omnes mei ueteres libri: nec est obscura sententia. Ignorabat, inquit, senatus, quo exercitum ducturus esses.

eadem. pag. 341

SPECIEM gloriae, collecta inanissimis f.i. & non displicet, Collectam ex in. f.i. quod uiris doctis placere uideo. non enim illa colliguntur ex in. f.i. sed species gloriae colligitur. quis autem ea quaerat, quae speciem quidem, & imaginem habent gloriae, ipsam uero gloriam, quae in una uirtute posita est, non habent?

eadem. pag. 341

BREVIA, fugacia, caduca & scripsi adolescens; cum in uerbo, Fugacia, ueteres libri dissentirent; quorum alij, Fugacia; alij, Fugato-cia, nonnulli, Fugato, habent; opinari me, quamquam uulgata lectio sensu non careret, Fucata, rectius esse: ut translatio sit a mulieribus: quarum  
saepe



saepe nitor non naturalis, sed fucatus est, ideoq.  
breuis, & caducus. Nostram coniecturam alij  
postea secuti sunt.

eadem. pag. 341

QVAM quando complexus es, § sic quin-  
que libri ueteres: unus, Quoniam, pro Quando:  
reliqui, Quom. placet, Quando.

eadem. pag. 341

TENE; § sic libri omnes, uno excepto, in quo  
est, Et tenes. mihi, Tene, placet: quia cohortan-  
tis est, ne oblatam occasionem Plancus amittat.

EPISTOLA, XIV. pag. 342

TECUM & reip. satis esse facturum. §  
consentiunt in hoc ueteres libri omnes: nec tamen,  
locum uacare mendo, prorsus existimo. uenit in  
mentem, hoc sortasse dici, tecum esse facturum,  
& reip. satis: ut idem uerbum duas ad sententias  
respiciat: tecum facturum, pro, tecum sensurum:  
quo loquendi modo ueteres usi sunt: & reip. satis-  
facturum.

EPISTOLA. XVI. pag. 345

FACTVM aliquid § sic quinque libri uete-  
res: alij, Aliquod. mihi placet, Aliquid: quia,  
cum sequatur, Futurum; uidetur, Factum, par-  
ticipium potius, quam nomen, esse oportere. no-  
men



men autem esset, si legatur, Aliquod.

EPISTOLA. XVII pag. 346

FIDEꝫ pro, Fidei: ut Sallustius in Iugurtha: Decima parte die reliqua. Gellius lib. 9. cap. 14. C. Caesar in libro de analogia secundo, huius die, & huius specie, dicendum putat. Vide Aldi filij Scholia in Sallustium.

eadem. pag. 346

DE tribus fratribus Segauiano probauit: ꝫ quattuor ueteres libri, Se Gauiano. legendum fortasse, Sex. Gauiano: (nam Segauianae gentis mentio non exstat) ut sit Sex. Atilius Gauianus, qui nominatur in oratione pro Sextio. Probauit, inquit, mihi, in Apella ad me mittendo, studium suum Gellius; in trium autem fratrum negotio, (hoc quale fuerit, ignoratur) Sex. Gauiano.

EPISTOLA. XLIX. pag. 347

ET SI cautius illud erat consilium, ꝫ emendationem huius loci doctissimo uiro Lambino debemus.

eadem pag. 347.

VIDEBAM; ꝫ hoc uerbum sententia non desiderat: pendent enim omnia ex illo, sciebam: Sed ob interposita multa, quo clarior tota res esset, additum uidetur: quod interdum fieri solet.

l eadem.



eadem. pag. 348

**N**isi unum loco me tenerem, & nisi con-  
 stiterem uno eodemq. in loco, in quo exercitum Le-  
 pidus haberet. Vel pro, Nisi, legendum Si: ut hoc  
 dicat: Si manerem in eodem loco, nec ad Lepidum  
 prope accederem. Hoc eo magis existimo, quia scri-  
 bit idem Plancus ep. 23. Si uno loco essem, uere-  
 bar ne cui obrectatorum uiderer & nimium per-  
 tinaciter Lepido offensus, & mea patientia etiam  
 alere bellum.

## EPISOLA. XIX. pag. 348

**G**RAVISSIMAE & maximae, fortissimae  
 animi, summiq. consilij, & animi maximae, cō-  
 silij grauiissimae. Hunc locum ante aliquot annos  
 ita legendum, & distinguendum putauimus; cum  
 esset in peruulgatis omnibus libris, Maxime for-  
 tissimi animi.

## EPISTOLA. XX. pag. 349

**T**e ad se scripsisse, & sic unus omnino uetus  
 liber: alter, Te ad eum scripsisse. utrumque pla-  
 cet. alij libri, Te adscripsisse: uel, Te scripsisse:  
 uel, Te conscripsisse.

eadem. pag. 349

**V**ERVM ut errare id Plance uoluisti: } in  
 magna ueterum librorum uarietate, hoc delegi-  
 mus,



mus, quod probabile satis uidebatur. Errare, est  
in duobus antiquis libris: Errarem, in reliquis  
omnibus. quod mendosum esse constat. error enim  
ille Planci, non Ciceronis, fuit: & ea, quae se-  
quuntur, aperte errorem Planci declarant. nam,  
quia turpius est decipi, quam errare; cum erre-  
mus, ut humani; decipiamur, ut incauti: propter-  
ea Plancum excusat, & quasi consolatur; quod  
errauerit quidem, quia crediderit se esse bono Le-  
pido usurum; deceptus tamen non sit; quia prudē-  
tia ualeret. Praeterea uerbum, Voluisti, Plancum  
liberat ab imprudentiae culpa. ipse, inquit, erra-  
re uoluisti, cum ea sperasti de Lepido, quae uera  
esse cupiebas: non te quisquam in errorem induxit:  
decipi enim non potes. Alij retinent, Errarem,  
aiuntq. libros omnes in eo ueteres consentire: &  
quia sententiam uident elici commodam non posse,  
ex aliquo fortasse poeta sumptum comminiscuntur.  
Quod ad libros attinet, dixi iam duos esse, in qui-  
bus, Errare, non, Errarem, scriptum est: itaque  
nulla hic utor coniectura: sequor & antiquitatis  
testimonium, & sententiam ipsam, quae, Errare,  
postulat, Errarem, recusat: praesertim cum sequa-  
tur, Sic decipi: quod ad illud opponitur, Vt erra-  
re. Alluisse uero Ciceronem ad locum alicuius  
poetae peruulgatum, ipsa uerba, quae poeticū nihil  
olēt, opinor nemini persuaferint. Quod si cui, Erra-  
re id, pro Errare in eo, uideatur durius: nō esse dissi-  
mile sciatis, Peccare multa, pro in multis; & huius



generis alia. Quod si quis mutatione delectatur; ita poterit legere: Verum ut errare mi Plance uoluisti. una enim tantum littera tollitur, si ex, Errarem id, quod est in plerisque antiquis libris, fiat, Errare mi. ut omittam, quod uno etiam in libro est, Errarem mi. Valuisti, pro Voluisti, Faernus legebat, homo ingeniosus, uerum coniecturae interdum suae nimium indulgens. Ego, si discedendum hic esset ab antiquis libris, quod minime necessarium uidetur; quid enim mihi placeat, iam ostendi: tamen, Errare ualuisti, probare non possem. Valere enim, & Posse, differunt in hoc, quia Posse & ad uires pertinet, & ad casum: ad uires, satis notum: ad casum, hoc modo: potest errare, quamuis excellat prudentia: Valere autem, ad uires interdum, ad casum numquam refertur. nec uereor, ut refellar exemplis. hic autem, si legatur, Ut errare uoluisti, casum significari quis non uidet?

EPISTOLA. XXI pag. 351

IN EISQVE, § sic malo, ut est in quattuor antiquis libris, quam, ut in reliquis, Meisq. sic enim coniungo: In eisq. aperte denunciat, uideamne fallar.

EPISTOLA. XXII. pag. 353

VT IEO, § uel deest, uel certe subauditur, S. C. ut infra patet.

EPI-



## EPISTOLA XXIII. pag. 354

SALVTARITERꝫ ueteres libri, Saluari,  
Cum salute, Saluari loco, Saltem. non tamen dis-  
plicet, Salutariter: etsi uidetur esse coniectura.  
probo etiam illud, Cum salute.

eadem. pag. 354

FERVENTIBVSꝫ quasi, incitatis aduersus me.  
translatio satis nota. quattuor libri ueteres, Fu-  
rentibus: eadem sententia. Furere enim de irato  
homine saepe usurpat Cicero, & ipse Plancus  
paullo post, Veniebant, inquit, eodem furore in  
me, quo in patriam, incitati.

eadem. pag. 355

ET MAGNOꝫ copulam alij sustulerunt: nos  
eam retinendam duximus, cum sit in antiquis li-  
bris. parui tamen refert, absit, nec ne.

eadem. pag. 355

CATIVMꝫ nota familia. ep. 16. lib. 15. &  
Horatius Sat. 4. lib. 2. Vnde, & quo Catius? Qui-  
dam libri, Caninium, Tatium, Catinum.

eadem. pag. 356

CIVARONE, ꝫ suspicor de mendo. nam &  
hunc locum nemo de ueteribus nominat: & uete-  
res libri alij, Anerone, habent: alij, Curone: ple-  
rique, Cinarone, aut Cuiarone: unus, Cinarone:  
alius hoc nomen non habet.



## EPISTOLA. XXIV. pag. 358

ADVERSISSIMAM ꝛ sic omnes mei libri ueteres, duobus exceptis, in quibus est, *Auersissimam*. placet, *Aduersissimam*.

eadem. pag. 358

ILLIS ꝛ nullo in uetere libro ita scriptum animaduerti, sed, *Illi*, in omnibus; *Ille*, in uno; *Illa*, in altero.

eadem. pag. 358

EXTRVSVM. ꝛ emendaui locum ex ingenio. nam ueteres libri, Et rursus: unus tantum, Et rursus: quo etiam coniectura nostra magis adiun-  
tur. nam qui, *Detrusum*, legunt, longius ab anti-  
qua scriptura discedunt.

eadem. pag. 358

BIMESTRIS, ꝛ aut *Quinquemestris*, legen-  
dum; cum quinque menses, non duo, superessent  
ad exitum anni, ut dies huic epistolae adscripta de-  
clarat: aut, *Bimestris*, dixit, pro, *Exigui tempo-  
ris*. quod uidit etiam *Rutilius*.

## EPISTOLA. XXV. pag. 359

FAMA scientiaq. omnium. ꝛ Sententiaq.  
omnium, placeret: quod in *Varietatibus* a me scri-  
ptum anno M. D. XXXIII. alij tamen sibi po-  
stea arrogarunt.

EPI-



## EPISTOLA. XXVI. pag. 361

SEQUUNTUR, & tueor illud meum, ut ostendam, quid ex ingenio, quid a libris acceptum sit. hic nullum adhuc uidi ueterem librum, (& uidi quamplurimos) in quo esset, Sequuntur. habent autem, Assequuntur, omnes. iam pridem tamen duxi, quod uidetur sententia postulare, legendum, Sequuntur.

## EPISTOLA. XXX. pag. 364

MILLIA passuum centum, & sic malo, quam, Passus, auctoritate ductus octo ueterum librorum, & consuetudine Latini sermonis. nam etsi, Mille homines, & Mille hominum, recte dicitur: non tamen eodem modo, Millia passus centum, & Mille passus centum. quod si me ratio fallit; monentibus libenter aures dabo.

eadem. pag. 366

AMPLIUS passus quingentos? Qui totam emendandi spem in uno, uel altero, quamquam per ueterem libro ponunt, ij quam sapienter statuunt, ipsi uiderint. nos quidem consilij nostri non paenitet, quod plurimos inspicere, licet diuersis admodum temporibus descriptos, numquam negleximus. ac mihi quidem cum antea saepe fructum non mediocre hoc institutum attulit: tum uero in hoc loco

l 4 quasi



quasi gratulor industriae meae, quod numerum  
passuum, qui desideratur in plerisque ueteribus li-  
bris, reposui duorum antiquorum exemplarium  
consensu: quorum nobis unum olim, ut Scholia  
nostra testantur, Vincentius Riccius commodauit,  
alterum nunc habemus.

EPISTOLA. XXXI. pag. 368

QVANTAS contentiones habuerim, &  
lector intelligens dijudicet, utrum, Conciones, ut  
est in omnibus meis antiquis libris, an, Contentio-  
nes, ut olim scriptum uidi in Pauli Boti Regiensis  
libro, legi oporteat. Si, Contentiones, retinemus:  
hic erit sensus: quam uehementer Lepidus & An-  
tonius litteris a me contenderint. quod sequentis  
epistolae testimonio comprobatur, in qua est: Le-  
pidus urfit me & suis, & Antonij litteris, ut legio-  
nem trigesimam mitterem sibi. Sin autem, Con-  
ciones, placet: uehementes litteras, quales con-  
ciones ad populum, uel ad milites sunt, interprete-  
mur: quod tamen paullo durius uidetur: nisi si fe-  
rendum in Asinio: cuius orationem duram fuisse  
Tacitus auctor est.

EPISTOLA. XXXII. pag. 369

DVXIT se a Gadibus; & sic Terentius in  
Hecyra: Vxor, ubi me ad filiam ire sensit, se du-  
xit



xit foras. Et Plautus in Aul. Ego me deorsum  
duco de arbore. Et in Bacch. Duc te ab aedibus.

eadem. pag. 370

SEX. Varo procos. & qui tamen consul non  
fuerat. Sed proconsules appellari eos quoque sole-  
re, qui post praeturam in prouincias irent, alibi  
diximus. Quis hic Varus fuerit, assequi diuinan-  
do non licet. Accium quidem Varum, de quo scri-  
psit Oppius, aut Sex. Quintilium Varum, de quo  
Caesar, constat esse non posse: nam Accio prae-  
nomen, Publio fuit: Quintilium autem in Hispa-  
nia fuisse, cum honore praesertim, scripsit nemo.  
iam illud me mouet, quod Quintilius civili pro-  
ximo bello interfuerat: hic autem de tempore satis  
longinquo loquitur Asinius, cum ait: Non horum  
temporum, sed illorum. Vari cognomen a cruri-  
bus deriuatum, auctor est Plinius lib. xi. cap. 45.

eadem. pag. 370

GLADIATORIBVS & obscurior sententia mu-  
tandi libidinem attulit. quod alijs quoque locis  
euenisse nimium saepe animaduerti. Ostendamus  
igitur & breuiter, & aperte, quid significare uo-  
luerit Asinius. ac primum illud sciendum, gla-  
diatorum & ludum fuisse, ubi rudibus, idest uir-  
gis, apud lanistas, eorum magistros, exerceren-  
tur, & certamen, in quo gladijs pugnabant, ad  
oblectationem populi. Et cum in ueterum scriptis  
legimus, Gladiatoribus; quod Ciceronem legen-  
tibus occurrit, ut ep. 19. lib. 2. ad Att. & Phil. 1.

non



non ludus, sed certamen ipsum indicatur. Fadius  
 bis gratis depugnauerat, non gladiatoribus, serio,  
 & periculoso certamine, sed in ludo, idest, nullo  
 uitae discrimine. at Balbus pugnare eum auctore  
 sese, non in ludo, sed gladiatoribus, uolebat. quod  
 Fadium recusasse, quis miretur? Sententiam pa-  
 tere iam arbitror: nunc singula uerba perpenda-  
 mus. Militem Pompeianum. pugnauerat igitur  
 contra Caesarem. Balbus autem Caesariana-  
 rum erat partium: ex quo illi Pompeianos omnes  
 odio fuisse, uerisimile uidetur: itaque Fadij uitae  
 non parcebat. Depressus in ludum. depressus ab  
 ijs qui ludicram gladiatorum pugnam animi causa  
 spectabant. qui, Deprehensus, legunt, quam apte  
 coniungatur cum eo, quod sequitur, In ludum, non  
 attendunt. Gratis. nulla mercede. Depugnasset.  
 ludicra tamen pugna. nam hoc uerbum ad ludicra  
 etiam accommodatur. Lampridius in Commodo:  
 Rudibus inter cubiculares gladiatores in arena de-  
 pugnauit. Auctore sese. quaestore. Emphasis  
 quaedam ex parte Balbi: nec abest Asinij scri-  
 bentis indignatio: quasi ita peruerso, prauoq. Bal-  
 bus esset ingenio, ut sibi, etiam iniqua iubenti, pa-  
 rere homines uellet, recusantesq. ulcisceretur. Au-  
 ctorari, pro, Auctore, placet quibusdam, alucinan-  
 tibus in sententia, nec uidentibus, hic sermonem ha-  
 beri de seria gladiatorum pugna; quod uerbo, Gla-  
 diatoribus, declaratur: Auctorari autem seruire  
 uerbum esse, cum auctione ueneunt, qui seruitutem  
 seruiant:



seruiant: quo respexit Plinius, cū dixit lib. 3. 6. cap. 15. Gladiatorū spectacula edebat, ipsum magis auctoratū populum Romanum circumferens. idest, sua stultitia seruientē magis, quā gladiatores ipsi, libertatis expertes: qui cū auctorati essent, idest, in seruitutem empti, imperio domini, uel cum uitae periculo, parere cogebantur. Gladiatoribus libertos quoque interdum pugnasse, qui uenalem sanguinem haberent, auctor Linius lib. 28.

eadem. pag. 370

CIVIS Romanus sum, & usitata uox opem implorantium ciuium Romanorum, quibus, in externis praesertim locis, iniuria fieret. In Verrem: Cervices in carcere frangebantur indignissime ciuium Romanorum: ut etiam illa uox, & illa imploratio, Ciuis Romanus sum, quae saepe multis in ultimis terris opem inter barbaros, & salutem tulit, ea mortem illis acerbiorē, & supplicium maturius ferret. Et alio loco in eundem: Nulla uox audiebatur, nisi haec, Ciuis Romanus sum. In plerisque et recētoribus, et antiquis libris legitur: Ciuis Romanus natus sum. uerbum tamen, Natus, induxi olim, auctore Hieronymo Ferrario, comprobante praesertim eius coniecturam uetere libro, quo nunc etiam utor.

EPISTOLA. XXXIII. pag. 372

SIMILES, & Similis, habent ueteres libri; quod idē est; uel, Simul. quod mēdosum uidetur. Similes



miles autem concionibus Narbone habitis Lepidi litteras dicit.

eadem. pag. 372

**PALMARER** § sic uideo esse in omnibus antiquis libris: & ita scriptum arbitror a Pollione. nam licet hoc uerbum alibi fortasse nusquam reperiatur; non tamen ideo reijciendum uidetur: cum eiusdem generis alia quoque sint. quod si, quae semel tantum dicta nobis occurrunt, ea mutare tamquam corrupta, & usitata restituere conabimur: Latinam linguam, quae paucis omnino libris conseruata, uix ad aetatem nostram peruenit, maiorem ad inopiam redigemus, maleq. merebimur de studijs litterarum. **Palmar** puto idem esse, quod **palpari**, idest **adulari**. **palma** enim blandimur, item ut **palpo**.

eadem. pag. 373

**CARFULENUM**: § quem **Hirtius** & **Octavianus** cum legione **Martia** **Pansae** obuiam miserant. **Appianus** **Carfulcium** nominat. ueteres libri uarie, **Carfulenum**, **Carfuleum**, **Casfulenum**, **Carfulenium**, **Carfulerium**, **Cursfulenum**, habent.

eadem. pag. 373

**HABERE equitum** \* § numerus equitum desideratur in omnibus antiquis libris, praeter unum minime recentem, in quo est, **Equitum V.** idest quinque millia. nam ueteres numerorum notae, ducta supra lineam, **Millia** significant. eam uero lineam saepe a librarijs omissam esse, ignorat nemo.

Equi-



*Equitatum ideo seruauit incolumem Antonius, quia caruit equitibus Hirtius, & Germanos Caesaris equites ad Antonium paullo ante proelium transfugisse, Dio significat.*

*eadem. pag. 373*

*P. VAGIENI § sic probo, ex Maffeorum libro, quo etiam olim sum usus. reliqui omnes, Pupilli, non Publij. idem liber, Vagienij.*

*eadem. pag. 373*

*SEPTIMA § fortasse aliter legendum: nam septima cum Hirtio fuit. Phil. 14.*

*EPISTOLA. XXXIV pag. 374*

*AB confluente Rhodano § ab eo loco, ubi confluere incipiunt Arar, & Rhodanus. Liuius lib. 1. Ad confluentes collocat castra. Vnus omnino uetus liber, Ab confluente ab Rhodano: reliqui nullo discrimine, Ab confluente Rhodano.*

*eadem. pag. 375*

*AD FORVM Vocontium § malim, Ad Forum Voconium, uel Voconij: quod a Plinio nominatur lib. 3. cap. 4. & hic ep. 17. Veteres libri, Vocontium, Vocontij, Vocatium, Vicontinum, Venticonum, & aliter.*

*eadem. pag. 375*

*INERMORVM. § pro, Inermium, antique. ep. 12. lib. 11. Et ep. 14. ad M. Brutum. Et Sallustius in lug. Ab inermis pedibus auxilium petere. Et Quadrigarius apud Gellium lib. 17. cap. 2.*

*eadem.*



eadem. pag. 375

**EQUITVM** § Equitum xxx, idest triginta millia, ut in libris nostris, linea numero superdula, impressum est, olim esse, animaduerti in antiquo Vincentij Riccij libro: nunc easdem notas in uno Maffeorum esse, in reliquis numerum equitū uideo desiderari. sed mihi, tantum equitatum habuisse Antonium, uerisimile parum uidetur.

eadem. pag. 375

**SUMMA** studia officij § officijs inter nos pari studio certauimus. Duo ueteres libri, Officij, non habent: unus, Summa studia officio mutuo: alius, Summa studia officij mutui. Cicero ipse Phil. 13. sic de Lepido: Magna eius in me merita, mea quaedam officia in illum.

eadem. pag. 375

**MEMINI** autem § sic probo, ut est in meo uetere libro, & erat in eo, quem olim habui, a Vincentio Riccio commodatum. Duo praeterea, Memini etiam: quod non placet. reliqui, Memini enim.

**EPISTOLA. XXXV. pag. 376**

**IN** ciuibus conseruandis, § sic duo ueteres libri, & unus praeterea, quo sum usus adolescens, Vbaldini Bandinelli. reliqui omnes, Obseruandis. malo, Conseruandis, ne ciuium caedes fieret. quod explanatur sequentibus uerbis: Me tantae multitudinis ciuium R. salutis, atque incolumitatis caussam



causam suscipere coegit. Et infra: Misericordiam nostram, exercitusq. nostri. Ad hanc sententiam pertinent illa Planci uerba, ep. 21. Accessit eo, ut milites eius, cum Lepidus concionaretur, conclamarint uiri boni, pacem se uelle, neque esse cum ullis pugnatuuros, duobus iam consulibus singularibus amissis, tot ciuibus pro patria amissis.

eadem. pag. 377

I I I . K A L . I V N . 3 mensis Iunij nomen est in duobus antiquis libris: in quibusdam Aprilis nominatur, errore perspicuo: in alijs neque Aprilis, neque Iunius. in plerisque libris antiquis est, I I I I Kal. in nonnullis, ut in eo Vincentij Riccij, I I I Kal. quod magis probo. nam etsi Lepidus I I I I . Kal. Iun. se cum Antonio coniunxit; ut ex Planci ep. 23. cognoscitur: ueritamen similis uidetur, postridie Plancum ad senatum scripsisse, quam eodem die, in tanta rerum mutatione.



# IN. LIBRVM. XI

## EPISTOLA. II

P A G. CCC LXXIX

V E L L E T E, & alij ex ingenio, Velle, & sed ita referri necesse esset ad amicos Bruti, et Cassij: de quibus non scriberet, Vix quisquam, sed, Prorsus nemo. Sequamur igitur & antiquos libros, & sententiam.

EPISTOLA. X. pag. 387

M A L L E me tuum iudicium & hoc referatur ad illud, Exploratum habes. Hunc locū olim emendauimus ex duobus antiquis libris, Vincentij Riccij, & Pauli Boti: quibus aliqua ex parte suffragantur ij, quibus nunc utor. in uno tamen est, Videatur, non Videantur: in omnibus autem, Hoc, non Haec: ut legi etiam recte possit, Si tamen hoc temporis uideatur dici caussa.

eadem. pag. 389

S E P T E N V M numerum & sic placet: & sic omnes habent mei ueteres libri.

eadem. pag. 389

V A R R O N I S & significat Antonium, qui thesauros C. Caesaris, ad Opis aedem depositos, abstulerat. Phil. 2. & ep. ad Att. & omnis historia. Varro.



Varronis autem, pro nequam hominis, & dissoluti. uide ep. ult. lib. 9. Ille Baro.

eadem pag. 389

SVSTINERE sumptum & in alijs, Subsistere sumptui: in duobus antiquis, Sufficere sumptui. Omnia recte.

EPISTOLA. XII pag. 390

INERMIS, & pro, Inermibus. ep. 54. lib. 10.

EPISTOLA. XIII pag. 391

ITINERA multo maiora fugiens, quam ego sequens. & ita dixit, Itinera fugere, & Itinera sequi, ut dicebant ueteres, Ire uiam, Redire uiam. Est autem, Itinera fugere, & Itinera sequi, pro, in itineribus fugere, & sequi. quod omnino durius: itaque malim, Itinere multo maiore.

EPISTOLA. XIV pag. 393

MUTINA & sic placet; quamquam omnes antiqui libri, praeter unum, habent, Mutinae.

EPISTOLA. XVII pag. 396

AMBITVS exstare & consuetudine Latini sermonis adducor, & praeterea quinque ueterum



rum librorum testimonio, ut probem, *Exstare*, non probem, *Excitare*, quod alijs placet.

EPISTOLA. XX pag. 398

PRIVS ut Alpes transgrederer, & mendo-  
sus uidetur epistolarum ordo. nam si nondum Al-  
pes transgressus est, coniungi Planco nondum po-  
tuit. at coniunctus uidetur ep. 15.

eadem. pag. 399

EX AGRIS Syllanis, & sic quinque libri ue-  
teres. agros dicit, quos dictator Sylla, municipijs  
ademptos Marianarum partium studiosis, publi-  
cauerat. ep. 4. lib. 13.

EPISTOLA. XXIII pag. 402

LEPIDVS commode de nobis sentire ui-  
detur. & nihil muto. nam, De nobis, pro De rep.  
dixit. Et, Commode nobis, in nullo reperitur an-  
tiquo. Sic locutus ep. 18. lib. x. Magnum pericu-  
lum ea pars exercitus adiret, quae bene de rep.  
sentit.

EPISTOLA. XXVII pag. 405

QV I D defuit nostrae familiaritati in ma-  
ximis rebus? quonam modo me gererem ad-  
uersus Caesarem, usus tuo consilio sum & di-  
stinguo



*stinguo sic. Quid defuit nostrae familiaritati ? in maximis rebus quonam modo me gererem aduersus Caesarem , usus tuo consilio sum. Haec etsi leuia uidentur , quia tamen quiddam afferunt ad sententiam , non contempsimus . quae non esse adhuc animaduersa , miramur.*

## EPISTOLA . XXIIIX pag. 408

*PATRIAM* amicitiae praeponendam esse : & cum & sententia pateat , & ita scriptum sit in duobus antiquis meis libris ; mutandum nihil duxi . alij legunt , Patriae amicitiam : hoc sensu : patriae amicitiam priuatae amicitiae praeponendam . quod mihi non probatur . nam , Patriae caritas dicitur ; Patriae uero amicitia , quis umquam dixit ? amicitiam uero patriae praeponere , dixit hic noster in ea pro Rabirio perduellionis reo.

*eadem. pag. 409*

*APPETENDAM* & *FUGIENDAM* , & , *APPETENDAM* , opponuntur . tres ueteres libri , *OPPETENDAM* : sex , *APPETENDAM* . Vtro modo legatur , discrimen in sententia non erit.



# IN. LIBRVM. XII

## EPISTOLA. I

P A G. CDXII

**C**OMPRESSVM est, quia dixerat, Manabat, contrarium contrario reddidit: item ut ep. 12. ad Att. lib. 3. Orationem illam ita compresseram, ut numquam emanaturam putarem. Primus ego locum emendavi, ex uetere Vincentij Riccij libro: cum in omnibus impressis, Compressa est, legeretur.

EPISTOLA. II pag. 414

AD XIII. Kal. Oct. 3 Tota res ita se habet. Cum Cicero, post interitum Caesaris, primum desperata rep. in Graeciam abire cogitasset; deinde, allata spe quadam libertatis, & otij, mutato consilio ad urbem reuertisset; M. Antonius consul Kalendis Sept. de supplicationibus relaturus, eum de more in senatum uocauit. Cicero misit, qui se excusarent, quod de uia langueret. ille iratus fabros se missurum, & domum illius disturbaturum esse, audiente senatu, dixit. uenit Cicero postridie in senatum, idest, 1 v. non. Sept. & locutus est, absente Antonio, de rep. liberius, quam pericula,



pericula, minaeque postulabant: eaque nunc exstat oratio, Philippicarum prima. Tum Antonius, furore percitus, adesse eum iussit in senatu ad x i i i. Kal. Oct. ipse interea totum illud spatium, quod est a quarto non. Sept. ad x i i i. Kal. Oct. commentatus est in Tiburtino Metelli, quae contra Ciceronem diceret, eo die in senatum, dissuadentibus amicis, Cicero non uenit; sed mox accurate scripta oratione respondit, quae inter Philippicas secunda legitur. est autem ita scripta, quasi praesens praesenti Antonio eodem die responderit. quod ex eo constat, quia x i i i. Kal. Oct. inuectus est in Ciceronem Antonius, & eodem die habitam esse Philippicam secundam, fingit Cicero, cum ait in ea: Nescis heri quartum in circo diem ludorum Romanorum fuisse? Nam qui dies quartum diem ludorum Romanorum proxime sequitur, est, x i i i. Kal. Oct. ut ex marmoreis antiquorum dierum fastis, quod kalendarium uocant, intelligitur. Ac nequis in dubium uocet, quod scriptam esse dixi, non habitam probabo ipso teste, non fuisse illum eo die in senatu, metu armorum Antonij: sic enim inquit in Philippica v. Cum is dies, quo me adesse iusserat, uenisset; tum uero agmine quadrato in aedem Concordiae uenit, atque in me absentem orationem ex ore impurissimo euomuit. quo die si per amicos mihi cupienti in senatum uenire licuisset; caedis initium fecisset a me: sic enim statuerat. Et in hac ipsa epistola, cum ait: Tuto in senatum uenire

m 3 nire



nire mihi non licet: caedem enim gladiator quaerit, eiusq. initium ad XIII. Kal. Oct. a me se facturum putauit: nonne se non fuisse in senatu eo die significat? Scriptam etiam, ut dixi, non habitam secundam Philippicam, indicant illa ad Att. ep. 10. lib. 16. Vtinam eum diem uideam, cum ista oratio libere uagetur. nam si scriptam edere non audebat: multo minus, ipso praesente Antonio, eam habere ausus esset. loquitur enim eo loco de secunda Philippica: ut in Commentarijs docuimus.

eadem. pag. 414

AT quam paratus uenerat, § Libri ueteres, Ad quem: quod si probamus, ita dictum uidebitur, quod eum Antonius in senatu affuturum putaret: ut sit: uenerat ad me paratus: idest, ut in me diceret ea, quae complures dies commentatus erat. Malo tamen, At quam: quod alij excogitarunt.

eadem. pag. 415

IVS suum recuperabit. § sic octo mei ueteres libri; recte: ut bene ominetur de Cassio, & Bruto; uel si in Italia res male succedat. ad Att. ep. 13. lib. 15. Videtur resp. ius suū recuperatura.

eadem. pag. 415

SIVE non; § hoc in uno tantum est uetere libro, a reliquis abest. in tribus etiam hoc modo legitur: Qui si non ad me referent, mea tibi tamen beneuolentia, fidesq. praestabitur. quod minime displicet.



IN . LIBRUM . XII 183  
displicet . in tribus , Qui sine ad me referent , mea  
tibi &c.

EPISTOLA . V pag. 418

CLATERNAE & Cliternā uocant Plinius ,  
& Strabo , Claternam idem Cicero Phil. 8. inde  
Hirtius Antonij praesidium deiecit.

EPISTOLA . VI pag. 419

TIDIO Strabone , & malim , Titio : cum Ti-  
tij noti sint , Tidios autem ego quidem ignorem . &  
ep. 14. lib. 13. Titius Strabo nominatur.

EPISTOLA . XII pag. 424

Quos & sic omnes libri ueteres ; uno excepto ,  
in quo est , Quam , & in margine Quos . Quos au-  
tem exercitus accipio , non tyrannos : nam tyran-  
ni sunt ipsi Dolabella & Antonius , quibus ere-  
ptum a se exercitum esse gloriatur . At , Exerci-  
tum , dixit , non Exercitus . Vere : tamen postea  
respexit ad quattuor exercitus , quos ipse compa-  
rauerat , Murci , Crispi , Bassi , Allieni.

EPISTOLA . XIII pag. 426

Nec inconuenientia , & ita legitur in quin-  
que antiquis libris , quos nunc habeo , & in alijs  
m 4 praeterea ,



praeterea, quibus olim sum usus; Petri Bembi, Ubalдини Bandinelli, Ioannis Scalae, Paulli Boti, duobus Caroli Sigonij. nec uero aliter postulat sententia. Duo ueteres libri, unus Vincentij Ricci, quem olim in Scholijs meis nominavi, alter, qui nunc apud me est, uiri doctissimi, atque optimi, & mihi uetere necessitudine coniuncti, Petri Pagani, habent, Disconuenientiam: nec improbo: nam & Horatius ep. 1. l. 1. dixit: Aestuat, & uitae disconuenit ordine toto. Et ep. 14. Non eadem miramur: eo disconuenit inter Meq. & te. Alij legunt, Nec conuenientia, pro, inconuenientia. Sua cuique sponsa, ut in prouerbio est.

eadem. pag. 427

CVI Lucilius praecerat: & etsi nihil mutauimus, tamen indicamus placere nobis, Lucius, potius, quam Lucilius: tum quod ita est in duobus antiquis, & in uno praeterea Vincentij Ricci, quem olim habuimus: tum etiam, quod Appianus hunc nominat L. Figulum: & Figulus non Luciliorum, sed Marciorum, & Nigidiorum est cognomen.

eadem. pag. 427

CASTRA habet posita παλτοῖς Paltum a Plinio quoque Graeca inflexionis forma nominatum. E uetere libro Paulli Boti sic olim emendauimus. & ita dictum, παλτοῖς, figura Graeca, ut κορυδαλλος κορυδαλλοῖς, προβαλινθος προβαλινθοῖς, φάληρον φάληροῖς, φρέαρρον φρεαρροῖς.

eadem.



eadem. pag. 428

**ACROMMYACRIDE.** § uerba Graeca, Latine prolata. nam προμύλου ἄκρα Cypri promontoriū est, auctoribus Strabone, & Ptolemaeo. ἀκρίς autem diminutiua forma dictum. Cassius, cum Latine loqui uellet, ex duobus nominibus unum fecit, omissa una littera V.

**EPISTOLA. XIV** pag. 429

**Q**UAM reuera furere eos inueni. quod uero aliquid de his scripsi, § totum hoc non erat in impressis libris: ego addidi ante multos annos, ex antiquo Vincentij Riccij libro: cum quo postea uidi consentire & Sigonij librum, & quatuor praeterea, quos nunc habeo.

eadem. pag. 429

**N**EC in me ullae priuatim iniuriae umquam. § subandi, Fuere. sic duo ueteres libri, & recte.

**EPISTOLA. XV** pag. 433

**D**UVM millium amphorum, § antiquissimus grammaticus Iulius Romanus admonuit, Amphorum, dici, cum additur numerus; Amphoratum, per se: ut est apud Carisium.

eadem. pag. 434

**H**AEC § non est, a quo uerbo regatur: & subaudiri uidetur, Faciunt. nonnulli ueteres libri habent:



habent: Hoc siue timor est, ut dicantur, de agris, quos in continenti habent, siue furor, siue patientia paucorum. &c. Omnes autem scripti libri, Patientia, non Potentia: sed, Potentia, magis placet, licet, ut opinor, ex ingenio sit.

eadem. pag. 434

M E D E R I, cum facile possent, uoluerunt. § sic duo ueteres libri: reliqui, Noluerunt. sed Latini sermonis consuetudo postulat, Voluerunt. non enim dicitur: Neque nostro praesentium, neque imminenti Italiae periculo mederi noluerunt. Nam id esset, Mederi uoluerunt: cum ex geminata negatione fiat affirmatio.

EPISTOLA. XVII pag. 439

I N ista solitudine, § Solitudine potius, quam Sollicitudine, e tribus antiquis libris, & e sensuliegendum putavi. dixit enim Solitudine, pro Summo otio: quod apertius sequenti epistola: Etsi, inquit, periniquo patiebar animo te a me digredi: tamen eo tempore me consolabar, quod & in summum otium te ire arbitrabar, & ab impendentibus magnis negotiis discedere.

EPISTOLA. XXII pag. 442

C O L L E G A nostro, § in auguratu. ep. 14. lib. 1. ix. & ad Att. ep. 14. lib. x. & Phil. 2. & Plutar-



Plutarchus. Alij, Vestro, legunt, historia refragante. nam ueteres libri utrumque habent.

## EPISOLA. XXI I I pag. 443

STRATORIVS. § fortasse legendum, Statorius, ex Festo in Lacus Lucrinus.

eadem. pag. 444

QUATTUOR: § Appianus lib. 3. scripsit, sex fuisse Macedonicas legiones: quarum unam Antonium Dolabellae, collegae suo, in Syria proficiscenti, concessisse: reliquas ipsum accepisse. quod si ita est: legendum hic uidetur, Quinque, nō Quattuor: ut Antonius duabus quidem in proelio ad Mutinam sit usus, unam uero castris praesidio reliquerit: quae fortasse fuit Alaudarum legio, quā cum Antonio fuisse Cicero ostendit ep. 7. ad Att. lib. 16. ita quinque legionum numerus reperietur.

## EPISTOLA. XXV pag. 346

ALTERO uicesimo die, § die uicesimo secundo. nam Alter secundum obtinet locum. quod ex antiquo lapide intelligitur, in Casinati reperto, in ruinis uillae.

MEMO.



## MEMORIAE

SEX. VIGELLI. AQUINAT. QUI  
 ANN. ATTIGIT. CENTENS.  
 SET. ALTERVM. ET. NONA GENS.  
 PERPET. IN OFFENSA. VALETVD.  
 EXEGIT. RELIQVOS. SEPTEM. ET. D. XIIX.  
 DECVBVIT. ET. OCCVBVIT  
 NAT. LVD. SAECVL. VIII. OBIIT. SEQVENT.

*Et Tacitus in Dialogo de Oratoribus, tres aeta-  
 tes adolescentium oratorum designat, his uerbis:  
 Nonodecimo aetatis anno L. Crassus C. Carbonē,  
 uno & xx, Caesar Dolabellam, altero & xx. Asi-  
 nius Pollio Catonem, non multo aetate antece-  
 dens Calvus Vatinius, ijs orationibus insecuti  
 sunt, quas hodieq. cum admiratione legimus.*

*eadem. pag. 446*

*IDEST Clauisij, & Tauri. } delendum hoc  
 arbitror, ut glossema.*

*eadem. pag. 447*

*QVODDAM caecum tempus seruitutis. } in  
 quo non eluceret honestū, in quo homines recta non  
 uiderent: ut facile, tamquam in tenebris, errarent,  
 ac laberentur. Hanc ego ueram esse huius loci sen-  
 tentiam arbitror: eaq. duorum ueterum librorum  
 testimonio comprobatur. In alijs pro, Caecum, le-  
 gitur, Graecum: quod mendosum puto. Sunt,  
 qui ex ingenio, Egregium, legendum existiment.*

*ex*



ex quo quænam elici apta ad hunc locum sententia possit, non equidem intelligo. In alijs, Gratū, mendose.

eadem. pag. 447

CONFECI in Caesaris Octauiani plagas. & suam laudem cum Octauiano communicat. Confeci, inquit, ac perdidit, Antonium, in Octauiani plagas, idest, ut Octavianus eum & ipse conficeret. Placeret tamen, ut olim placuit, Conieci, pro Confeci, unius litterae mutatione parua: nam F ab I, si maiusculæ scribantur ut olim, non admodum differt.

eadem. pag. 448

HIC dies aliam uitam affert, & uerba Terentij in Andr. Quidam legunt, Haec dies: opinor, ut tempus potius, quam certus dies ostendatur. Mihi placet interpretatio, mutatio non placet: primum, ne dissentiam ab antiquis libris, qui consentiunt omnes in Hic dies: quod etiam Donatus probat: deinde, quia Dies uirili genere interdum tempus designat, itemq. muliebri certum diem.

eadem. pag. 448

P. LUCCEIVM & quis non uidet initium esse alterius epistolae? cum infra de Pansa mortuo, supra de uiuo fiat mentio. De eodem Lucceio ep. 30.

eadem. pag. 453

ATTIO Dionysio & si est idem, de quo in ep. 24. Attico legi malim, quam Attio: ut ab Attico & cognomen, & nomen acceperit. quod etiam Corrado placuit. ep. 1 §. lib. 4. ad Att.

IN LIB.



# IN. LIBRVM. XIII

## EPISTOLA. II

PAG. CDLVII

**A** V I A N O Euandro, & illud pri-  
mum constat, libertum hunc esse  
**C.** M. Aemilij, qui post nominatur:  
deinde, cum liberti retinere soleant  
seruile nomen, patere arbitror, E-  
uandro nomen huic fuisse, cum seruiret; Auiani  
autem cognomen ab eo, qui manumisit, accepisse.  
non enim ijs assentior, qui, Auiano, legunt, opi-  
nati Auianiam gentem Romae fuisse. nam liberti  
eodem, quo patroni, nomine utebantur. patrono  
autem Euandri, Aemilio, nomen fuit, cogno-  
men Auiano. itaque ep. 21. cum eius libertum C.  
Auianum Hammonium Cicero commendare uel-  
let, sic orsus est: M. Aemilius Auianus ab ineun-  
te adolescentia me obseruauit. Et ep. 27. C. Auia-  
nus Hammonius incredibiles mihi gratias per lit-  
teras egit & suo, & Aemilij Auiani, patroni sui,  
nomine. Quod si opinionem suam ueteris libri au-  
thoritate defenderint: nos contra non uno, aut al-  
tero, sed pluribus utemur testibus antiquis libris;  
quibus ipsa ratio maxime suffragatur. nam si pa-  
tronus M. Aemilius Auianus uocatur; quod in  
dubium ne immutatores quidem isti uocant: qui  
potest



potest eius libertus *Auianus* dici potius, quam *Auianus*? Id me magis aliquanto mouet, quod primum huius *Euandri* nomen est *Caius*, non, ut eius patroni, *Marcus*: & quod eiusdem *Aemilij* libertus *Hammonius* item *Caius*, non *Marcus*, appellatur: ut ex duabus epistolis, 21. & 27. cognoscitur. Expediemus hunc fortasse nodum, si putabimus, *Euandrum* & *Hammonium* duobus fratribus *C.* & *M. Aemilijs Auianis* seruisse, manumissosq. praenomen a fratre maiore *Caio* accepisse. Nec uero de duobus fratribus *Auianis* incerta & inanis coniectura est. nam ep. ult. huius libri, facta patris eorum *C. Auiani Flacci* mentione, subiunguntur haec: *C. Auianus* in *Sicilia* est: *Marcus* est nobiscum. Licet etiam opinari, manumissos *Euandrum* & *Hammonium* non ab horum fratrum altero, sed ab utriusque patre *C. Auiano Flacco*, & ab eo praenomen accepisse. nam, quo tempore in *Ciliciam* *Cicero* profectus est, uinebat *Flaccus*: perijt autem aliquot post annis *Allieno* *Siciliam* obtinente, ut ex epistola ult. huius libri colligitur. Nam quod idem in ceteris quoque, quae infra leguntur, epistolis, 21. 27. 35. 79. atque etiam lib. 7. ep. 23. *Auiani* nomen in *Auanium* mutarunt: eadem ratione refelluntur: ut omittam ueterum librorum, quibus quidem ego uitor, testimonium: quod illi tamen contemnunt, nisi si cum suo singulari libro consentiat: nos tamen, contemni non debere, saepe sumus experti: contra, in illo, quem

se



se unum sequi profitentur, mendosa esse quamplurima non ignoramus.

eadem. pag. 458

REMIGRARE ē e Memmij sacrario in uerem domum. uel, Remigrare, dictum est, non ob reditum in pristinam domum, sed ob discessum, in quamcumque iturus esset.

eadem. pag. 458

KALENDIS Quinct. § praefinita Euandro die, qua e sacrario migraret. Kalendae Quinctiles in Vrbe primus erat locationum dies. Ad Q. fratrem ep. 3. lib. 2. Post kal. Quinct. in tuam domū commigrabis. Suetonius in Tiberio: Senatori latum clauum ademit, quem cognouisset sub Kal. Iulij demigrasse in hortos, quo iulius post eam diem aedes in urbe conduceret. Et Mart. epigr. lib. 12. epigr. 32.

#### EPISTOLA. VI. pag. 463

DILIGENDIS. § sic opinor melius, quam Diligendis: nam in delectu iudicium ostenditur. Porro, quam parum differat Deligendis a Diligendis, qui libros ueteres manusculis descriptos litteris norunt, facile perspicunt.

#### EPISTOLA. IIX pag. 466

CVIVS ex filia natus est L. Sextius, } in oratione pro Sextio: Duxit honestissimi, & spectatissimi



tissimi uiri C. Albini filiam: ex qua hic est filius, & nupta iam filia. In eadē oratione praenomen Sextij pueri est Publius, idē quod patris, non Lucius. Antea in omnibus impressis, Cuius ex familia & c. legebatur. Primi nos locum emendauimus.

## EPISTOLA. IX pag. 467

RUPILIUS P. F. Men. § mallem, Rupilius P. F. An. ut Aniensis tribus significetur. nam Vincentij Riccij liber antiquus habet, Rupilius P. Fannias. cuius uitij fuit haec origo, quod, cum scriptum esset, P. F. An. imperiti, ueteres notas non intelligentes, scripserunt, P. Fannius. Quod si retinetur, Men. de Menenia tribu erit intelligendum; de qua diximus in Scholijs lib. I I X.

## EPISTOLA. X pag. 468

UT SE corroborauit, § ut ad uirilem actatem accessit. Sic in orat. pro Coelio: Cum is iam se corroborauisset, ac uir inter uiros esset. Et in eadem, Non modo haec aetas, sed etiā iam corroborata, idest, non modo adolescentes, sed etiam uiri. Et supra, eiusdem orationis initio, eos, qui non, ut Coelij accusator, adolescentes essent, sed uiri, Robustiores appellauit. Alibi etiam in hanc sententiam eodem uerbo usus est. Inde Robusta aetas.

eadem. pag. 468

SED tamen caussa communis ordinis § plerique ueteres libri, Sed tamen communis ordinis: quod mendosum esse constat: itaque legendum putabat Vbalдинus Bandinellus, quod item alijs placere



placere uideo: Sed tamen communio ordinis. Equidem nec improbo, quod placet doctis uiris: nec tamen statuo, sit ne hoc melius, quam illud, Causa communis ordinis: quod mihi quidem ideo magis placet, quia sumptum est ex quibusdam antiquis libris. Sunt, qui opinentur, Communis, recte legi: & subaudiri, societas: ut publicanorum omnium tota societas intelligatur. id mihi uidetur durius, & accersitum nimis longe.

EPISTOLA. XII pag. 471

NON ut aliquid de illa commendatione deminuem, sed ut hanc addam § simile illud ep. 10. Nihil infirmius illud, hoc addito. Alij aliter. nos sic emendauimus ex uetusto Maffeorum libro.

EPISTOLA. XV pag. 473

ETIAM, hominem perustum; etiamnū gloria uolunt incendere; § Etiamnum, non placet: uidetur enim abundare, cum iam dictum sit, Etiam. Augent mendi suspensionem ueteres libri. nam pro, Etiamnum, tres habent, Et intimum: unus, Et iam non: duo, Et inanem: unus, Et inani: unus, Inani: unus, quo sum usus adolescens, Vincentij Ricciij Immani: quod in Scholijs nostris olim testati sumus: unus omnino, Et iannū. Quae uarietas dubitationē mihi quidem non parua affert. placuit olim, Inani gloria: placet idē nunc, ita, si docti uiri probant. non enim is sum, qui meas opiniones mordicus retineam.

EPI-



QVAMMAXIMVS postea commendatione cumulus accedat. § pro, Postea, Potest mea, mihi placere, Scholia mea in has epistolas, ante triginta annos edita, & saepe deinde impressa, testantur. itaque non disputo, quam recte faciant, qui, quod nostrum est, ad alios transferat: cū praefertim, Scholia nostra se uidisse, infitias ire non possint. equidem, quod ad me attinet, non laboro: minima enim haec duco; & magis id specto, ut studiosis meo labore consulam, quam ut inanem gloriam quaeram: sed iniquam nostrorum temporum consuetudinem notandam putavi. De correctione nihil addo. notus enim loquendi modus. uno tamen utar exemplo. ep. 4. lib. 15. Quam potui maximis itineribus ad Amanum ire contendere.

## EPISTOLA. XXI pag. 480

IN OMNI genere officij diligendus. § nō delector mutatione: facio tamen libenter, ut in locis mendum redolentibus testificer sententiam meam. In omni genere officij diligendus, ferri potest, & eo magis, quod omnes libri ueteres consentiunt: uerumtamen, quia Diligens, & Diligendus, non admodum diuersa sunt; scripsi olim, nihil tamen affirmans, magis mihi placere Diligens, quam Diligendus: ut mentio fiat in officio diligentiae potius, quam amoris, ex consuetudine Ciceronis: quam si quis cōtemnit, eum a me dissentire nec miror, nec moleste fero. Ciceronis haec sunt, pro Plā-



cio: In omni officio diligentissimus. Pro Coelio: Vi-  
ro omnis officij diligentissimo. Pro Cluentio: In o-  
mnibus officijs retinēdis diligētior esse nemo potest.  
eadem. pag. 480

E V M Hammonium ꝯ fortasse abundat,  
*Hammonium.*

EPISTOLA. XXVI pag. 484

L I B E N T E R te esse facturum: ꝯ ab omni-  
bus antiquis libris, uno excepto, abest Tē: nec sane  
necessarium uidetur.

eadem. pag. 484

M E A S quoque litteras. ꝯ etsi neque nume-  
rus, neque genus loquendi admodum mihi satisfa-  
cit: quid enim est, Meae litterae magnū sunt apud  
te? consensus tamen facit ueterum librorum, ut  
acquiescam. In uulgatis legebatur, Meas quoque  
litteras pondus habituras. apte: sed antiquitatis,  
ut arbitror, nullo testimonio.

EPISTOLA. XXVII pag. 485

V T uos soletis in formulis, ꝯ sic plane in  
antiquo Fuluij Vrsini libro, & recte: alij duo, Vt  
soletis in formulis: reliqui mendose, Vt uoletis in  
formulis. Notae sunt iurisconsultorum formulae.

EPISTOLA. XXIX pag. 487

I L L V D, quod supra scripsi, id tibi con-  
firmo ꝯ Id, non abundat, sed additum confirma-  
tionis gratia, ut ep. 57. Illud, quod tecum & co-  
ram, & per litteras diligentissime egi, id & nunc  
etiam atque etiam rogo. Et lib. 7. ep. 26. Lex sumptuaria,



tuaria, quae uidetur ἀντότητα attulisse, ea mihi fraudi fuit. Et pro Coelio: Illud tempus aetatis, quod ipsum sua sponte infirmū, aliorū libidine infestū est, id hoc loco defendo. Plautus in Pseud. Tibicinā illam, tuus quā gnatus deperit, eā circumducam lepide. Varro lib. 3. de rer. rust. Thebae, quae ante cataclysmon Ogygi conditae dicuntur, eae tamen circiter duo millia annorū & centum sunt. Duo uerba, Tibi confirmo, sumpsimus ex antiquis libris. quod ideo testificamur, quia, locū ex ingenio supplementum, alij crediderunt, hoc argumento ducti, quod in suo uetere libro deesse aliquid cernerent.

## EPISTOLA. XXIX pag. 491

QUIBUSQ. muuitus fuerim; } hunc locum uacare mendo, persuaderi mihi uix potest. antiquus liber unus, Quibus & munitus: alius, Quibusq. monitus: reliqui omnes, Quibusq. munitus fuerim, mihi placeret, Quibusq. inimicus fuerim. Ut in eo Pompeiani significantur, Per quos homines, ordinesq. steterim; Caesariani in hoc, Quibusq. inimicus fuerim.

## EPISTOLA. XLII pag. 498

BYLLIONES, } sic omnes libri ueteres, pro Bylliones. interdū tamen Graeca littera Υ seruatur, ut in Pyrrhus, Phryges: quod Cicero, contra ueterem consuetudinem, probat in libro de perfecto oratore. Populi sunt supra Epidamnum, a Byllide, siue Bullide urbe, quae est in Illyrico. Plinius, Strabo lib. VII. Stephanus.



## EPISTOLA. L pag. 502

MULTA in illum mea; quodq. maximū est, summus inter nos amor, & quanto hoc uenustius, quam ut est in uulgatis libris, Multa in illum mea quoque. maximum est, summus inter nos amor. Sic autem ante multos annos ex antiquo libro Vincentij Riccij emendauimus. nunc eo magis confirmor in sententia, quia uideo sic & legi, & distingui in Petri Pagani libro: in alio autem, Multa in illum mea. quod maximum est, &c.

## EPISTOLA. LII pag. 503

REGI. & cognomen gentis Marciae: ut e Salustio, Valerio, Suetonio constat, addito etiam testimonio Ciceronis ep. 14. ad Att. lib. 1. & Plutarchi in uita Ciceronis. Absurde nonnulli putant hūc esse Deiotarum regem: cum tamen, Deiotaro regi, non sit in titulo, sed tantum, Regi. praeterea inepta familiaritas illa esset, in ijs uerbis, quae sunt infra, Fac igitur, mi Rex, &c.

## EPISTOLA. LIII pag. 503

EI TE commodos, & malim, Ei Commodos. sic enim Cicero locutus ep. 9. 13. 32. 35. 37. 41. 54. 69. 70. 75. b.l.

## EPISTOLA. LVI pag. 506

MYLASII, & Alabandenses & sic discrete scriptum est in meo uetere libro: in alijs, Mylasij, & Alabandes: in quibusdam, Mylasis, & Alabandes, Graeco more. Mylasa, & Alabanda nominantur a Plinio, & alijs.

EPI-



## EPISTOLA. LXXIII pag. 518

PROCOS. § suspicor hoc uerbum abundare, & additum ab aliquo, qui putauit, cum in sequentis epistolae inscriptione Proconsul Philippus uocetur, multo magis in hac, quae ordine antecedit, uocari debere: cum peruersus ordo sit, & illam, quae sequitur, huic omnino praeponendam esse constet. Quo modo enim proconsul appellari potest, cum in urbem, deposito imperio, redierit? in urbe enim potius Philippum esse, quam ad urbem, facile credo: cum dicat Cicero: Quod si Romae te uidissem, coram gratias egissem: & quia, qui ad urbem morabantur, triumphum expetebant: cuius rei nulla fit mentio in epistola: nec uero triumphauit umquam hic Q. Philippus.

## EPISTOLA. LXXVII pag. 521

P. SVLPICIO § Bernardinus Rutilius, qui opiniones quasdam suas in Familiares, ut uocant, Ciceronis epistolas, me puero, edidit, legendum arbitratur, P. Vatinius, adductus in hanc sententiam ea ratione, quia Cicero de seruo suo Dionysio scribit in hac epistola, de quo item Vatinius ad Ciceronem in duabus, 9. & 10. lib. 5. & ad eum Cicero ep. xi. ibidem. Sensit idem postea Corradus in suis Scholijs. Mihi non satis neque Rutilij, neque Corradi sententia, quam alij postea secuti sunt, probatur. nam, ut illud omittam, quod haec huius epistolae uerba: Saluo iure nostrae ueteris amicitiae: & quae sunt infra: Pro tuo perpetuo in me studio: non uiden-



tur in Vatinius conuenire, cuius erga Ciceronem perpetuum certe studium non fuerat, inimicitijs, oratione aduersus eum notissimis, interruptum: ut hoc, inquam, omittam, quod exigui ponderis non est; ualde me mouet ea ratio, quod post supplicationem decretam scribit Cicero de seruo suo ad Sulpicium: at Vatinius decreta supplicatio uidetur Octobri mense, ut ex ep. i. lib. v. non dubiam facere coniecturam licet. scripsit enim Vatinius Nonis Dec. eam epistolam; cum de supplicatione decreta iam e Ciceronis litteris cognouisset. Ante Nouembrem autem alteram eiusdem epistolam acceperat Cicero, datam V. id. Quint. in qua de fuga serui Dionysij se audiuisse significauit. quod cum ita sit; cui uerisimile uideatur, hanc epistolam, Sulpicio inscriptam, in qua de supplicatione decreta fit mentio, ad Vatinium de Dionysij fuga, multo ante supplicationem ei cognita, ut ignota de remissa esse? Ad hanc rationem accedit altera, ipsa quoque, ut arbitror, non contemnenda. Nam cum Cicero supplicationem decretam Sulpicio significat, eodem tempore M. Bolanum commendat. Vatinius autem in epistola sua de supplicatione sibi decreta respondens, uerbum de Bolano nullum facit. Consensum omitto ueterum librorum, quibus in omnibus perspicue scriptum uideo, ne una quidem littera ueritatem obscurante, P. Sulpicio. Restat illa dubitatio cum in Vatini imperio urbs Narona fuerit, ut ex ipsius epistolis intelligitur;

qui



qui possit eadem urbs esse in imperio Sulpicij. Placere uideo doctis uiris, id quod ego quoque semper existimaui, Vatini, qui tribunatum e Caesaris primum consulis uoluntate gesserat, & Sulpicij, qui eiusdem Caesaris legatus fuerat in Gallia, communem fuisse provinciam Illyricum; & eo magis, quod ipse in re quoque maritima, contra Octavianum Pompeianum in Illyrico praeclare gesta, collegae fuerant: ut apud Oppium scriptum est. At Vatini de Illyrico sine Sulpicio triumphasse, fasti docent: ex quo sequi uidetur, ut solus Illyrico praesuerit. Hoc refellere non difficile est. potuit enim toto triennio, quo Vatinius Illyricum administravit, id est a quarto Caesaris consulatu ad Lepidum, & Plancum consules, aliquid in provincia Sulpicius aliquid offendere, aut a Caesare ipso reuocari, aut post obitum Caesaris ab Octaviano rerum potito: potuit ante Lepidi, & Planci consulatum interire: fortasse etiam hunc honorem Octavianus, cum omnia non iure, non more, sed ex dominantium libidine gererentur, uni Vatino gratiae causa largiri uoluit.



# IN. LIBRVM. XIV

## EPISTOLA. I

PAG. DXXV

IPSO & centurionis fortasse nomen. Hisponem quendam nominat Quintilianus lib. 6. cap. de risu. Hic nonnulli ueteres libri habent, Ipso: alij, Ipse: quinque nostri, Hispo. Ex hac uarietate legendum fortasse, Piso, uel potius, Ipse: ut de eodem accipiat: cuius nomen omitti potuit, Cum Terentiae litteris, L. Pisonem, Ciceronis inimicum, eius anni consulem, ad Macedoniam regendam propediem iturum significantibus, responderet. nominare enim, qui consul adhuc erat, non audebat.

EPISTOLA. II pag. 527

QUAE impensa facienda est, in eius partem te, miseram, & despoliatam, uenire, & ueteres libri, quos quidem ego uiderim, Te non habent: & uidetur subaudiri posse.

EPISTOLA. IV pag. 530

QUOS ego seruauī semper, & sic unus antiquus liber: omnes reliqui, Quibus ego seruī semper. quod magis placet.

eadem.



eadem. pag. 531

EAM confirmes, & rem adiuues. § sic ueteres libri, & recte. Confirmare spem, dixit Cicero in Diuinatione.

eadem. pag. 531

QV ID de Tulliola mea fiet? § Cum ita sit in meis omnibus antiquis libris; nō uideo, cur mutē. etsi scio, Quid Tulliola mea fiet, quod ad Latini sermonis consuetudinem attinet, recte legi posse: ut ep. I. ad Att. lib. 6. Quid illo fiet, quem reliquero?

eadem. pag. 531

CETERORVM seruorum ea causa est, § ueritus Cicero amissionem seruorum cum tota re, manumisit eos hac condicione, ut, si per legem Clodiam bonis omnibus priuandus esset, ij suo beneficio liberti essent, si modo id obtineri posset: sin autem lex seruos non adimeret, & ut ad ueterem dominum pertinerent, concederet; seruirent, ut antea, praeterquam paucissimi, quos ob fidem, & diligentiam omnino liberatos uellet. Dixit autem, Ceterorum seruorum, cum de suis loqueretur. nam ex Terentiae seruis neminem manumiserat: (neque enim poterat) tantum ijs, eam facturam esse, ut quisque esset meritus, promiserat. Hic locus in omnibus libris impressis mendose legebatur. nos eum distinctione tantum restituiamus.

eadem. pag. 532

OFFICIO uincet omnes spes. § mutationem sententia non requirit, praesertim confirma-  
ta



ta nō uno, aut altero, sed omnibus ueteribus libris. Bene speramus, inquit, de Sallustio : sed ille officio uincet omnes spes. Nouum autem, uel absurdum uideri non debet, Vincere spes, neque quod ad sententiā, neque quod ad loquēdi genus attinet. Eodē modo, Spē summā ciuium uirtute superare, dixit in libro de Amicitia. Spes autē, numero multitudinis, et apud Ciceronē ipsū, et apud alios usitatū est.

## EPISTOLA. VI pag. 534

CICERO S. D. Terentiae suae, & sic quatuor ueteres libri, quos secuti sumus: unus, Terentiae, & Tulliae: duo, Suis s. D. M. Cicero: quos nō probamus. cur enim aut eorū nomen, ad quos scribit, aut etiā suum Cicero occultaret, nō uideo. quasi uero manus illius a multis agnoscī non posset: aut, cuius seruus esset Pollex, qui nominatur in extrema epistola, reperiri difficile esset. Praeterea, cur inscribatur, Suis; cum ad unā Terentiā epistola mittatur? quod illa indicant, Ex tuis litteris: & Nostra tibi gratias agit: & Pollicem extrudas. non enim huic sententiae illud aduersatur, quod, quasi plures alloquatur, ait, Videatis uelim, quo modo satisfiat ei, cui scitis me satisfieri uelle. uult enim Terentiam eā de re cum amicis consilium capere.

eadem. pag. 534

POLLICEM, & ep. 45. ad Att. lib. 13. Pollex, ut dixerat, mihi Lannuij praesto fuit, sed plane pollex, non index. Placuit hunc locum recitare: ne, Pollucem, ut antea, legendum aliquis putaret.

EPI-



## EPISTOLA. VII pag. 534

IDEST Apollini, & Aesculapio. § glosse-  
ma hoc esse interdum putavi. Apollinem uero, &  
Aesculapium ideo nominat, quia praeesse illos cu-  
randis morbis antiquitas credidit.

## EPISTOLA. XIII pag. 537

SI metuendus iratus est; quies tamen ab  
illo fortasse nascetur. § proponit quod obijci po-  
test: & idem confutat. Si quis dixerit, metuen-  
dum esse Caesarem iratum; non negabo: uerum-  
tamen quies ab illo fortasse nascetur. posita enim  
sunt omnia in illius uoluntate idem & exitium, &  
otium afferre potest. quare timenda perniciēs, nec  
tamen desperanda salus. Equidē ualde miror, obscu-  
rā quibusdā hanc sententiā, & mendosum locum  
uideri. nam quod pro, Quies, est in uno uetere li-  
bro, Quiesces: id me quidem parum mouet. ha-  
beo enim sex antiquos libros, in quibus nulla ua-  
rietate, Quies, legitur: & sententia patet: ita-  
que mutationem sine causa non quaero.

## EPISTOLA. XIV pag. 538

VIDENDVM est, § dubitādi uim habet: quasi di-  
cat, Vereor, ne nō possitis. ut ep. Q. Ciceronis lib. 16.  
Vide, ut probare possit, te nō peccasse, id est: uereor,  
ne non possit. Alij utrūque locū sine causa mutant.  
eadem. pag. 538

IIIX. Kal. Quintā. § recte Sigonius coniecit  
legēdū esse, IIX. Kal. Febr. quod ex ep. 18. et ex XI.  
lib. 16. colligitur. Praeterea, cum ad Atticū scribe-  
ret, L. Caesarē, inquit, uidi Minturnis IIX. Kal. Feb.



# IN. LIBRVM. XV

## EPISTOLA. I

P A G. DXLIV

**T**ARCONDIMOTO, & regulo in Ciliciae parte, qui civili bello contra **A**Caesarem pro Pompeio pugnavit: eiq. postea victor Caesar ignovit. post interitum Caesaris, copias pro reip. partibus comparante C. Cassio, cum eo se coniunxit. Cassio mortuo, secutus Antonium cum Octaviano dimicantē, ab Agrippa navali proelio caesus est. Dio l. 41. 47. 50. Strabo l. 14. Florus l. 4. eadem. pag. 544

NOSTRAM consuetudinē integritatemq. & etsi neque ueteres libri mutant; & Consuetudinis uerbo significari laudem constat: probo tamen cōiecturam Hieronymi Ferrarij, qui legendum putabat, Mansuetudinem, adductus in hanc opinionem similitudine locorum. nam ep. 3. Mihi maximae curae est, ut, quae copijs, & opibus tenere uix possumus, mansuetudine, & continentia nostra, sociorum fidelitate teneamus. Et ep. 5. Mansuetudine, & innocentia imperatoris, prouinciam retentam, atque cōseruatam. Et ep. 9. ad Att. lib. 5. Faciam, ut summa modestia, & summa abstinentia munus hoc extraordinarium traducamus. Et ep. 16.



Et ep. 16. ad eundem : Socijs incredibilis uidetur  
et nostra mansuetudo, et abstinentia.

eadem. pag. 544

A EQUITATIS nostrae & duo ueteres li-  
bri, Equitatus nostri. et ep. 2. Cum equitatum in  
Ciliciam misissem. Malo tamen, Aequitatis no-  
strae. plus enim praesidij, ad continendos in fide  
socios, in aequitate sua, quam in uniuerso exerci-  
tu, non modo in equitatu, Cicero sibi esse consti-  
tutum existimabat : ut ep. 3. et hic proxime, quid  
profecerit integritas sua, iam ostendit.

EPISTOLA. III pag. 550

M. C I C E R O Imp. & imperator Cicero ap-  
pellatus est III id. Oct. caesis Amaniensibus, ut  
ep. 20. ad Att. lib. v. Ea res gesta nondum erat, cū  
hae litterae scriptae sunt, ac ne tum quidem, cum  
illae superiores ad senatum, quas post has missas  
esse satis liquet: ait enim in his Cicero: Publice pro-  
pter duas causas nihil scripsi. Quare mendosam  
hanc imperatoris appellationem semper duxi. et,  
opinor, librarius, cum uideret in titulo sequentis  
epistolae, Cicero imperator; eodem modo hanc ef-  
se inscribendam, ignarus temporum, existimauit.  
Hoc et Sigonium uideo suspicatum esse.

eadem. pag. 550

A D I C O N I V M & in castra uenit Cicero, quae  
fuere apud Iconium, VII. Kal. Sept. cum Iconij  
decem dies fuisset: ut ep. 20. ad Att. lib. v. Ab Ico-  
nio



nio castra mouit pridie Kal. Sept. ep. 6. lib. 3. Itaque legendum uidetur, III. Kal. Sept. eodemq. modo in ep. seq. ubi nunc legitur, Kal. Sep. legati a rege Commageno ad me missi.

EPISTOLA. IV pag. 551

M. ANNEIO § ep. 57. lib. 13. Hoc nomen uarie legitur in antiquis libris.

eadem. pag. 552

KAL. SEPT. § III Kal. Sept. legendum esse, iam ostendimus.

eadem. pag. 552

PRAESENTIA, magnitudine, & animi, & consilij. § pro Animi praesentia, magnitudine consilij: praesenti animo, magno consilio. In oratione pro Milone, Praesentiam animi, dixit Cicero, & Caesar lib. v. bel. Gal. Interdum ita commiscuntur Consilium, & Animus, ut ab animo consilium pendeat: quia metus consilium impedit. Cic. lib. 1. Off. Praesentis animi uti consilio.

eadem. pag. 553

ATHENAIDIS § malo nomen esse mulieris, quam ciuitatis: ut regis uxor, mater ue fuerit. nam, Importunitate, aptius de muliere dici puto, quam de ciuitate. Suffragatur huic opinioni antiqua inscriptio, quam Romae uidimus in hortis Carpensibus.

C. P O-



C. POPILLIVS. ALBÆVS

VIX. AN. XXXV

ATHENÆIS. AVGVSTÆS. VNCT.

POSIT. FRATRI

eadem. pag. 553

SACERDOS Comanorum sacerdos Arche-  
laus, a Pompeio Magno, ut scribit Appianus,  
Mithridate deuictō, præfectus: post quem sacer-  
dos fuit Nicomedes, a Caesare, post superatum  
Pompeium, præpositus. Eius sacerdotis potestas  
quæ fuerit, ostendit Hirtius, de bello Alexandri-  
no, his uerbis: Comana, uetustissimum, & san-  
ctissimum in Cappadocia Bellonæ templum, quod  
tanta religione colitur, ut sacerdos eius deæ, ma-  
iestate, imperio, & potentia secundus a rege con-  
sensu gentis illius habeatur, id homini nobilissimo  
Nicomedi Rithynio adiudicauit. Videndus &  
Strabo lib. x i i.

eadem. pag. 553

ET TOTO, & ignoratio Latini sermonis quos-  
dam inducit, ut hoc mendosum putarent, & inepta  
quædam comminiscerentur. Sed, Toto, Cicero  
dixit, pro, ea re, quæ summa est, & in qua sunt  
omnia. Ad Att. ep. 20. lib. v. Est totum, quid Ka-  
lendis Mart. futurum sit. Et ep. ad Capitonem:  
Totum hoc, ut, quod semper existimaui, nunc pla-  
ne intelligam, me a te multum amari. Et ep. i.  
lib. 3. ad Q. frat. Totum in eo est, testorium ut  
continuum sit.

o eadem.



eadem. pag. 555

TEBARANI. § ignota Geographis gens: nimirum enim negotij fuisset, latronum Amani montis nomina persequi. latrocinia enim exercebant eius montis incolae. Tibarenos & Plutarchus in Lucullo nominat, & Plinius lib.v.c.4. ubi Temiscyre regionis gentes persequitur.

eadem. pag. 556

QVAS consul in urbe gessisset. § ex quatuor antiquis libris ita lego. alij: Quas is consul in urbe gessisset. Ego Catonem, cuius in se officia hic Cicero commemorat, cum C. Antonio supplicationem sua sententia non decerneret, dixisse puto, decreturum se, si reserretur ob res a consule, idest a Cicerone, in urbe gestas: cum ea pluris aestimaret, quae togatus Cicero consul in urbe gessisset, quam quae foris armatus Antonius. Hanc sententiam confirmant etiam, quae sequuntur.

eadem. pag. 559

IUSTIORES § profecto, qui sententiam attenderit, legendum, Illustriores, intelliget. bellicis enim rebus non iustitiam, sed splendorem addunt aequitas, & continentia.

EPISTOLA. VI pag. 561

ET, si non modo unus, verum etiam multi Catones essent &c § unus es vere Cato, isto plane dignus cognomine, antiqua maiorum uirtute decorato. verum, si multi praeterea Catones essent, ego tamen sententiae tuae. testimonium omnibus



omnibus triumphis anteponerem : quanto magis ; cum sis unus : quo tua maior est auctoritas , tua uirtus illustrior . Cum uero dixit : Si non modo unus , uerum etiam multi Catones essent : Catonum praestantiam , non numerum , cogitauit . nam alij quoque Catones erant , ut C. Cato , qui ep. 2. 4. 5. lib. 1. nominatur . Video quosdam legere , Omnes , non Unus : quorum opinionem non improbo . eodem enim fere spectat , & ad stipulatores habet ueteres libros : quorum testimonio nostra quoque sententia comprobatur .

EPISTOLA . VII pag. 562

DILEXERIM ; & Dilexi , usitatum erat . utrique enim modo seruit particula , Cum , sequente Tum , ut ep. 6. lib. 9. Cum enim te semper magnum hominem duxi ; tum quod his tempestatibus es prope solus in portu .

EPISTOLA . IIX pag. 563

C. MARCELLO ; Hic locus , non semper credendum ueteribus libris , facile probat . scriptum est enim in omnibus , Marco , non , Caio , falso , ut ostendam , praenomine . Tres Marcelli , unus Marci , duo Caij praenomine , per triennium deinceps consules fuere : primo anno Marcus , M. F. ut ait Dio , Ser. Sulpicio collega : quibus non consulibus designatis , sed consulatum gerentibus , Cicero in prouinciam profectus est , ut e superiore ep. & ex ep. 3. li. 3. perspicuum fit : altero anno cum L. Paulo Caius , C. F. Ciceronis in auguratu collegae , Mar

o 2 ci uero



ci uero non frater germanus, sed, ut perspicue narrat Suetonius, patruelis. nā si germani essent fratres, in patris praenomine congruerent. at Marcus Marco patre, Dione teste, natus est: Caius autem Caio: quod ex epistola, quae sequitur hoc initio, Marcellum tuum, intelligitur. atque his consulibus Cicero, absoluto annuo imperio, ex provincia decessit. Tertio anno alter Caius, M. F. ut lapides Capitolini, & Dio significat, Marci, bienio ante consulis, frater germanus, quod ex parentis praenomine cognoscitur, cū L. Lentulo, anno ciuile belli primo, consul fuit. Cuius anni primis diebus, idest pridie non. Ian. Cicero procos. ad urbem accessit: ut ep. 10. lib. 16. Haec ad infirmandum consensum ueterum librorum, & ueritatem historiae testimonio restituendam, arbitror sufficere. Est enim hic (ut ἐν ἐπιτομῇ supra dicta colligantur) C. non M. Marcellus, ut quidam crediderunt, M. Marcelli, ad quem superior est epistola, frater patruelis; Caij, ad quem sequens, filius.

EPISTOLA. X pag. 564

Q V A N D O id accidit; & sic mei quinque ueteres libri: reliqui, Quomodo, Cum, Quom. placet, Quando.

EPISTOLA. XIV pag. 569

V N V S scilicet fructus, & ctsi uideo esse in aliquot antiquis libris, Vnus scilicet uni fructus: mihi tamen magis arridet, Vnus scilicet fructus: ut est in tribus item antiquis libris. uerbum enim, Vni, quem



quem hic locum habeat, non satis intelligo. Quid enim est, *Unus* uni fructus percipi litteris non potest? quasi uero non id omnium commune sit. nemo enim ex amici litteris eum fructum, quem ex praesentis conspectu, & sermone, percipit.

eadem. pag. 569

PROPERA: nihil tibi erit lautius, & ex omnibus antiquis libris, unus omnino Maffeorum est, in quo ita legatur. nam reliqui mei, *Prope, Mediceus, Propere*, habet. ex quo patet, qui ueritatem e tenebris uelit educere, multos ei consulendos esse ueteres libros. Sententia satis aperta.

EPISTOLA. XVI pag. 572

CUM haec te tertia iam epistola ante oppressit, & sic olim emendauimus ex antiquo libro *Vincentij Riccij*: idq. testati sumus ante aliquot annos in Scholijs nostris. nam quod est in alijs ueteribus libris: Cum haec tertia iam epistola ante operis sit: id mihi prorsus non placet. Sensus enim uidetur esse durior, nec tamen, nisi fallor, uerus. quid enim? adeo ne longa est haec epistola, ut opus uideri possit? cum praesertim eam, quae sequitur, *Cicero* breuem appellet: quae tamen breuior, quam haec, non est.

eadem. pag. 572

QUOD uelis ipsa currunt; & *Vincentij Riccij* liber habet: Quod in his incurrat. reliqui, Quod uelis ipsa currunt: unus hoc totum non habet, sed amplam lacunam, quantam scilicet implerent haec

• 3 ipsa



ipsa uerba: ut fortasse Graecum aliquid desit. nam eodem modo, qui librum illum descripsit ubi Graecum aliquid occurrit, inane spatium reliquit. Haec mihi uarietas mendi suspicionem affert: & libenter legerem, Quod, cū uelis, ipsa incurrunt: id est, in animum.

EPISTOLA. XIIIX pag. 575

T V A quidem in culina, mea molesta est. & mordet Cassium, ut Epicurcum, cuius philosophia uoluptatem rebus omnibus praeponeret. In culina: in epulis. Varie legitur hic locus in antiquis libris: Tua quidem in culina tua molestat: uel Tūa quidem in culina mea molestat. uel: Et quidem in colina mea molesta est: uel: Tūa est? quidam in in culina mea molestasset. in uno pro, Molesta, Molestia legitur.

EPISTOLA. XIX pag. 576

H A B E T damnatos, quos pro illo nobis restituat: & arguta in primis, & festiua sententia. Lege Pompeia damnatos restituerat Caesar: ut legimus apud eum lib. 3. de bel. ciu. hoc latenter Cassius notat: cum tamen de ijs loquatur, quos Caesar ad sectiones faciendas, ne hasta refrigesceret, Syllae mortuo suffecturus esset. Locus est in uerbo, Restituat, ambigua significatione, ad maiorem Caesaris contumeliam.

EPITOLA. XX pag. 577

A D amorem meum aliquantulum discedens addidisti; & pro Aliquantulum, ueteres libri



brī omnes, Aliquantulum olim, uno excepto, in quo est, Aliquantulum olim. ex quo placuit, Aliquantulum. nam, Olim, locum non habet: cum Trebonius paullo ante discesserit: quod illud infra demonstrat: Iter tuum cuiusmodi sit: ubi Brutum nostrum uideris. &c.

## EPISTOLA. XXI pag. 579

DE uno me & alij, De uno, de uno me. quae geminatio mihi non admodum probatur: non quod ea saepe Cicero non utatur, idq. grauitē, & or-  
nate: sed eam sententia, nisi opinione fallor, hoc in loco requirere non uidetur.

eadem. pag. 579

FUTURUM satis. & malim, Facturum satis: ut subaudiatur, Me. alioqui, Quo tamen ipso, unde regatur, non erit. nam, Futurum, nullo modo cum auferendi casu coniungi potest.



# IN. LIBRVM. XVI

## EPISTOLA. II

PAG. DLXXXII

X V. KAL. NOV. § *si attendimus, quod ep. 9. scriptum est: cogemur credere, Dec. non Nov. legere.*

## EPISTOLA. IX pag. 588

HEBDOMADEM § *si, Hebdomadem, Graeco more legas: Gellium corrige, ubi legitur quibusdam locis, Hebdomada, & Hebdomadam.*

*eadem. pag. 588*

INCOLUMEM stiteris. § *recte alij uerbum, Stiteris, mutatione minima, cum sit in antiquis libris, Steteris, reposuerunt. Sic ad Att. ep. 14. lib. x. Te uegetum nobis in Graecia sisti.*

## EPISTOLA. XIV pag. 594

ANDRICVS § *non dubito, quin hic sit idem, qui Menander in epistola 15. nominatur. itaque, cum putarem, uel in ea epistola, Andrici, non Menandri, uel in hac, Menandrus, pro, Andricus, reponendum esse: consului ueteres libros: quorum*  
*rum*



rum in uno corrupte quidem, unde tamen ueritas elici possit, *Atandrius*; in altero, *Mandricus*; in tertio, clarissimis litteris, *Menandrus*, legitur. utroque enim modo *Menandrus*, & *Menander*, usitate dicitur. *Propertius lib. 3. el. 21.*

*Librorumq. tuos docte Menandre sales.*

*Et Ouidius:*

*Dum fallax seruus, durus pater, improba lena,  
Vixerit, et meretrix blanda, Menandrus erit.*

*Ex hoc loco non unum, aut alterum, quod saepe iam dixi, sed multos ad tollenda menda inspiciendos esse ueteres libros, plane constat. nam in quibusdam, etiam antiquitate celebratis, legitur, Andricus.*

*eadem. pag. 594*

*HABVI* noctem plenam timoris, ac miseriae, & sic lego, ex ueteribus aliquot libris. placere alijs uideo: *Habui* noctem plenam timoris. ac miserius: tuis litteris nihilo sum factus certior, quo modo te haberes: sed tamen sum recreatus. Quod minime placet. Quo modo enim miseria maior est, quae nascitur ex litteris Tironis; cum, ijs acceptis, recreatum se dicat, idest priore miseria liberatum, aut certe ualde leuatum?

*eadem. pag. 594*

*Id* scripsi ad *Mumium*. & ueteres libri uarie, *Mumium*, *Munium*, *Numium*, *Nummum*, *Vatinnium*, *Vmmium*; omnes, ut ego suspicor, mendosi. Quis enim iste est uel *Vmmius*, uel *Mumius*, uel *Mumius*, uel *Numius*, uel *Nummus*, uel *Vatinnius*,



nus, a quo pecuniam medico promitti Cicero uult? is enim nusquam neque in his ad Tironem, neque in ijs, quae ad Atticum scriptae sunt, epistolis nominatur. ad Curium quidem se scripsisse, ut Tironi, quidquid opus esset, in sumptum erogaret, utique significat, ut ep. 6. Scripsi ad Curium, quod dixisses, daret. medico ipsi puto aliquid dandum esse, quo sit studiosior. Et ep. 9. Curio misi, ut medico honos haberetur, & tibi daret, quod opus esset. Et ad Att. ep. 5. lib. 8. Fasciculum, qui est M. Curio inscriptus, uelim cures ad eum perferendū; Tironemq. Curio commendes; ut ei, ut petijt, si quid opus erit, in sumptum erogat. Et ibidē ep. 6. Tironem uideo in sumptum ab alijs mutuatum. ego autem Curium nostrum, si quid opus esset, rogarā. Quare uidetur in hac etiam ad Tironem epistola Curius omnino significari. & ut dicam quod sentio, legendum opinor sic: Id scripsi ad Maniū: mutatione fere nulla: cum in uetere libro scriptum sit, Munium. fuisse autē Manius, Curiorum praenomen, nemo fere paullo eruditior ignorat. Nec mirum uideatur, solo praenomine quemquam indicari. nam, cum ad Tironem saepe Cicero de Curio, & hac ipsa de re, scripsisset: praenomen poni, cum de homine notissimo loqueretur, satis esse duxit: ut interdum Seruium, Appium, Sextum nominat, neque addit, Sulpicium, Claudium, Peducaem. Praenomen autem Manius, quia non admodum erat usitatum, ideoque librariorum incuria



curia saepe transijt in Marcus, eo facilius, quod  
*M'*, quo *Manius* ostenditur, minimum distat a *M.*  
 Hinc *M. Acilius Glabrio*, *M. Aquilius*, *M. Cu-*  
*rius*, mendose ubique, pro *M'*. quod mendum su-  
 stulimus ex ep. 17. lib. 13. & ad Att. ep. 2. 3. lib. 7.  
 & ep. 5. lib. 8. & 5. lib. 12. ad eundem.

EPISTOLA . XVII pag. 596

QVO, quidem comitatu ἀφομίλῃσα, satis  
 scis. & qui uident acutius, ijs examinandum hunc  
 locum relinquo. nam mihi quidem tenebrae sunt.  
 putauī interdum, ἐφομίλῃσας, legendum: pro, u-  
 sus: uerbo composito ab ἐπὶ, & ὁμιλέω.

EPISTOLA . XIX pag. 596

UT EST, & malim, Ut ut est. pro, quoquo-  
 modo res se habet: siue me uere amas, siue simu-  
 las. nam, Ut est, Quo modo est, Quo modo se  
 res habet, affirmare uidentur, & praesentem rei  
 statum indicare. Cicero autem hic iocans dubitare  
 se fingit.

eadem. pag. 597

M. OTHONEM: & Mothonem, antiqui libri o-  
 mnes. placet uel *M. Othonem*, cuius crebra men-  
 tio lib. 12. ad Att. uel, *Mathonem*, eum fortasse,  
 qui nominatur ep. 25. lib. 9. uel *Motonem*, de quo  
 ep. 50. ad Att. lib. 12. uel *Mutonem* in oratione  
 pro Fundanio.

EPISTOLA . XXI pag. 599

MIHI successa, & pro, successisse. quod La-  
 tini



tini sermonis consuetudo ferre uix uidetur. Omni-  
no mirari satis non possum, nō modo ab elegantia,  
& copia, sed interdum etiam a proprietate pater-  
ni sermonis longe distare orationem filij: quod uo-  
luntatis potius, quam naturae, uitiū esse arbitror.

eadem. pag. 599.

BRVTIO § Latino sermone: plerique tamen  
ueteres libri, Bruto: mendose scilicet. opinor enim,  
qui subsequi mentionem Cassij uiderunt, eos hunc  
esse M. Brutum, illum C. Cassium putasse. quasi  
uero post Caesaris necem ita uacuo animo essent,  
itaq. otio abundarent Brutus, & Cassius, ut a-  
pud alterum Graece declamitare, apud alterum  
Latine exerceri Cicero filius arbitrato suo posset.  
Praeterea, quis credat hoc ad M. Brutum per-  
tinere? Quem nullo tempore a me patior discede-  
re. Et illud? Huic ego locum in proximo condux-  
i, & ut possum, ex meis angustiis illius sustento te-  
nuitatē. Non enim, ut arbitror, ita loqueretur a-  
dolescentulus Cicero de claro uiro, & eius anni  
praetore, M. Bruto. nec ita Brutus ab amicis im-  
paratus erat, ut a Ciceronis filio, cui pater in an-  
nuum sumptum non satis large suppeditaret, su-  
stentandus in Athenarum urbe nobilissima fuerit.  
numquam id (ut matrem Seruiliam, propinquos,  
familiares reliquos omittam) Atticus tulisset; qui  
etiam, ut in eius uita Nepos ait, Bruto Italia ce-  
denti HS C. numeri miserit, eidem in Epiro absen-  
ti CCC. iusserit dari.

eadem.



eadem. pag. 600

HABES, ubi deponendae tibi sint urbanitates. § nihil muto: nec enim necesse est. Habes, inquit, ubi mores urbanos deponas: animumq. liberiore uitae genere, nulla graui occupatione, remittas, ac relaxes. Vel, Deponendae urbanitates, omittendae res urbanae: ut ep. 17. lib. VII. Mihi interdum leuis in urbis urbanitatisq. desiderio uidebare.

EPISTOLA. XXII pag. 601

FACILE legere soleo, § sic antiqui libri omnes. Interdum abundare uerbum, Legere, suspicatus sum: ut subaudiatur, Intelligere: cum paullo ante dictum sit, Non intelligent.

EPISTOLA. XXIII pag. 602

ANTONIUS de lege quid egerit. § hoc malo cum superioribus coniungere, quam, ut nonnullis placet, separatim constituere. Lex Antonij fortasse illa significatur, de qua sic ep. 12. lib. 14. ad Att. Antonius, accepta grandi pecunia, fixit legem, a dictatore comitijs latam, qua Siculi ciues Romani: cuius rei, uiuo illo, mentio nulla.

eadem. pag. 602

ET ENIM § abest ab uno uetere libro. placeret, Eum: sed, Etenim, ferri tamen potest. quasi hoc dicat Cicero: Quippe ad cuius rutam.

EPISTOLA. XXIV pag. 603

SED SI. § sic ueteres libri omnes. Ego legendū arbitror, Sed st; idest, Sed hoc filebis. est enim,



enim, St, nota silentij. Idem olim ex lib. 2. de Orat. mendum sustulimus. In Plauto etiam, ubi legendum St, modo Si, modo Ast, modo At, mēdose legitur. Terentius quoque in Phormione hac nota usus est. Quem locum recitat Velius Longus grammaticus. Et Nacuius in Corollaria, apud Carisium: St: tale uerbum caue faxis.

eadem. pag. 603

S E D quod egerint. ꝛ fac ut sciam: uel, Sciemus: subaudiendum. amat enim hic Cicero breuitatem, ut paullo ante: De publicis, omnia mihi certa: subaudi, significa. Mei tamen ueteres libri, Seu, non Sed, omnes habent. itaque cogor de mendo suspicari.

EPISTOLA. XXVII pag. 604

Q V I B V S alteri Cesenam, ꝛ hunc locum carere mendo numquam non sum arbitratus. neque enim adeo tum ignobilis, aut obscura Cesena fuit, quae nunc in primis laeta, & honesta ciuitas est, ut, tamquam abiecta res, nominari debuerit. nam quod Sidonius Apollinaris furnum ait esse potius, quam opidum: iocari uidetur, ut amico, qui Lugdunum, patriam suam, accusauerat, familiariter cauillans par pari referret. Auxit hanc suspicionem uetus liber uiri optimi, nec litterarum expertis, cōdiscipuli olim mei, Vincentij Riccij a Spe: quo in libro erat: Quibus gesa, uel quibus sutianarum



narum. Alter liber, e Cypro aduectus, quo olim sum usus, habebat, Quibus alteri Censenam. Atque hoc testati sumus ante multos annos in Scholijs nostris. Nunc uideo scriptum esse in antiquo exemplari Fulij Ursini: Quibus alteri Consanarum, alteri Cossutinarum. ut sint nomina tabernarum, quae tunc aedificarentur. quod non displicet: licet ignotae mihi tabernae sint. In alijs, Consuntinarum, Consutianarum, Cossutianarum.

eadem. pag. 604

DISSAVIABOR. } & hic amor ostenditur. nam Suauari, idest osculari, plus est, quam Complecti: Oculos, plus quam Malas: In foro, plus quam Domi, uel in uia: In medio foro, plus quam In alia fori parte: Dissuauari autem, plus quam Suauari. iteratio enim suauiorum indicatur. Veteres libri omnes, Dissauabor, detracta littera V: ut Sauium quoque, & Suauium, ueteres dicebant, a suauitate tamen deducto uocabulo.

F I N I S



58 18 244



